

Luke

Buki ana alamani weaqina

Iesu Valena Aqiaqina Luke 'wayavia. Tauna ge Diu 'olotona, ta 'esi Guliki 'olotona. Tauna ena fewa 'inaya tovevihiqa adi togiveaqiaqi. Luke ana 'aidega 'wayavia Iesu ena tuta gwama weaqina. Ta ena buki 'inaya Iesu ena nuakolokolo lukwalukwadi be, vivine be, tomotau kavokavovo ta wese tovevihiqa weaqidi 'wayavia. Ta wese Iesu ena vona sesebai 'eala Luke 'wayavia, ta vaina 'idiega ge taha toga wese da'wayavidi, ta 'esi Luke ana 'aidega, 'idewani Samelia 'olotona ena ilivu aqiaqina vona sesebaina, be wese taha kaiwabu natuna me'olotona luluve'waivina vona sesebaina.

Tuta~nana Faulo luvivila Luke ena di'we 'inaya, 'inega Iesu Valena noqolia ta vetumaqanea. 'Inega Faulo 'weabuya ta iulei maega ifewa. 'Inega 'abiboda Iesu Valena 'wayavia ta simanea tauna tomotau qabuda ada To'etoyavua. Ta Luke~nana taha wese buki 'wayavia eda Buki Gwala gamonaya, tauna buki~nana ana wawa Viaqa.

Buki gamona

1:1-4 Luke ena 'wayavi 'iuna weaqina simanea

1:5-2:52 Ioni Togivebabitaisto be Iesu edi vi'oi ta wese edi tuta gogama weaqina

3:1-20 Ioni Togivebabitaisto ena viaqayavo

3:21-4:13 Iesu ena babitaisto ta wese ana sitonova

4:14-9:50 Iesu ena iula me Galili 'idia Yaubada ena waiwaiaga

9:51-19:27 Iesu di'we Galili nogea ta tauya Ielusalema 'inaya

19:28-23:56 Iesu ena wiki ana 'ebelu'ovoa Ielusalema 'inaya be wese vaina 'abaga di'wenaya

24:1-53 Iesu ena ya'itoto 'evivi 'aligega be ena 'ifoqe, ta wese ena vaneqa mahalaya weaqina

Luke ena 'wayavi 'iuna

1 ^{1a} Kaiwabu Tiofilasi ye, tomotau qabudi Iesu Valena ni'au i'wayavia, ta Yaubada ena viaqa 'idaya weaqina isimana 'ifoqeyea edi alamani

^a 1:1 Via 1:1

'inega. ²Ta to'wayavi~dina edi 'wayavi i'ewea to'abiboda nugwenugweidi 'idiega, mana yani qabuna imadu'itea ta 'inega isimana 'ifoqeyea ta wese ivelulu'uyayea 'imaya. ³Ta yani qabuna Iesu weaqina ena tuta vi'oi 'inega be ana laba vaneqa mahalaya yasali aqiaqiedi ta yahalamani aqiaqiedi. 'Inega ya'a wese nuanuagu ena 'wayavidi be yani qabuna ena simana aqiaqiedi 'iuya. ⁴O'a ve'ita ni'a u'ewea Iesu ena viaqayavo be wese ena vonayavo weaqidi, ta ba'e egu 'wayavi 'inega una alamani aqiaqiedi be una 'awahaqiaqiedi.

Elisabeti ena valagata weaqina

⁵Egu velulu'uya ana 'ebeve'ale ba'e 'idewana: Tuta~nana kini Elodi di'we Iudia luvinea, 'inega taha toveguba toatoa ana wawa Sakalaia, tauna toveguba Abaya ena qabu 'idiega. Ta moqanena ana wawa Elisabeti, tauna wese Eloni ena gade 'inega. ⁶Ta magilafudi edi ilivu tunutunuqina Yaubada matanaya, ta tuta qabuna ena luvine ivematamatayaga aqiaqiedi. ⁷Ta natu geqadi, mana Elisabeti gagala voaqia, ta wese magilafudi ni'au ivekofekofe.

⁸⁻⁹^b 'Inega taha 'aubena Sakalaia me ena qabuyavo adi veyoveyoa iviaqia Vanue Gwalagwalana 'inaya. Ta edi ilivu 'inega taha 'oloto adi qabu 'inega ina venua'ivinea be guba naviaqia Yaubada 'iawanaya. 'Inega taha laha iviaqia ta Sakalaia nugweta be guba~nana naviaqia. 'Inega tauna ana 'aidega ana fata nalugu Sifaufa Gwalagwala Otaqina 'inaya ta dede'wa meilana aqiaqina nagabuya Kaiwabu weaqina. ¹⁰Ni'a lugu be dede'wa~nana gabugabuya, ta ba'e tuta~nana 'inaya wese qabu qiduana ivevenoqi vanue sifefenaya.

¹¹'Inega Yaubada ena tovale'ewa taha 'ifoqe ta dede'wa ana 'ebeveguba 'ataqinega tovtovolo. ¹²Ta tuta~nana Sakalaia 'itea 'inega yo'alia ta wese mwaniniva qiduana. ¹³Ta tovale'ewa~nana voneaya, "Sakalaia, ge una mwaniniva. Yaubada eu venoqi ni'au noqolia. Nawale moqaneu Elisabeti natuhu me'olotona navenatunea, ta una gabea ana wawa Ioni.

¹⁴"Inega o'a gwama~nana weaqina una qaiawa qiduana, ta wese tomotau qabudi ina qaiawa ena vi'oi weaqina, ¹⁵^c mana tauna nawale ana wawa qiduana Yaubada 'iawanaya. Ta gebu 'oine be wese go'ila waiwaina nanumedi, ta ena tuta vi'oi 'inega Niboana Gwalagwalana naluveagatuna'ia. ¹⁶Ta tauna me Isileli 'eala na'ebe'ewedi ina 'evivi edi Kaiwabu Yaubada 'inaya. ¹⁷^d Ta tauna nawale me ena waiwai ta me ena giwalifatu tomotau giwalidi na'iva'ava'aia Kaiwabu ena mai weaqina. Ta ena waiwai lova tovesimasimana Ilaitia 'idewana. Ta ena lugaihi 'inega tama ina nuagivila natudiavo 'idia. Ta wese taudi tovmatayaduqa ina nuagivila, 'inega ina tauya Yaubada ena 'eda tunutunuqina 'inaya."

^b 1:9 'Ifo 30:7 ^c 1:15 Naba 6:2-3 ^d 1:17 Mal 3:1; 4:5-6; Md 17:11-13

¹⁸ 'Inega Sakalaia tovale'ewana voneaya, "Vona ba'e ana alamani weaqina nuagu voqana, mana ya'a moqanegu maega tawa avekofekofe."

¹⁹ ^e 'Inega tovale'ewa~nana vona 'eviviea vonaya, "Ya'a Gebeliela, tuta qabuna yatovotovolou Yaubada 'iawanaya, ta tauna luvetunegu yamai ta vale aqiaqina ba'e ni'au yasimana 'ifoqeyea 'iuya. ²⁰ Ta o'a vale~nana ge uda vetumaqanei, 'inega ba'e 'itaga 'awau navita ge au fata una vona ana laba vale~nana ana alamani aqiaqi na'ifoqe 'iuya, 'inega wese una vona 'evivi."

²¹ Tomotau qabudi Sakalaia iba'eba'eyea ta inuanua tola'ai weaqina tuta kuena Vanue Gwalagwalana gamonaya toatoa. ²² Ta tuta~nana Sakalaia 'ifoqe ge ana fata naveqae, 'inega nimanega veveqae 'idia. Ba'e 'inega ni'a ialamania taha ve'ita kavona 'wayoqa 'ifoqe 'inaya Sifaufa Gwalagwala Otaqina gamonaya.

²³ Ta tuta~nana Sakalaia ena fewa ana tuta lu'ovoa, e 'inega 'evivi tauya ena 'abagaya. ²⁴ 'Inega tuta ba'e 'abibodanaya moqanena Elisabeti valagata, ta wai'ena faibi gamonaya ge dayabayaba ta vanuea toatoa. ²⁵ Ta vonaya, "Ba'e agu iula Yaubada 'inega, mana lova gagaligu 'inega yainiyauyau tomotau 'idia, ta ba'e 'itagana agu iniyauyau ni'a awala."

Meli ena venatuna valena

²⁶ Elisabeti ena wai'ena vesikisina ni'a lobe, 'inega Yaubada ena tovale'ewa Gebeliela wese vetunei mai 'abaga Nasaleta 'inaya di'we Galili gamonaya. ²⁷ ^f 'Inega 'ifoqe taha iahaba matayauyona 'inaya ana wawa Meli. Ta iahaba~nana taha 'oloto ana wawa Iosefa maega igwaledi, ta 'oloto~nana Deibida ena gade 'inega. ²⁸ Ta tovale'ewa~nana voneaya, "Kaiwa Meli, Yaubada ena veyoluba qiduana 'iuya. Ta o'a Kaiwabu maega."

²⁹ 'Inega Meli nuana voqana ta wese nuana vetonovea vona~nana ana alamani weaqina. ³⁰ Ta tovale'ewa~nana Meli voneaya, "Gebu una mwaniniva, mana Yaubada ena veyoluba qiduana 'iuya. ³¹ ^g Nawale una valagata ta natuhu me'olotona una venatunea ta ana wawa una gabea Ieisu. ³² ^h Nawale tauna naveqidua va'ine ta tomotau ina gabea Toatoa Vanena Natuna. Ta Kaiwabu Yaubada nawale ena waiwai naneia ena vetoluvine weaqina 'idewana lova tubuna Deibida 'abiluvine. ³³ 'Inega me Isileli naluvinedi, ta ena 'Ebeluvine gebu nahawala."

³⁴ Ta Meli tovale'ewa~nana voneaya, "Ma'oda 'edewana ena valagata 'aiqa, mana ya'a nawale matayauyogu ta ge eda vaqi?"

³⁵ 'Inega tovale'ewa~nana Meli voneaya, "Niboana Gwalagwalana nawale nawebui mai 'iuya ta Yaubada Toatoa Vanena ena waiwai 'inega

^e 1:19 Dan 8:16; 9:21 ^f 1:27 Md 1:16,18 ^g 1:31 Ais 7:14; Md 1:21-23 ^h 1:32-33 2Sam 7:12,13,16; Ais 9:7

una valagata. 'Inega natuhu gwalagwalana una venatunea, tauna ina gabea Yaubada Natuna. ³⁶Ta una nuaia nibaiu Elisabeti ni'a vekofekofe ta ggalina be tomotau ivonea ge ana fata navenatuna. Ta tauna tawa vegamwegamwe'i ta ena wai'ena vesikisina ni'a lobe. ³⁷ⁱ Mana yani qabuna Yaubada ana fata!"

³⁸'Inega Meli voneaya, "Ya'a Yaubada ena tofewa taha, 'inega tola'ai ni'au usimanea na'ifoqe 'iguya." 'Inega tovale'ewa~nana Meli nogei ta tauya.

Meli ena vayausa Elisabeti 'inaya

³⁹Ta ge tuta kuena 'abibodanaya Meli lukwayavonega tutuvila tauya ta di'we Iudia bwanaganavo 'evataonidi, 'inega taha 'abaga 'inaya 'ifoqe. ⁴⁰'Inega Sakalaia ena vanuea lugu ta nibaina Elisabeti lukaiwa 'inaya. ⁴¹Ta tutana Elisabeti Meli ena vekaiwa noqolia 'inega gwama gamonaya nidoa ta Niboana Gwalagwalana Elisabeti luveagatuna'ia. ⁴²Ta bonana qiduanega gaba vonaya, "O'a Yaubada vivine qabudi 'idiega ni'au venua'ivineu ta veveyolubeu, ta natuhu nawale una venatunea tauna Yaubada veveyolubea. ⁴³Yaqaiaqaiawa qiduana mana ya'a vavine kavokavovo ta o'a Yaubada ena venua'ivina nawale egu kaiwabu una venatunea, ta umai sabi vayausigu! ⁴⁴Tuta nana eu lukaiwa yanoqolia, 'inega gwama me ena qaiawa gamoguya nidoa. ⁴⁵Ta o'a toveyoluba aqiaqi, mana Kaiwabu ena vale 'iuya uvetumaqanea 'inega nawale ana aqiaqi na'ifoqe."

Meli ena 'evosi awatubo Yaubada 'inaya

- ⁴⁶^j Ta Meli vonaya,
 "Tuta qabuna giwaliguyega
 Kaiwabu yahawahawatuboya,
⁴⁷ ta yaqaiaqaiawa Yaubada
 tauna agu To'etoyavua 'inaya.
⁴⁸ Mana tauna 'ita webui mai 'iguya
 ya'a ena tofewa tonuawebui.
 'Inega tuta maimai 'idia
 lagata 'evaudi ina 'awahaqiaqiegu
 ya'a toveyoluba,
⁴⁹ mana Yaubada tauna Tovewaiwai otaqa
 ta yani waiwaina viaqia weaqigu.
 Tauna ana wawa gwalagwalana.
⁵⁰ ^k Tauna ana to'amayabayavo
 lagata 'aidega 'aidega 'idia

ⁱ 1:37 Nug 18:14 ^j 1:46 1Sam 2:1-10 ^k 1:50 Same 103:13,17

ena nuakolokolo ge nahawala
ta 'esi na'eno vataya.

51 ^l Ta vonahaqiaqi, taudi tonuavane
nimana waiwaina 'inega 'auefaledi.

52 ^m Tauna toluvine kaikaiwabudi a'uwebuiedi
edi 'ebetoa kaikaiwabuna 'inega,
ta taudi tonuawebui givaneyedi.

53 ⁿ Ta wese tobotana ve'ainidi
'abo gamodi 'elukoko,
ta tovekaikaiwabu nima 'ava'avadi
vetune 'eviviedi.

54 ^o Ta tauna ena vona fofofola
ge danuafania,
'inega ita'a me Isileli
nuakolokoloyeda be iuleda.

55 ^p Vonahaqiaqi,
'aqegigidavo
Ebelamo me ena gadeavo
Yaubada vona fofofola 'idia
be nanuakolokolo vatayeda."

56 Meli ena vonayavo lu'ovoidi, 'inega nibaina maega itoa wai'ena toi
'idia, 'inega 'abiboda 'evivi ena 'abagaya.

Ioni Togivebabitaizo ena vi'oi

57 Elisabeti ena tuta ni'a lobe a 'inega gwama me'olotona venatunea.

58 Ta edi gadeavo wese ediavo Yaubada ena veyoluba 'idia weaqina
inoqolia 'inega qabudi iqaiawa qiduana.

59 ^q Ta gwama~nana ena 'aubena ve'etina (8) ni'a lobe a, 'inega ena
qabuyavo iva'auta mai 'wafina sabi da'ana, 'idewana lova Yaubada luvine
Ebelamo neia. Ta wese nuanuadi ina gabea tamana Sakalaia waviana.

60 'Inega inana iawatayedi ivonedia, "Gebu, gwama ba'e kana gabea ana
wawa Ioni."

61 'Inega qabu diavona ivonaya, "Bena'e wawa~nana omi'a gademina
ge ami wawa." 62 'Inega venima giyoyowega tamana ivetala'aiea ma'oda
gwama ana wawa nagaba 'aiqei.

63 'Inega Sakalaia 'ebe'wayavi weaqina noqi ta ineia, 'inega gwama~nana
ana wawa 'wayavia ba'e 'idewana, "Ana wawa Ioni." 64 Ta omo'e tuta~nana
'inaya Sakalaia meana meaqana 'evivi, 'inega veqae ta Yaubada awatuboya.
'Inega qabu koyadi wawa~nana i'itea 'abo nuadi voqana qiduana.

^l 1:51 2Sam 22:28 ^m 1:52 Job 12:19; 5:11; Same 147:6 ⁿ 1:53 Same 34:10

^o 1:54 Same 98:3 ^p 1:55 Mai 7:20; Nug 17:7 ^q 1:59 Nug 17:12; Luvi 12:3; Lk 2:21

⁶⁵ Ta totoa 'abaga qabudi ba'e yani diavona weaqina nuadi voqana qiduana. 'Inega tomatou edi veqae 'inega valena yawala dadana di'we ludia bwanaganavo 'idia. ⁶⁶ Ta tomeqabu vale ba'e inoqolia nuadi ivetonovea, 'inega taudiega ivetala'aiedi ivonaya, "Tola'ai nawale na'ifoqe ba'e gwama~nana 'inaya ta ma'oda naviaqa 'aiqa?" Mana i'itea Yaubada ena waiwai 'inaya 'eno'eno.

Sakalaia ena simana

⁶⁷ Ta Ioni tamana Sakalaia Niboana Gwalagwalana luveagatuna'ia 'inega simana 'ifoqe vonaya,

⁶⁸ ^r "Kaiwabu kana awatuboi,
tauna me Isileli eda Yaubada,
mana ni'au vayahusida
be toa vita 'inega li'amida.

⁶⁹ ^s 'Inega Yaubada ena tofewa
tubuda Deibida ena gadeyega
ada To'etoyavua
ve'ifoqeyea 'idaya,
ta tauna Tovewaiwai va'ine.

⁷⁰ Yaubada ena vona diavona ba'e
lova tovesimasimana nugwenugweidi
imaduvonayedi,

⁷¹ ^t vonigo na'etoyavuida
ada aviaayo
ta wese ada tonogayavo 'idiega.

⁷² ^u Ta wese lova vona fofofola
be vonigo tubudavo
nanuakolokoloyedi
ta ena vona fofofola gwalagwalana
ge nanuafania.

⁷³ ^v Ta ba'e vona fofofola~nana Yaubada
tubuda Ebelamo neia,

⁷⁴ be vonigo nayavuida
ada aviaayo 'idiega
be yaqisa me eda giwalifatu
kana fewa weaqina.

⁷⁵ ^w Ta tuta qabuna eda ilivu aqiaqina
ta tunutunuqina Yaubada matanaya.

^r 1:68 Same 72:18 ^s 1:69 Same 18:2 ^t 1:71 Same 106:10 ^u 1:72 Nug 17:7; Same 105:8-9

^v 1:73 Nug 22:16-17 ^w 1:75 Tai 2:12-14

76 ^x Ta o'a natugu,
ina gabeu Yaubada Toatoa Vanena
ena tovesimasimana,
mana o'a nawale una nugweta
be eda Kaiwabu ena 'eda
una 'iva'ava'aia.

77 ^y Ta wese ena tomotauyavo
una vematamagilafuyedi
be edi ilivu luveifana nanuataqodi,
'inega adi fata 'etoyavua ina lobeas.

78 ^z Yaubada ena ilivu nuvana
be wese Tonuakolokolo,
'inega 'etoyavua ana simatala
nayayaqa 'idaya.

79 'Inega tomeqabu
velovelovana be wese 'aliga
ena di'wea itoatoa
naguvesimatalidi,
be 'inega qabuda navanugweteda
toadaumwala ana 'eda 'inaya."

80 Ta gwama~nana veqidua ta niboanina wese vewaiwai. 'Inega ana
'aidega di'we tomotau geqana 'inaya tauya toatoa be ana laba 'ifoqe me
Isileli 'idia.

Iesu ena vi'oi
(Madiu 1:18-25)

2 ¹Ta Ioni ena tuta gwama 'inaya me Loma edi toluvine qiduana Sisa
Ogosito toatoa, ta ena luvine a'uya vonigo ena 'ebeluvine gamonaya
'abaga 'aidega 'aidega ana tomotauyavo adi wawayavo ina 'wayavidi.

²Lova ge taha luvine ba'e 'edewani da'ifoqe tomotau adi wawa weaqina,
ta 'esi tuta~nana gavana Kuliniasi di'we Silia luluvinea ba'e luvine~nana
'ifoqe. ³'Inega tomotau qabudi itauya aha tamadia adi wawa sabi
'wayavidi. ⁴Ta wese Iosefa 'abaga Nasaleta di'we Galili 'inega tutuvila
tauya taha 'abaga ana wawa Bedeliema 'inaya di'we Iudia gamonaya,
mana Bedeliema kini Deibida ana tuvada, ta Iosefa tauna Deibida ena
gade 'inega.

⁵'Inega ana gabuinoqa Meli maega itauya 'abaga~nana 'inaya be
adi wawa ina 'wayavidi, ta Meli~nana ma gamona. ⁶Ta tuta~nana
Bedeliema 'inaya i'ifoqe 'inega edi 'ebetoe isalisalia, mana Meli ena
wai'ena ni'a lobeas, be tuta goyona nauweta. Ta wagawaga edi vanue ni'a

^x 1:76 Ais 40:3 ^y 1:77 Iel 31:34 ^z 1:78 Ais 60:1-2

iluveagatuna'ia, 'inega yubai edi vanue 'inaya itoatoa. ⁷Ta omo'e 'inaya Meli ena 'unutau me'olotona venatunea. 'Inega gwama~nana kalekoyega i'afwalia, ta yubai edi 'ebe'ai 'inaya ive'enovia.

Sifi adi to'itamakiavo itauya Iesu sabi 'itana

⁸Ta di'we~nana 'inaya sifi adi to'itamakiavo itoatoa mahala ta edi sifiavo i'ita'itamakidi. ⁹Inega Kaiwabu ena tovale'ewa taha 'ifoqe luveafedi ta Kaiwabu ena simatala waiwaina guyayaidi 'inega qabudi imwaniniva. ¹⁰Inega tovale'ewa~nana vonedi vonaya, "Ge ona mwaniniva, ta 'esi ona qaiawa qiduana mana vale aqiaqina yamiea 'imia, ta nawale tomotau qabudi wese edi 'ebeqaiawa. ¹¹Ta vale~nana ba'e 'idewana, ba'e 'itaga velovelovana 'inaya Deibida ena 'abagaya ami To'etoyavua ni'au vi'oi. Tauna eda Kaiwabu Keliso. ¹²Inega ana 'ebealamani ba'e 'idewani, gwama~nana kalekoyega i'afwalia ta yubai edi 'ebe'ai 'inaya ive'enovia ona 'itea 'eno'eno. E bena'e tauna gwama~nana."

¹³Ta tuta~nana 'inaya wese tovale'ewa qabudi i'ifoqe ta Yaubada iawahawatuboya, ¹⁴^a ivonaya,

"Yaubada mahalaya kana awatuboya

ta tomeqabu bwa'obwa'oya ena nuakolokolo 'idia 'eno'eno
e taudi todaumwala ina lobe."

¹⁵Ta ni'au tovale'ewa~dina i'evivi ivane mahalaya, 'inega sifi adi to'itamakiavo taudiega ivonaya, "Emavo, kana tauya Bedeliema 'inaya be yani~nana Kaiwabu ni'a voneda kana 'itea."

¹⁶Inega ilukwayavoni itauya, ta Meli be Iosefa ilobedi, ta wese gwama~nana yubai edi 'ebe'ai 'inaya i'itea. ¹⁷I'itea ta 'abibodanaya tola'ai ni'a inoqolia gwama~nana weaqina isimana 'ifoqeyea tomotau 'idia. ¹⁸Ta tomeqabu vale ba'e inoqolia nuadi voqana sifi adi to'itamakiavo edi vona weaqina. ¹⁹^b Ta Meli ba'e vona diavona giwalidia ia'uuya, ta weaqidi nuadi tonovea.

²⁰Inega sifi adi to'itamakiavo i'evivi itauya ta Yaubada iawatuboya ta ana wawa igivaneyea, mana tovale'ewa~nana ena vona 'idia ni'a inoqolia vonahaqiaqi, ta wese ana aqiaqi ni'au i'itea.

²¹^c Ta 'aubena 'eita (8) 'abibodanaya gwama~nana 'wafina ida'ea ta igabea Iesu, tauna wawa~nana lova Yaubada ena tovale'ewa taha Meli neidi tutana nawale ge ida valagata.

Iesu i'ebe'ewea itauya Vanue Gwalagwalana 'inaya

²²⁻²⁴^d Iesu ena vi'oi 'aubena 40 'abibodanaya Meli igivevunavunaqidi Mosese ena luvine 'inega. Gumwala 'inega Iosefa ma moqanena itauya

^a 2:14 Lk 19:38 ^b 2:19 Lk 2:51 ^c 2:21 Lk 1:31 ^d 2:22-24 Luvi 12:1-8; 'Ifo 13:2,12; Luvi 12:8

Ielusalema ta edi guba ina a'uya Yaubada 'inaya 'idewana lova ena luvine a'uya vonaya, “Malasi magilafudi nage bunebune kekeyavaudi magilafudi ona vegubayedi.” Ta wese ba'e tuta~nana 'inaya gwama Iesu ina ve'ineiea Kaiwabu 'inaya, mana lova taha wese luvine Mosese 'inega a'uya vonaya, “Gogama 'unutaudi me'olotodi 'aidega 'aidega ona awafeledi Kaiwabu 'inaya.”

Simioni ena awatubo be ena simana

²⁵ Ta omo'e 'aubena~nana Ielusalema 'inaya taha 'oloto ana wawa Simioni toatoa. Yaubada Simioni~nana ni'a 'awatunutuquea, ta 'oloto~nana Yaubada 'amayabea qiduana. Ta me ena bibitaqo ba'eba'e me Isileli adi To'etoyavua weaqina. Ta 'oloto~nana Niboana Gwalagwalana ni'a luveagatuna'ia, ²⁶ ta tawa ve'itea be ge na'aliga ana laba To'etoyavua Kaiwabu na'ita nugwetea.

²⁷ Ta Iosefa be Meli gwama Iesu ni'au imiea Vanue Gwalagwalana 'inaya be natudi weaqina ina viaqia tola'ai 'edewana me Diu adi luvine 'eno'eno. 'Inega Niboana Gwalagwalana Simioni venuaha'uya 'inega lugu Vanue Gwalagwalana 'inaya. ²⁸ 'Inega Simioni gwama~nana 'avalei ta Yaubada awatuboya vonaya,

²⁹ “Kaiwabu, eu vona fofofola 'iguya
ni'au yalobe,

'inega tuta ba'e 'inaya
una awafelegu

be me egu qaiawa ena 'aliga,

³⁰ ^e mana ni'a taugu mataguyega
To'etoyavua ya'itea.

³¹ Ba'e tauna u'iva'ava'aia
ta ni'au ua'u'ifoqeyea qabuma 'iawamaya.

³² ^f Tauna taudi ge me Diu
adi togivesimatala
'inega ina alamania o'a togama,
ta wese ima'a eu tomotauyavo
me Isileli ina awatuboma
mana To'etoyavua~nana 'imega 'ifoqe.”

³³ Ta Iesu tamana be inana nuadi voqana Simioni ena vonayavo natudi weaqina. ³⁴ ^g 'Inega Simioni vona veyolubedi ta 'abiboda Meli vonedi vonaya, “Ona 'itea, ba'e gwama~nana Yaubada venua'ivinea be 'inega me Isileli vaina nagivebe'uyedi, ta wese vaina edi vetumaqana 'inega Yaubada ena veyoluba ina lobe. Ta Yaubada gwama~nana ni'a

^e 2:30 Ais 52:10; Lk 3:6; Tai 2:11 ^f 2:32 Ais 42:6; 49:6; 52:10 ^g 2:34 Ais 8:14; Md 21:42;
1Fit 2:8

vetunea mai 'idaya nave'ebe'ita ena nuanua weaqina, ta tomotau ge ina 'awahaqiaqiei. ³⁵'Inega tauna edi nuanua 'wai'waividi nagive'ifoqeyedi. Ta omi'a Meli nawale emi nuavita kavonaya gita na'idawemi."

Ana edi lukaiwa

³⁶Omo'e 'inaya taha tovesimasimana mevavinedi itoatoa adi wawa Ana. Ta taudi Fanuela natuna, Aseli ena gadeyega. Ta vavine~dina ni'au ivekofekofe, mana lova ivaqi ta moqanedi maega itoa ya'wala seveni 'idewana. ³⁷Ta moqanedi ni'au 'aliga, 'inega ivewadawada'e itoatoa ta ya'wala 84 ni'a ilobea. Ta vavine~dina Vanue Gwalagwalana ge ida nokea, ta Yaubada i'amayabea ta iawahawatuboya 'aubena be wese velovelovana qabuna 'idia, ta ivevedede Yaubada weaqina. ³⁸Simioni ena vona ni'a lu'ovoia, e 'inega vavine~dina imai Meli be Iosefa 'idia ta ilukaiwa Yaubada 'inaya. Ta tomeqabu iba'eba'e Ielusalema ana 'etoyavua weaqina isimana 'idia ivonaya, "Ada To'etoyavua ba'e ni'a mai!"

Edi 'evivi Nasaleta 'inaya

³⁹^h Ba'e 'idewana Yaubada ena luvine 'inega yani qabuna ni'au iviaqidi. 'Inega i'evivi di'we Galili 'inaya mana taudi me Nasaleta. ⁴⁰'Inega gwama~nana veago me ena waiwai ta wese me ena alamani, ta Yaubada ena veyoluba qiduana gwama~nana 'inaya 'eno'eno.

Gwama Ieisu tove'itayavo maega iveqae

⁴¹ⁱ Ya'wala 'aidega 'aidega 'idia Ieisu inana be tamana i'wato'watovu Ielusalema 'inaya 'Auvivia Sagalina weaqina. ⁴²Ta tutana Ieisu ana ya'wala tuwelo lobe, 'inega maega i'watovu sagali~nana weaqina, mana edi ilivu 'edewana.

⁴³'Auvivia Sagalina ana tuta ni'a gumwala, e 'inega Meli be Iosefa i'evivi itautauya edi 'abaga weaqina. Ta Ieisu tamana be inana ge ida alamania gwama~nana nawale Ielusalema 'inaya toatoa, ⁴⁴ta ivonaya be tauna yo'o maega ida tautauya. 'Inega itauya ana laba velovanea, 'inega Ieisu isalia edi qabuyavo ta wese ediavo 'idia. ⁴⁵Ta gwama~nana ge ida lobei, 'inega mahala vulihia i'evivi itauya Ielusalema 'inaya sabi salina.

⁴⁶Isalisalia, ta 'aubena vetoina 'inaya ilobea Vanue Gwalagwalana 'atamaninaya, ta me Diu edi tove'itayavo maega itoatoa ta vivineneqedi be wese vevetala'aiedi. ⁴⁷Ta tomeqabu ena vona aqiaqidi ta tunutunuqidi inoqolia inuavoqana aqiaqi, mana ena alamani qiduana. Ta tove'ita diavona yani qabuna weaqina ivetala'aiea, ta edi vetala'ai qabuna ana fata ve'iedi.

⁴⁸Ta wese tutana tamana be inana i'itea nuadi voqana e 'inega inana ivoneaya, "Natugu, tola'ai weaqina ba'e 'idewani uviaviaqi 'imaya, 'inega me ema nuavita tamau maega asalisaliu?"

^h 2:39 Md 2:23 ⁱ 2:41 'Ifo 12:24-27; 23:14-17; Luve 16:1-8

49^j Inega leisu vonedia, “Tola’ai weaqina osalisaligu? Nage ge oda alamania ya’a luaqiaqiegu be Tamagu ena vanuea ena toatoa?” 50^a Ta tamana be inana ge nuadi da’eqa’ui ena vona weaqina.

51^j Inega maega i’evivi Nasaleta inaya ta edi vona vemamatamatayagedi. Ta yani qabuna ni’a ifoqe natudi inaya ia’uya giwalidia ta nuadi tonovea.

52^k Ta leisu ve’ena’i ta wese ena alamani veqidua, inega Yaubada qaiawa weaqina, ta tomotau i’awahaqiaqiea ta wese edewani iqaiawa.

Ioni Togivebabitaiso ena lugaihi

(Madiu 3:1-12; Maki 1:1-8; Ioni 1:19-28)

3 1^l Toluvine qiduana Sisa Taibilia me Loma edi ebeluvine ni’a luluvinea ya’wala 15 inaya, ta ayanaya Fonitio Failato di’we Iudia ana gavana, ta Elodi Anitifasi di’we Galili ana toluvine, ta tuana Filifi di’we Itulia be Tilakonitia adi toluvine, ta Lisania di’we Abileni ana toluvine. 2^l Ta ba’e toluvine diavona edi tuta luvine inaya toveguba qiduquduadi Anasa be Kaiafa wese itoatoa, ta edi tuta inaya Yaubada ena vona mai Sakalaia natuna Ioni inaya tuta~nana di’we tomotau gegana inaya toatoa. 3^l Inega Ioni tavolo tauya go’ila Iolidani di’wenavo idia inega tomotau qabudi lugaihi idia vonaya, “Emi ilivu luveifana idiega ona nuagivila ta ena givebabitaisomi be inega Yaubada emi luveifana nanuataqodi.”

4^m Idewani Buki Nugwenugweina inaya tovesimasimana Aisea simana ifoqeyea vonaya,

“Tovegabagaba taha di’we ava’avaya
bonana qiduana inega vonaya,
Kaiwabu ena eda ona qadalia
ta ona givetuvetunuqia.

5ⁿ Ta bwanaga qabudi
ona aledi be ina vedumi’a,
ta awagou qabudi ona yamunidi,
ta wese eda komwakomwadi
ona givetunutunuqidi
ta wese eda awa’awagoudi
ona luvuyovuyoidi.

6ⁿ Ta inega tomotau qabudi
Yaubada ena etoyavua ina itea.”

7ⁿ Inega tomotau qabudi itauya Ioni inaya sabi babitaiso ta Ioni~nana vonedi vonaya, “Omi’a tou’ava idewana mwata natunavo! Ta onuaia vonigo nawale Yaubada ena gamohoqala inega ona dena, waisa? Ta

^j 2:51 Lk 2:19 ^k 2:52 1Sam 2:26; Vos 3:4 ^l 3:3 Via 13:24 ^m 3:4-6 Ais 40:3-5

ⁿ 3:7 Md 12:34; 23:33

togama vonemi? ^{8 o} 'Inega luaqiaqiemi be emi nuagivila aqiaqi ona ve'itayea emi ilivu aqiaqidi 'idiega, ta ge ona vonaya, 'Ima'a Ebelamo 'aqegiginavo 'inega Yaubada nanuakolokoloyema.' Gebu otaqa! Yavona aqiaqiemi, Yaubada ana fata ami luseana dabo ba'e 'idiega Ebelamo 'aqegiginavo na'iva'ava'aidi. ^{9 p} Ta 'eguma emi ilivu ge aqiaqidi nawale Yaubada naluvematasabumi 'idewani 'aiwe 'eguma ge navuaqa aqiaqi nawale tomtau ina talaqa yavulei be 'aiwe 'ala'alata 'inaya ina felei na'alaia."

¹⁰ 'Inega qabudi Ioni ivetala'aiea ivonaya, "Isana ma'oda ana viaqa 'aiqa?"

¹¹ Ta Ioni vonedi vonaya, "Eguma toga o'a au kaleko magilafudi ta iau ge ana kalekomo, e 'inega taha una neia. Ta wese 'idewani 'eguma toga au 'abwaga 'eala e 'inega dibuna iau una neia."

^{12 q} Ta wese vaina takesi ana to'ewayavo imai sabi babitaiso, ta 'inega Ioni 'inaya wese ivetala'aiea ivonaya, "Tove'ita, ima'a ma'oda ama luvine?"

¹³ 'Inega Ioni vonedia, "Takesi ana luvineyega mane ona 'eweia tomtau 'idiega, ta ge taumiega luvetomana ona a'ui be ona 'ewe'ewei."

¹⁴ Ta wese vaina toluavia ivevetala'aiea ivonaya, "Ta ima'a ma'oda ama luvine?"

'Inega Ioni vonedi vonaya, "Omi'a ami ve'ia ni'au ami fata ta weaqidi ona qaiawa. Ta ge u'vega be givemwaninivega ana luvetomana ona 'ewe'ewei."

¹⁵ Ta tomtau me edi vetumaqana lova 'inega iba'eba'e To'etoyavua Keliso ena mai weaqina. Ta Ioni i'itea 'inega qabudi ivenuana magilafu ta ivonaya, "Nage tauna To'etoyavua~nana nage gebu?"

^{16 r} 'Inega Ioni vonedi vonaya, "Ya'a go'ilega ena givebabitaisomi ta taha 'oloto 'abibodaguyega maimai be Niboana Gwalagwalana ta wese 'aiwe 'ala'alata 'inega nagivebabitaisomi. Tauna qidua va'inena, 'inega ge daluaqiaqiegu be ana 'aqeyafayafa ena giyavui. ¹⁷ Ta 'oloto ba'e ena daimayega witi nagivutuqidi be vuaqina nahavuta 'aideganaya 'inega 'abiboda vuaqina aqiaqidi navedododi ena sailakaya, ta qainina 'aiwe 'ala'alata vatayana 'inaya na'alaidi."

¹⁸ Ta wese vona qabuna 'inega Ioni tomtau qabudi vebibinedi ta wese vale aqiaqina lugaihiea 'idia. ^{19 s} Ta wese Ioni kini Elodi lugwaeyea, mana tauna tuana moqanena adi wawa Elodiasa vaqidi. Ta wese vaina ena ilivu luveifana weaqina lugwaeyea. ²⁰ 'Inega Elodi diana vilei ta Ioni vanue 'ebeyoqona 'inaya a'uluguyea. Vonahaqiaqi, Elodi ilivu luveifana qabudi ni'a viaqidi, ta ba'e yani~nana 'inega Elodi wese taha luveifana viaqia.

^o 3:8 Ion 8:33,39 ^p 3:9 Md 7:19 ^q 3:12 Lk 7:29 ^r 3:16 Via 13:25 ^s 3:19 Md 14:3-4; Mk 6:17-18

Ioni Ieisu givebabitaisoya
(Madiu 3:13-17; Maki 1:9-11)

²¹ Ioni tomotau qabudi nawale gigebabitaisodi, 'inega wese Ieisu givebabitaisoya. Ta yani ba'e nugweta 'ifoqe ta 'abibodanaya Elodi Ioni a'uluguyea vanue 'ebeyoqona 'inaya. Ta tuta~nana Ieisu Yaubada 'inaya vevenoqi 'inega mahala 'elalamia, ²² ' ta Niboana Gwalagwalana ana 'ita 'idewani malasi webui mai Ieisu 'inaya. 'Inega taha bona mahalega mai vonaya, "O'a Natu Otaqigu, ta weaqiu yaqaiqaiawa qidwana ta yaveveyolubeu."

Ieisu 'aqegiginavo weaqidi
(Madiu 1:1-17)

²³ ^u Ieisu ana ya'wala 30 'idewani ni'a lobe, 'inega ana veyoveyoya tomotau 'idia ve'ale viaqidi. Ta tomotau i'inanea vonigo tauna tamana Iosefa,

- ta Iosefa tamana Eli,
- ²⁴ ta Eli tamana Matadi,
- ta Matadi tamana Libai,
- ta Libai tamana Meliki,
- ta Meliki tamana Ianai,
- ta Ianai tamana Iosefa,
- ²⁵ ta Iosefa tamana Matadaya,
- ta Matadaya tamana Emosi,
- ta Emosi tamana Neumi,
- ta Neumi tamana Esili,
- ta Esili tamana Nagai,
- ²⁶ ta Nagai tamana Mati,
- ta Mati tamana Matadaya,
- ta Matadaya tamana Semeni,
- ta Semeni tamana Ioseki,
- ta Ioseki tamana Ioda,
- ²⁷ ta Ioda tamana Ioanai,
- ta Ioanai tamana Lisa,
- ta Lisa tamana Selubabela,
- ta Selubabela tamana Salatieli,
- ta Salatieli tamana Neli,
- ²⁸ ta Neli tamana Meliki,
- ta Meliki tamana Adi,
- ta Adi tamana Kosami,

^u 3:22 Ion 1:32 ^u 3:23 Lk 4:22; Ion 6:42

- ta Kosami tamana Elimadami,
 ta Elimadami tamana Eli,
 29 ta Eli tamana Iosua,
 ta Iosua tamana Eliesa,
 ta Eliesa tamana Iolima,
 ta Iolima tamana Matadi,
 ta Matadi tamana Libai,
 30 ta Libai tamana Simioni,
 ta Simioni tamana Iuda,
 ta Iuda tamana Iosefa,
 ta Iosefa tamana Ionami,
 ta Ionami tamana Eliakimi,
 31 ta Eliakimi tamana Melea,
 ta Melea tamana Mena,
 ta Mena tamana Matata,
 ta Matata tamana Nedani,
 ta Nedani tamana Deibida,
 32 ^v ta Deibida tamana Iese,
 ta Iese tamana Obedi,
 ta Obedi tamana Boasa,
 ta Boasa tamana Salimoni,
 ta Salimoni tamana Nasoni,
 33 ta Nasoni tamana Aminadaba,
 ta Aminadaba tamana Adamina,
 ta Adamina tamana Ani,
 ta Ani tamana Esiloni,
 ta Esiloni tamana Felesi,
 ta Felesi tamana Iuda,
 34 ta Iuda tamana Iakobo,
 ta Iakobo tamana Aisake,
 ta Aisake tamana Ebelamo,
 ta Ebelamo tamana Tila,
 ta Tila tamana Naoli,
 35 ta Naoli tamana Selugi,
 ta Selugi tamana Leu,
 ta Leu tamana Felegi,
 ta Felegi tamana Ibeli,
 ta Ibeli tamana Sila,
 36 ^w ta Sila tamana Kenani
 ta Kenani tamana Afakisadi,

^v 3:32 Lud 4:17-22 ^w 3:36 Nug 11:10-26

ta Afakisadi tamana Semi,
 ta Semi tamana Noa,
 ta Noa tamana Lemeki
 37 ta Lemeki tamana Metusela,
 ta Metusela tamana Inoki,
 ta Inoki tamana Ieledi,
 ta Ieledi tamana Malaleli,
 ta Malaleli tamana Kenani,
 38 x ta Kenani tamana Inosi,
 ta Inosi tamana Seti,
 ta Seti tamana Adama,
 ta Adama tamana Yaubada.

Seitani Iesu sitonovia
(Madiu 4:1-11; Maki 1:12-13)

4 ¹Niboana Gwalagwalana Iesu ni'a luveagatuna'ia, 'inega Iolidaniega 'ebe'ewea tauyea di'we 'ava'avaya. ²'Inega 'aubena be velovelovana 40 'idia Seitani Iesu sitonovia vonigo Iesu dagivebe'uyea. Ta 'aubena diavona 'idia Iesu ge da'ai'ai, 'inega botana qiduana lutonovia.

³Ta Seitani Iesu voneaya, "Eguma o'a Yaubada Natuna dabo ba'ena una vonei nave'abwaga."

⁴y 'Inega Iesu vona 'eviviea vonaya, "Gebu, mana Buki Nugwenugweina 'inaya taha vona 'eno'eno vonaya, 'Tomotau yawaidi gebu 'abwaganamo 'inega ina lobei.' "

⁵'Inega Seitani Iesu 'ebe'ewei i'watovu taha bwanaga qiduana debanaya ta omo'e 'inaya bwa'obwa'o ena di'we qabudi lukwayavonega ve'itea ta voneaya, ⁶⁻⁷"Ba'e di'we diavona adi 'ita aqiaqi otaqidi ena neu 'eguma 'iguya una iwa'odu, mana qabuna egu 'ebeluvine, ta 'eguma toga nuanuagu ena neia, e ana fata ena neia."

⁸z Ta Iesu vona 'eviviea vonaya, "Gebu, mana Buki Nugwenugweina gamonaya luvine 'eno'eno vonaya, 'Eu Kaiwabu Yaubada ana 'aidega 'inaya una iwa'odu, ta wese una vetofewa 'inaya.' "

⁹'Inega Seitani wese Iesu 'ebe'ewei tauyea Ielusalema 'inaya, ta Vanue Gwalagwalana deba otaqinaya vaneqea ta voneaya, "Eguma o'a Yaubada Natuna, ba'e 'inega una fifieu una webui ta ge una veilage. ¹⁰a Mana Buki Nugwenugweina simana vonaya,

'Yaubada ena tovale'ewayavo
 naluvinedi ina 'itamakui.

¹¹ Ta wese ena tovale'ewayavo
 ina 'alagamoii 'inega 'aqeu

x 3:38 Nug 4:25-26 y 4:4 Luve 8:3 z 4:8 Luve 6:13-14 a 4:10-11 Same 91:11-12

gebu navelubai daboya.’ ”

^{12 b} Ta Ieisu ve'iea vonaya, “Buki Nugwenugweina vonaya, ‘Eu Kaiwabu Yaubada ge una sitonovi!’ ”

^{13 c} Tutana Seitani ena sitonova qabuna Ieisu 'inaya lu'ovoia, 'inega nogei ta tauya, ta mali tuta 'inaya wese na'evivi namai.

Ieisu ena viaqa di'we Galili 'inaya ve'ale

(Madiu 4:12-17; Maki 1:14-15)

¹⁴ 'Inega Ieisu Niboana Gwalagwalana ena waiwaiega 'evivi tauya di'we Galili 'inaya, ta omo'e 'inaya valena yawala 'abaga taha taha 'idia.

¹⁵ 'Inega me Galili edi vanue tafwalolo 'idia ve'ita, ta tomotau qabudi iawatuboya.

Me Nasaleta Ieisu inogea

(Madiu 13:53-58; Maki 6:1-6)

¹⁶ Ta 'abiboda mai Nasaleta 'inaya, omo'e 'abaga~nana 'inaya lova vekilakai. 'Inega Sabatea lugu vanue tafwaloloya, mana tauna ena ilivu 'idewani. 'Inega ya'itoto Buki Nugwenugweina sabi avona. ¹⁷ 'Inega tovesimasimana Aisea ena 'wayavi ineia, 'abo tanaia ta 'wayavi~nana lobe a vonaya,

^{18 d} “Kaiwabu Niboanina 'iguya toatoa,
mana tauna venua'ivinegu
be luvetunegu yamai
vale aqiaqina sabi simanina lukwalukwa 'idia.

Ta yoqoyoqonidi wese vetunegu 'idia,
adi 'etoyavua weaqina sabi simanina.

Ta wese vetunegu matadi kwayakwayana
'idia sabi giveaqiaqidi.

Ta wese luvetunegu
totoa vita 'idia sabi 'etoyavuidi
adi aviayavo nimadiega,

¹⁹ ta wese yamai
Kaiwabu ena nuakolokolo sabi simanina 'imia
vonigo ana tuta ni'a 'ifoqe.”

²⁰ Ta Ieisu ni'a 'wayavi diavona avo 'ovoidi 'abo nunumia, 'inega buki ana to'itamaki nei 'eviviei ta toabui. Ta tovineneqa qabudi nuadi 'ewea ta ivekova makimakia, ²¹ 'inega vonedi vonaya, “Vona ba'e yahavoavodi lova imadu'wayavia ni'au onoqolia, ta ba'e 'itagana ana aqiaqi ni'a 'ifoqe 'imia.”

^b 4:12 Luve 6:16; 1Kol 10:9 ^c 4:13 Ibe 2:18; 4:15 ^d 4:18-19 Ais 61:1-2; 58:6

^{22 e} 'Inega tomotau qabudi Ieisu i'awahaqiaqiea ta nuadi voqana qidwana ena vona aqiaqidi weaqina ta ivonaya, "Oloto ba'e Iosefa natuna waisa, 'inega ma'oda ba'e yanidiavo ana fata?"

²³ 'Inega Ieisu vonedi vonaya, "Ni'a yahalamanimi nawale vona sesebai ba'e 'inega ona voneguya, 'O'a tovevhiqa adi togiveaqiaqi, 'inega tau'u una giveaqiaqieu!' Ta wese ona voneguya, 'Viaqa waiwaidi 'abaga Kafaneumi 'inaya uviaqidi, 'inega 'idewana wese ba'idia eu 'abagaya una viaqidi.' "

^{24 f} Ta Ieisu wese vonedi vonaya, "Yavona aqiaqiem, tovesimasimana taha ena 'abaga ana totoayavo 'idiega ge taha 'awahaqiaqi dalobea. ^{25 s} Ta ona nuave'avinia lova Yaubada gebu Ilaitia davetunei taha Isileli vavinena 'inaya tutana kulaka qidwana 'ifoqe ta ya'wala toi ta wai'ena sikisi gamonaya ge taha 'wei dawebui. ^{26 h} Ta 'esi taha wada'e 'abaga Salefati 'inaya di'we Saidoni gamonaya Yaubada Ilaitia vetunei sabi 'itamakidi. ^{27 i} Ta wese tovesimasimana Ilaisa' ena tutaya tomotau qabudi 'wago'wagoidi Isileli 'inaya itoatoa. Ta gebu taha toga 'idiega daveaqiaqi, ta ana 'aidega Silia 'olotona Yaubada giveaqiaqiea, ana wawa Nemani^k. Mana Yaubada wese taudi ge me Diu nuakolokoloyedi."

²⁸ Ieisu ena vonayavo ba'e 'idiega totafwalolo qabudi diadi vevilea. ²⁹ 'Inega itovolo 'abo Ieisu ikafia ta 'abagea ilih i'foqeyea itauyeya edi 'abaga ana bwanaga 'inaya, 'abo bwanaga debanaya ivetovoloji ta vonigo ida 'auefalei dabega dabe'u. ³⁰ Ta tauna qabu diavona wanaidi ta nuanidiega tauya.

Ieisu taha 'oloto giveaqiaqiea niboana veifana 'inega (Maki 1:21-28)

³¹ 'Inega 'abiboda webui 'abaga Kafaneumi 'inaya di'we Galili gamonaya, ta Sabatea ve'ale tomotau ve'itedi. ^{32 l} Ta tomotau qabudi nuadi voqana ena ve'ita weaqina, mana me ena luvine ta wese me ena waiwai veve'itedi.

³³ Ta vanue tafwalolo 'inaya taha 'oloto toatoa niboana luveifana ni'a 'wahalia, ta bonana qiduanega gaba vonaya, ³⁴ "Ei Ieisu, o'a Nasaleta 'olotona, ta tola'ai weaqina umai 'imaya? Nage nuanuau una giveluveifema, waisa? Ni'a yahalamaniu, o'a Yaubada Natuna Gwalagwalana."

³⁵ Ta Ieisu luvinea vonaya, "Ulua'u, ta 'oloto bena'e 'inega uwebui mai!" 'Inega qabu matadia niboana luveifana 'oloto~nana 'abifelei be'u

^e 4:22 Lk 3:23; Ion 6:42 ^f 4:24 Ion 4:44 ^s 4:25 1Kin 17:1,7 ^h 4:26 1Kin 17:8-16
ⁱ 4:27 2Kin 5:1-14 ^j 4:27 Ilaisa "Elisah" - tauna Yaubada ena tovesimasimana di'we Isileli gamonaya. (1Kin 19:16-21, 2Kin 2:1-25) ^k 4:27 Nemani "Naaman" - tauna di'we Silia 'olotona ta toluavia adi tovatatana ta 'wafina 'wago'wagoina. ^l 4:32 Md 7:28-29

bwa'obwa'oya, ta 'inega niboana~nana 'ifoqe mai, ta 'oloto~nana ge daveilaqe.

³⁶Inega qabudi yo'alidi 'abo taudiega ivetala'aiedi ivonaya, "Ma'oda 'idewani ve'ita ba'e? Tauna me ena luvine ta wese me ena waiwai, 'inega ena vonega niboana luveifadi luvinedi i'ifoqe." ³⁷Inega Iesu Valena yawala dadana Galili di'wenavo 'idia.

Iesu tovevhiqa qabudi giveaiaqiedi

(Madiu 8:14-17; Maki 1:29-34)

³⁸Inega Iesu vanue tafwalolo 'inega webui tauya Saimoni ena vanuea ta lugu. Ta Saimoni lawana ivevhiqa 'wafidi lu'wea'weava. 'Inega Iesu inoqiea sabi iuladi. ³⁹Inega Iesu lugu ta tunuwebui tovevhiqa~dina 'idia ta vihiqa~nana luvinea. 'Inega 'wafidi ena lu'wea'weava awala. Ta lukwayavonega itovolo 'abo adi 'abwaga i'iva'ava'aia.

⁴⁰Tutana baba'au ni'a lia'unuva 'inega tomotau edi tovevhiqayavo adi vihiqa taha taha i'ebe'ewedi imiedi Iesu 'inaya. Ta Iesu tovevhiqa 'aidega 'aidega nimanega gitonovidi 'abo iveaiaqi. ^{41m} Ta wese tomotau qabudi 'idiega niboana luveifadi i'ifoqe ta ivegabagaba ivonaya, "O'a Yaubada Natuna!"

'Inega Iesu awatayed i ge 'edewani ina vona 'aiqa, mana ni'a ialamania tauna To'etoyavua~nana Yaubada 'inega.

Iesu lugaihi 'abaga taha taha 'idia

(Maki 1:35-39)

⁴²Ta ni'a mahala vulihia 'inega Iesu 'abaga~nana nogei ta tauya di'we tomotau geqana 'inaya. Ta tomotau qabudi Iesu isalia, ta tutana ilobea ivonea ivonaya, "Gebu una nogema ta o'a maega kana toatoa."

⁴³Inega Iesu vonedi vonaya, "Vaina wese 'abaga 'idia ena tauya be Yaubada ena 'Ebeluvine valena ena lugaihiea, mana tauna weaqina Yaubada vetunegu yamai."

⁴⁴ⁿ 'Inega tutuvila tauya Iudia 'abaganavo qabudi 'idia, ta edi vanue tafwaloloyavo gamodia lugaihi dadana.

Iesu ana to'abibodayavo gabedi

(Madiu 4:18-22; Maki 1:16-20)

5 ^{1o} Taha tuta 'inaya Iesu tovtovolo lavu Genasaleta nanavinaya ta yo'o qabudi imai itoa vivilia ta Yaubada ena vona ivivineneqea. ²Inega Iesu waga magilafudi 'itedi balabalaya mana togomana ni'a ivawebui ta edi gomana i'utu'utudi. ³Inega Iesu taha waga geluya, ta toniwaga Saimoni vonei natalateteyea goyona balebalega. 'Inega Iesu toabui ta tomotau qabudi ve'itedi waga~nana 'inega.

^m 4:41 Md 8:29; Mk 3:11-12 ⁿ 4:44 Md 4:23 ^o 5:1 Md 13:1-2; Mk 3:9-10

⁴Tuta~nana ena ve'ita lu'ovoia 'inega Ieisu Saimoni vonea vonaya, "Una talatete qawanaya eu gomana una bwa'uya ta 'iqana una 'onedi."

⁵^p Ta Saimoni voneaya, "Kaiwabu, velovelovana kuena gamonaya agomana 'wayoqa, ge taha 'iqana ada 'onei! Ta o'a eu vona weaqina gomana ena bwa'u 'eviviedi."

⁶Ibwa'uya 'inega 'iqana 'eala va'inedi i'onedi ta gomana~dina tuta goyona ida abuya. ⁷Inega ediavo edi waga di'wedialu'wayedi ina mai ina iuledi. 'Inega imai ta waga magilafudi iluveagatuna'idi be tuta goyona ida damana. ⁸Ta tutana Saimoni Fita 'iqana adi yau 'itedi, 'inega Ieisu 'aqenaya tuqatuqanega sobadi ta voneaya, "Kaiwabu unogegu, mana ya'a 'oloto luveifagu."

⁹Fita ba'e 'idewana vona 'aiqa mana enavo maega nuadi voqana qiduana 'iqana ni'a i'onedi weaqidi, ¹⁰ta Saimoni Fita enavo Iemesa be Ioni taudi Sebedi natunavo wese inuavoqana. 'Inega Ieisu Fita vonea vonaya, "Ge giwaliu naha'ala, ba'e 'itaga 'inega wese 'idewani tomotau una 'ona 'aiqedi."

¹¹^q 'Inega edi waga ilihi vaneyedi 'awaboqea, ta edi kulufayavo qabudi inogedi ta Ieisu i'abibodea.

Ieisu 'oloto taha 'wago'wagoina giveaiaqiea

(Madiu 8:1-4; Maki 1:40-45)

¹²Ta tutana Ieisu toatoa taha 'abaga 'inaya, 'inega taha 'oloto 'wago'wagoina mai. Ta tuta~nana Ieisu 'itea 'inega givelukabwebwe 'aqenaya ta venoqiea vonaya, "Kaiwabu, 'eguma eu nuanua una giveaiaqiegu, mana o'a au fata!"

¹³Ta Ieisu nimana si'otoia ta 'oloto~nana 'wafina gitonovia voneaya, "E 'idewani, eu nuanua ena viaqia, uvevunavunaqa ta uveaiaqia!" 'Inega 'oloto~nana ana 'wagota lukwayavonega 'evutuqia. ¹⁴^r 'Inega Ieisu 'oloto~nana vematamagilafuyea voneaya, "Ge taha toga una vonevonei, ta una tauya toveguba 'inaya be una ve'itayeu. Ta 'inega eu guba una a'uya Yaubada 'inaya eu veaiaqi weaqina 'idewana ada luvine Mosese 'inega 'ebe'ita tomotau 'idia. 'Inega ina alamania ni'a uveaiaqi 'evivi."

¹⁵Ta Ieisu Valena veqidua va'ine ta tomotau qabudi imai ena vona sabi noqolina, ta wese nuanuadi adi vihiqayavo nagiveaiaqied. ¹⁶Ta Ieisu vaina tuta tomotau 'idiega tautauya taha di'we tomotau geqana 'inaya ta vevenoqi Yaubada 'inaya.

Ieisu 'oloto belubeluna giveaiaqiea

(Madiu 9:1-8; Maki 2:1-12)

¹⁷Taha 'aubena 'inaya Ieisu qabu veve'itedi. Ta vaina Falisiavo be luvine ana tove'itayavo imai 'abaga Ielusalema 'inega ta wese di'we Galili be

Iudia 'idiega, ta tomotau qabudi maega itoatoa ta ivivineneqa. Ta tutana 'inaya Ieisu tovehihiqa giveaiaqiedi Kaiwabu ena waiwaiega.

¹⁸ Inega vaina tomotau taha 'oloto belubeluna ma 'ivina i'avalei imiea nuanuadi ina luguyea Ieisu 'iawanaya ina a'uya. ¹⁹ Ta ge adi fata mana qabu qidua va'inedi itoatoa, 'inega tovehihiqa~nana i'avalei ivaneqea vanue debanaya, ta ana 'ubu iqeuni ta 'inega ma 'ivina ivekeuli webui tomotau qabudi nuanidia ta Ieisu 'iawanaya ia'uya. ²⁰ Ta Ieisu to'avala~dina edi vetumaqana 'itea, 'inega tovehihiqa~nana voneaya, "Iagu, eu luveifayavo ni'a yanuataqodi."

²¹ Ta luvine ana tove'itayavo be Falisiavo taudiega ivetala'aiedi ivonaya, "Ba'e to'oloto, vonigo taunega ana wawa givaneqea kavona tauna Yaubada 'idewani. Mana Yaubada ana 'aidega otaqa ana fata luveifana nanuataqodi."

²² Edi nuanua Ieisu ni'au alamania 'inega vonedi vonaya, "Tola'ai weaqina giwalimiega 'idewani onuanua 'aiqa? ²³ Ta isana ma'oda ena vona 'aiqa 'oloto ba'e 'inaya, nage ena vonaya, 'Eu ilivu luveifana ni'au yanuataqodi', nage ena vonaya, 'Uya'itoto utauya'? ²⁴ Ta nuanuagu ona alamania ya'a Tomotau Natuna me egu luvine waiwaina bwa'obwa'oya, 'inega agu fata tomotau edi ilivu luveifana ena nuataqodi." 'Inega Ieisu belubelu~nana voneaya, "Yavoneu, uya'itoto eu 'ebana u'avalei ta utauya eu 'abagaya."

²⁵ Inega lukwayavonega ya'itoto tomotau qabudi 'iawadia ena 'ebe'eno 'avalei ta tauya ena 'abagaya, ta me ena qaiawa Yaubada awahawatuboya. ²⁶ Ta tomotau qabudi nuadi voqana 'ena'ina ta me edi 'amayaba Yaubada iawatuboya ta ivonaya, "Ba'itagana taha yani 'ebenuavoqana ni'a ka'itea."

Ieisu Libai gabea

(Madiu 9:9-13; Maki 2:13-17)

²⁷ Ta 'abiboda Ieisu vanuega 'ifoqe ta taha takesi ana to'ewa ana wawa Libai 'itea ena 'ebefewa ana vanue 'inaya toatoa, 'inega voneaya, "Umai, u'abibodegu!" ²⁸ Inega Libai ya'itoto ta yani qabuna nogedi 'abo Ieisu 'abibodea.

²⁹ Inega Libai 'abwaga qiduana 'iva'ava'aia ena vanuea Ieisu weaqina. Ta takesi ana to'ewayavo 'eala be wese vaina tomotau maega imai ena vanuea, ta qabudi i'ai. ³⁰ Ta Falisi be wese luvine ana tove'itayavo qabudi maega itoatoa. Taudi Ieisu ana to'abibodayavo ilugwaeyedi ivonedia, "Tola'ai weaqina takesi ana to'ewayavo be wese toluveifadi maega o'ai'ai ta onumanuma?"

³¹ Inega Ieisu edi vona ve'iea vonaya, "Taudi aqiaqidi ge nuanuadi togiveaiaqi, ta 'esi tovehihiqa nuanuadi togiveaiaqi. ³² Ya'a ge eda mai

^s 5:20 Lk 7:48; Ais 43:25 ^t 5:24 Ion 5:8 ^u 5:30 Lk 15:1-2

tunutunuqidi weaqidi, ta 'esi yamai toluveifadi sabi iuladi be yaqisa ina nuagivila.”

Iesu ena vona vedede weaqina

(Madiu 9:14-17; Maki 2:18-22)

³³ 'Inega Iesu ivonea ivonaya, “Ioni ana to'abibodayavo vaina tuta ivevedede ta ivevenoqi Yaubada 'inaya. 'Idewani wese Falisiavo adi to'abibodayavo iviaviaqia. Ta ma'oda 'inega o'a au to'abibodayavo ge ida vedede, ta 'esi i'ai'ai be inumanuma kavokavovo?”

³⁴ 'Inega Iesu vona sesebaiega vona 'eviviedi vonaya, “Ge wese daluaqiaqiea 'eguma vaqi ana qabuyavo ina vedede tuta~nana tovaqi me'olotona maega itoatua, waisa? ³⁵ Ta nawale tuta maimai 'inaya tovaqi~nana ana aviayavo ina kafia ta ina tauyea, 'inega enavo me edi nuavita ina vedede.”

³⁶ Ta wese taha vona sesebai neidi vonedia, “Ge ana fata kaleko vauvauna matavusinega kaleko 'itu'ituwaina kana bwabwadei, mana nawale kaleko~nana kana 'utuya 'inega matavusi vauvaunana nabwagogoma ta kaleko 'itu'ituwaina naeabu 'eviviea, ta wese matavusina vauvaunana naeabu kavovoya. ³⁷ Ta wese ge taha toga 'oine vauvauna naiwaqa ukamanei wage nugwenugweina yubai 'wafidiega 'inaya, mana nawale 'oine vauvauna wage~nana nanabahabuya ta 'inega 'oine~nana naguiwaqa. ³⁸ Ta 'esi luaqiaqiea be 'oine vauvauna kana iwaqia wage vauvauna yubai 'wafidiega gamonaya. ³⁹ Ta wese 'eguma taha toga 'oine nugwenugweina numanuma nawale ge 'oine vauvauna nuanuana ta navonaya, “Oine nugwenugweina ana numa aqiaqi otaqina.”

Iesu ana to'abibodayavo Sabate 'inaya witi walona i'egigoluya

(Madiu 12:1-8; Maki 2:23-28)

6 ^{1w} Sabate taha 'inaya Iesu ana to'abibodayavo maega vaoqa gamonega itautauya. 'Inega ana to'abibodayavo witi walona i'egigoluya ta nimadiege iluquosodi ta i'ainidi. ^{2x} Ta vaina Falisi i'itedi 'inega ivonedia, “Tola'ai weaqina Sabate ana luvine ge oda 'amayabei ta 'esi oqeueuni?”

^{3y} 'Inega Iesu Falisiavo edi vona ve'iea vonaya, “Nage ge oda avoi Buki Nugwenugweina 'inaya Deibida weaqina tutana ma enavo ibotana? ^{4z} 'Inega Yaubada ena vanue 'inaya lugu ta beledi gwalagwalana 'ewei ta 'ainia. Beledi~nana ma ana luvine vonigo toveguba dimo luaqiaqiedi be ida 'ainia. Ta Deibida enavo wese ibotana 'inega neidi maega i'ainia.”

⁵ 'Inega Iesu wese vonedi vonaya, “Ya'a Tomotau Natuna Sabate ana Kaiwabu!”

^v 5:34 Ion 3:29 ^w 6:1 Luve 23:25 ^x 6:2 Ion 5:10 ^y 6:3 1Sam 21:1-6 ^z 6:4 Luvi 24:5-9

Ieisu 'oloto nimana belubeluna giveaiaqiea
(Madiu 12:9-14; Maki 3:1-6)

⁶Wese taha Sabate 'inaya Ieisu lugu vanue tafwalolo 'inaya veve'ita. Ta vanue~nana 'inaya 'oloto taha toatoa nimana ana 'ataqi belubeluna. ⁷Ta vaina luvine ana tove'itayavo be wese Falisiavo Ieisu ivekova makimakia 'eguma 'oloto~nana nagiveaiaqiea Sabate 'inaya. Nuanuadi vonigo taha 'iuna ina lobei be ina ve'ewea. ⁸Ta edi nuanua Ieisu ni'au alamania 'inega 'oloto~nana voneaya, "Uya'itoto umai ta utovolo tomotau 'iawadia!" 'Inega Ieisu ena vona 'abibodea.

⁹'Inega Ieisu Falisi ma ediavo vonedi vonaya, "Ba'e egu vetala'ai 'imia, tola'ai luaqiaqieda Sabate 'inaya kana viaqi, nage yani aqiaqina kana viaqi, nage yani luveifana, nage tomotau kana 'etoyavuidi nage kana giveluveifedi?"

¹⁰'Inega Ieisu tomotau qabudi 'ita makimakidi ta 'oloto~nana voneaya, "Nimau usi'otoi!" 'Inega nimana si'otoia ta veaiaqi. ¹¹Omo'e 'inega Falisi ma ediavo igamosoala aiaqi, 'inega taudiega iveqae tola'ai ina viaqi Ieisu 'inaya be ina givelua'ui.

Ieisu ena tovaletuyanayavo tuwelo venua'ivinedi
(Madiu 10:1-4; Maki 3:13-19)

¹²Tuta omo'e 'inaya Ieisu 'watovu taha bwanaga 'inaya. 'Inega velovelovana gamonaya vevenoqi Yaubada 'inaya. ¹³Ta mahala ahalia 'inega ana to'abibodayavo qabudi gabedi imai. Ta gamodiega adi yau tuwelo dimo venua'ivinedi be ina vetovaletuyana 'inaya, ta adi wawayavo ba'e. ¹⁴Saimoni (tauna wese Ieisu gabea Fita), ta taina Anidulu. Ta wese Iemesa be, Ioni be, Filifi be, Batolomio be, ¹⁵Madiu be, Tomasi be, mali Iemesa tauna Alifio natuna, ta wese mali Saimoni tauna wese igabea Seloti, ¹⁶ta wese Iudasa (tauna mali Iemesa natuna), ta 'ebelu'ovoa Iudasa Isakaliota, tauna nawale Ieisu nasuluvea.

Ieisu tovevhiqa qabudi giveaiaqieda
(Madiu 4:23-25)

¹⁷'Inega Ieisu ena tovaletuyanayavo maega bwanagega iwebui ta dumi'aya itovotovolo. Ta dumi'a~nana 'inaya ana to'abibodayavo qabudi ta wese yo'o qiduadi itoatoa. Taudi imai Ielusalema 'inega, ta wese di'we Iudia 'abaganavo 'idiega. Ta wese mwade'wa ana totoayavo Taia ta Saidoni 'abaganavo 'idiega iva'uta. ¹⁸Taudi imai Ieisu ena vona sabi noqolina, ta wese adi vihiqayavo nuanuadi nagiveaiaqieda. Ta wese tomotau taudi niboana luveifadi ni'a 'wahalidi maega imai. ¹⁹Ta qabu~dina nuanuadi Ieisu ina gitonovi 'inega adi vihiqa nahawala ta wese niboana luveifadi ina 'ifoqe 'idiega, mana tuta qabuna Ieisu 'inega waiwai 'ifo'ifoqe, e 'inega ana fata tomotau qabudi nagiveaiaqieda.

Nuavita nagivilea qaiawa
(Madiu 5:1-12)

20 'Abibodanaya Ieisu ana to'abibodayavo 'ita makimakidi ta vonedi vonaya,

“Omi'a lukwalukwami ona qaiawa,
mana Yaubada ena 'Ebeluvine omi'a weaqimi.

21 ^a Ta omi'a ma botanimi ona qaiawa,
mana nawale gamomi nakoko.

Ta wese omi'a ba'itagana odoudou ona qaiawa,
mana nawale ona dagi.

22 ^b Ona qaiawa 'eguma tomotau ina vevoalanemi
nage ina nogemi
nage ina vegilemi
nage ina 'awaluveifemi
emi 'abiboda ya'a Tomotau Natuna weaqigu.

23 “Ta tuta~nana vita diavona ina 'ifoqe weaqidi ona qaiawa be ona ou ta ona lavua, mana ami ve'ia 'ena'ina mahalaya 'eno'enova. Ta ona nuave'avinia toveilivu luveifa diavona tubudiavo lova tovesimasimana iveilivu luveifedi, e 'edewanina omi'a tuta omo'e 'inaya wese tomotau ina veilivu veifemi.

24 “Ta omi'a tovekaikaiwabu nuakolokolomi,
mana emi toa meaqana ni'au olobea,
ta nawale gebu.

25 Ta tomeqabu omi'a tuta ba'e 'inaya
gamomi kokoya nuakolokolomi,
mana nawale botana qiduana ona lobe.

Ta wese 'eguma tuta ba'e 'inaya
odagidagi nuakolokolomi,
mana nawale ona nuavita ta ona dou.

26 Nuakolokolomi 'eguma tomotau qabudi
ina 'awahaqiaqiem, i,
mana lova tubudiavo wese 'edewanina
tosimana 'e'eu'au'avid i'awahaqiaqiedi.

Voalamiavo ona veyolubedi
(Madiu 5:38-48; 7:12a)

27 “Egu ve'ita ba'e ona noqolia: Voalamiavo ona veyolubedi, ta wese tomeqabu inogenogemi ona veilivu aqiaqiedi. 28 Ta wese tomeqabu ivona ve'alatemi ona vona veyolubedi, ta taudi iveilivu veifemi weaqidi ona

^a 6:21 Ve 7:16-17; Same 126:5-6; Ais 61:3 ^b 6:22 Ion 15:19; 16:2; 1Fit 4:14

venoqi Yaubada 'inaya. ²⁹Ta 'eguma taha tomotau 'ae'aeuya navunuqa 'inega nimana ge una ve'iei, ta 'esi una tunugivila una awafelei wese di'wenaya navunuqa. Ta wese 'eguma taha toga au kaleko na'ewea, 'inega ge una awataye ta 'esi au kwakwalufai wese una neia. ³⁰Ta wese 'eguma taha tomotau 'iuya nanoqi yani taha weaqina, e 'inega yani~nana una neia. Ta 'eguma taha toga eu kulufa na'ewea ta 'inaya 'eno'enova, e 'inega kulufa~nana weaqina ge una noqi 'eviviei. ³¹^c Ta tola'ai nuanuami tomotau ina viaqia 'imia, e wese omi'a 'idewana ona viaqa 'aiqa 'idia.

³²“Ta 'eguma vaina tomotau iveyolubemi ta taudimo oveyoluba 'eviviedi 'inega ge taha wese ana aqiaqi 'imia, mana toluveifadi wese ediavo iveyolubedi, 'inega taudi ta omi'a emi ilivu 'aidegana. ³³Ta wese 'edewani 'eguma vaina tomotau ihiulemi ta wese taudimo oiuledi, 'inega ge taha wese ana aqiaqi 'imia, mana toluveifadi wese ediavo ihiuledi. 'Inega taudi ta omi'a emi ilivu 'aidegana. ³⁴Ta ma'oda ana aqiaqi 'eguma tomotau emi veyoluba ni'a oneidi ta nuanuami ina nei 'eviviemi? Ge wese aqiaqina, mana 'idewani toluveifadi iviaqia ediavo 'idia ta inuaia ve'ia ina loba 'eviviea.

³⁵“Ta omi'a luaqiaqiem be voalamiavo ona veyolubedi ta ona veilivu aqiaqiedi. Ta wese 'eguma taha yani ona neidi ta 'idia 'eno'eno, e 'inega gebu yani~nana weaqina ona ba'eba'e be ina nei 'eviviemi. 'Eguma 'idewani ona viaqia e 'inega nawale ami ve'ia qiduana ona lobe, be 'inega omi'a Toatoa Vanena natunavo. Mana Yaubada tomotau aqiaqidi ta toluveifadi be wese taudi ge nuanuadi ina lukaiwa 'inaya nuakolokoloyedi.

³⁶“Inega omi'a wese tomotau ona nuakolokoloyedi 'idewani Tamami nuakolokoloyemi.

Tomotau ge ona 'awaluveifedi

(Madiu 7:1-5)

³⁷^d “Tomotau ge ona 'awaluveifedi, 'inega nawale Yaubada ge wese na'awaluveifemi. Ta wese tomotau gebu ona ve'ewedi, be 'inega omi'a wese ge ve'ewa ona lobei. Ta 'esi tomotau ona nuataqodi be 'inega omi'a wese Yaubada nanuataqomi. ³⁸^e Ta omi'a tomotau emi veyoluba ona nei kavovodi, 'inega wese Yaubada nanei kavovomi ta ena veyoluba qidua va'inena 'imia naguiwaqia, mana tola'ai ona viaqia tomotau 'idia, e wese 'edewani Yaubada naviaqa 'aiqa 'imia.”

³⁹^f “Inega Ieisu vona sesebai ba'e neidi vonaya, “Nage ana fata taha matakwaya iana wese matana kwayakwayana navanugwetea? Gebu! Mana 'eguma 'edewanina, nawale magilafudina guli gamonaya ina be'u. ⁴⁰^g Ta wese 'edewani tosikulu taha gebu ana fata be ena tove'ita

^c 6:31 Md 7:12 ^d 6:37 Md 6:14 ^e 6:38 Mk 4:24 ^f 6:39 Md 15:14 ^g 6:40 Md 10:24-25

ena alamani naveqidua va'inei. Ta 'eguma tosikulu~nana ena alamani naveqidua 'inega magilafudi edi alamani nave'aidega.

41 “Ge daluaqiaqieu be taiu una voneaya, ‘O’a matauya ‘aiwe kisemanina ‘eno’eno’, mana o’a wese matauya kigabugabu ‘eno’eno’ova ta ge uda ‘itei? 42 ‘Inega taiu ge una voneaya, ‘Taigu, ‘aiwe kisemanina matauyega ena ‘ewa yavulea’, mana o’a wese kigabugabu qiduana matauya ‘eno’eno’ova ta ge uda ‘itei. Vonahaqiaqi, o’a tou’ava! Ta ‘esi luaqiaqieu be o’a kigabugabu matauyega una madu’ewa yavulei be yaqisa una ‘ita aqiaqi, ta ‘abiboda taiu matanega ‘aiwe kisemanina una ‘ewa yavulea.

‘Aiwe vuaqina
(Madiu 7:16-20; 12:33-35)

43 “‘Aiwe aqiaqina gebu ana fata navuaqa veifa. Ta wese ‘edewana ‘aiwe luveifana gebu ana fata navuaqa aqiaqi. 44 ‘Inega ‘aiwe ‘aidega ‘aidega vuaqidi ‘idiega kana alamanidi to’aiwe aqiaqina ta to’aiwe luveifana. Vonahaqiaqi, gebu ana fata ‘ue ‘inega ‘ala’ai vuaqina kana lobei, ta wese talitali ‘inega ge ana fata mwakikoi vuaqina kana lobei. 45 Ta tomotau edi ilivu wese ‘edewani. ‘Eguma taha ‘oloto ena nuanua aqiaqina, e ‘inega wese ena ilivu qabuna aqiaqina. Ta ‘eguma taha ‘oloto ena nuanua luveifana, e ‘inega wese ena ilivu qabuna luveifana. Mana ‘eguma nuanua luveifadi giwalimia i’eno’eno ‘inega wese tuta qabuna ‘awamiega vona luveluveifadi i’ifo’ifoqe.

Vanue ana to’eyoqona magilafudi
(Madiu 7:24-27)

46^h “Ta tola’ai weaqina o’awa-Kaiwabuyegu, ta egu vona gebu oda matayagedi?”

Ta wese Iaisu vonedi vonaya, “Vona diavona yaveveqaeyedi ‘eguma aqabu ina noqolidi ta ina viaqidi, e ‘inega taudi ‘idewana taha to’eyoqona ena vanue nayoqonia ena alamani aqiaqi ‘inega. Nugweta ena avutugu aqiaqina navenua’ivinia ta wese ena ‘oqola falafaladi ‘idewana agumo naluda’edi. Ta ‘inega bwa’obwa’o aqiaqinaya navetovolodi ta vanue~nana nayoqonia. 47 Ta ‘eguma taha toga namai ‘iguya ta egu vona nanoqolidi ta naviaqidi, ‘inega tauna ‘edewani taha to’eyoqona ena vanue nayoqonia ena alamani aqiaqi ‘inega. E tauna weaqina ena ve’itemi. 48 Tauna ena avutugu aqiaqina nugweta navenua’ivinia, ‘inega ena ‘oqola ‘idewani agumo miedi ta vetovolodi, ta ‘inega ena vanue yoqonia. Ta tuta~nana ‘wei qiduana webui ta seuseu inoqa be yaqina vunua ‘inega ge ana fata daqeu yavulei, mana ena vanue yoqonia bwa’obwa’o aqiaqina ‘inaya ta wese ‘oqola falafaladi ‘inega.

^h 6:46 Md 7:21

49 “Ta ’eguma taha toga egu vona nanoqolia ta ge naviaqidi, e tauna ’edewani to’eyoqona vanue gelasa ’inaya ena vanue yoqonia ta ’oqola kavokavovo vetovolodi gelasaya. Ta tutana ’wei qiduana webui ta seuseu inoqa, ’inega vanue~nana buini ta qeu yavulea ge taha da’eno.”

Ieisu toluavia edi tovatatana ena tofewa giveaiaiea

(Madiu 8:5-13)

7 ¹Ieisu ena vona tomatou ’idia ni’a lu’ovoia ’inega nogedi ta lugu ’abaga Kafaneumi ’inaya. ²Ta ’abaga~nana ’inaya toluavia me Loma edi tovatatana taha me ena tofewa itoatoa. Tovamatana~nana ena tofewa ba’e veyoluba aiaiea, ta vihiqa qiduana lobe be tuta goyona na’aliga. ³Ta tovatatana~nana Ieisu ena mai valena noqolia. ’Inega vaina me Diu taudi ’abaga ana tovanugwetayavo vetunedi Ieisu ’inaya ina noqiei namai be ena tofewa nagiveaiaiea. ⁴Ta kaiwabu diavona ni’au imai Ieisu ’inaya ta ivenoqiea ivonaya, “Kaiwabu, nuanuama qiduana una mai kana tauya iama taha ’inaya, ta ana vita una givemeaqania, mana tauna ’oloto aiaiqina ⁵ta me Diu qabuma veyolubema, ta wese ema vanue tafwalolo ni’au yoqonia weaqima.”

⁶Inega Ieisu awafela ta maega itautauya. Tuta goyona ina ’ifoqe tovatatana~nana ena vanuea, ’inega wese enavo vaina vetunedi Ieisu ’inaya sabi awatayana ta imai ivoneaya, “Kaiwabu, ema tovatatana vonaya o’a ’oloto qiduau ’inega ge daluaiaieu be una lugu ena vanuea. ⁷Ta wese ge daluaiaieu be tauna maega ’edaya ona veloba. Ta nuanuana ba’ade una vonamo ta ’inega ena tofewa naveaiaqi. ⁸Mana tauna wese ni’a alamania luvine ana ’abiboda weaqina ta ana tovatatana qiduqiduadi ’abi’abibodedi. Ta wese ena toluaviaiavo luluvinedi, ta ’eguma taha navoneaya, ’Utau!’ e natauya, ta ’eguma taha wese navoneaya, ’Umai!’ e namai. Ta wese ’eguma ena tofewa taha navoneaya, ’Ba’e uviai!’ e ’inega naviaia.”

⁹Ba’e vona diavona Ieisu ni’a noqolia, ta nuana voqana aiaqi, ’inega tunugivila tomatou qabudi i’abi’abibodea ’idia ta vonedi vonaya, “Vonahaiqi, lova ge wese taha toga eda ’ita lobei me Isileli ’imiega ena vetumaqana ’oloto ba’e ’idewani!”

¹⁰Inega tovatatana enavo i’evivi itauya ena vanuea, ta tofewa~nana i’itea ni’au veaiaqi.

Ieisu wada’e natudi me’olotona ’aligega giveya’itoto ’eviviea

¹¹Ta ge tuta kuena ’abibodanaya Ieisu tauya taha ’abaga ’inaya ana wawa Neini. Ta ana to’abibodayavo be wese yo’o qiduadi i’abibodea.

¹²Inega ’ifoqe ’abaga~nana ana ’ebelugu i’awanaya, ’inega taha to’aliga tomatou i’avalei i’ifo’ifoqe miea ’abagega. Ta to’aliga~nana tauna wada’e natuna me’olotona ’aidega otaqina. ’Inega wada’e~nana tomatou qabudi

maega 'abagega itautauya sabi tavunina. ¹³Tutana Ieisu wada'e~nana 'itea 'inega nuakolokoloyea voneaya, "Ge una dou." ¹⁴Inega vanaqo ta to'aliga~nana ana uma gitonovia ta to'avala~dina iveutovololo. 'Inega Ieisu vonaya, "Kilakai, yavoneu uya'itoto!" ¹⁵ⁱ 'Inega 'aligega ya'itoto 'evivi ta ve'ale veqae. 'Abo Ieisu kilakai~nana inana nei 'eviviedi.

¹⁶^j Omo'e 'inaya tomotau qabudi me edi 'amayaba Yaubada imwaninivea ta iawatuboya ivonaya, "Tovesimasimana qiduana ni'au 'ifoqe mai nuanidaya. Ba'e Yaubada ena iula ita'a ena tomotauyavo 'idaya."

¹⁷Ta Ieisu Valena yani ba'e weaqina iyawalea di'we Iudia 'abaganavo 'idia, ta wese di'we taha taha 'idia.

Ioni Togivebabitaiso ena vetala'ai Ieisu weaqina

(Madiu 11:2-19)

¹⁸Ta Ioni ana to'abibodayavo Ieisu ena viaqayavo weaqina isimanea 'inaya. 'Inega Ioni ana to'abiboda magilafudi gabedi imai ¹⁹^k ta luvetunedi ina tauya Kaiwabu 'inaya ta ina vetala'aiea ina vonaya, "Nage o'a To'etoyavua~nana tauna weaqina aba'eba'e, nage mali 'oloto weaqina ana ba'eba'eyea?" 'Abo itutuvila itauya.

²⁰⁻²¹Ta omo'e tutana 'inaya Ieisu toveviihiqayavo adi vihiqa taha taha 'idiega giveaqiaqiedi, ta wese niboana lueifadi tomotau 'idiega 'wavi 'ifoqeyedi. Ta wese matadi kwayakwayana giveaqiaqiedi. 'Inega tuta~nana magilafudina imai Ieisu 'inaya ivoneaya, "Ioni Togivebabitaiso vetunema amai sabi vetala'aieu nage o'a To'etoyavua~nana, nage mali 'oloto ana ba'eyea?"

²²^l 'Inega magilafudi edi vetala'ai Ieisu ve'iea vonaya, "Ona 'evivi be Ioni ona vematamagilafuyea yani diavona ni'au onoqolidi ta o'itedi weaqina, mana matadi kwayakwayana ni'a i'ita aqiaqi be, 'aqedi belubeluna itauya aqiaqi be, 'wago'wagoidi ni'a 'wafidi ve'evau 'evivi be, teniqadi kwavana vona ni'a inoqolia be, to'aliga iya'itoto 'evivi mayawaidi, ta wese lukwalukwadi vale aqiaqina ni'au inoqolia. ²³'Inega ona tauya Ioni ona vonea weaqigu ge navenuana magilafu, mana 'eguma taha toga ena vetumaqana 'iguya ge nadawalili e tauna naqaiawa."

Ieisu simana Ioni weaqina

²⁴Ioni ana to'abibodayavo ni'a i'evivi itauya, 'inega Ieisu ve'ale tomotau qabudi 'idia Ioni weaqina simana vonaya, "Lova qabumi di'we tomotau gegana 'inaya otauya Ioni ena vona sabi noqolina, ta tola'ai nuanuami vonigo oda 'itei? Nage taha 'oloto dawalilina kavona didiala

ⁱ 7:15 1Kin 17:23; 2Kin 4:36 ^j 7:16 Lk 1:68 ^k 7:19-20 Same 40:7; Mal 3:1; Ve 1:8

^l 7:22 Ais 35:5-6; 61:1; Lk 4:18

yaqina yueyuea o'itea? Gebu! ²⁵ Nage otauva taha 'oloto ana kaleko kaikaiwabuna sabi 'itana? Gebu, mana taudi ma adi kaleko kaikaiwabuna ta edi kulufa qiduana toluvine qiduquduadi edi vanue 'ena'ena'ina 'idia itoatoa. ^{26 m} 'Inega tola'ai weaqina otauva di'we tomotau gegana 'inaya? Nage onuaia vonigo tovesimasimana taha oda 'itea, waisa? Vonahaqiaqi, 'oloto~nana ni'a o'itea tovesimasimana qabudi veqidua va'inedi. ^{27 n} Ioni~nana weaqina lova Yaubada Buki Nugwenugweina 'inaya ba'e 'idewani maduvonayea,

'Egu tovale'ewa ena vetunei nanugweta,
be eu 'eda naqadalia.' ”

²⁸ 'Inega Ieisu wese vonaya, “Ioni tauna totoa bwa'obwa'o qabudi veqidua va'inedi, ta tomeqabu Yaubada ena 'Ebeluvine gamonaya itoatoa taudi Ioni iveqidua va'inea.”

^{29 o} 'Inega yo'o~dina ta wese takesi ana to'ewayavo Ieisu ena vona ba'e inoqolia ta Yaubada ena 'eda i'awahaqiaqiea ta iawatuboya, mana taudi lova Ioni givebabitaisodi. ^{30 p} Ta Falisiavo be luvine ana toalamaniavo Yaubada ena nuanua weaqidi inogea, mana taudi ge nuanuadi lova Ioni dagivebabitaisodi.

³¹ 'Inega Ieisu vonedia, “Omi'a lagata ba'e 'itaga ma'oda otoatoa 'aiqa, ta ma'oda 'inega ena givелеleqa 'aiqemi emi ilivu weaqina? ³² Nage ena vonemi omi'a kavona gogama 'ebevegimwane gamonaya ilahalaha ta ediavo 'idia ivegabagaba ivonaya,

'Emavo ma'oda, ima'a alavulavua
ta ge oda ouou,
ta wese a'ewa'ewabamu
ta ge oda doudou.’

³³ Ba'e 'ebevetalatutula~nana ni'a yavonemi, mana Ioni Togivebabitaiso mai ta beledi ge da'ai'ai ta 'oine ge danumanuma. Ta 'inega omi'a ovonaya be Ioni niboana luveifana da'wahali. ^{34 q} Ta ya'a Tomotau Natuna yamai ya'ai'ai ta yanumanuma ta wese weaqigu olugwae ovonaya, “Oloto ba'e 'ai 'avana ta wese numa 'avana, ta wese takesi ana to'ewayavo be tomotau luveluveifadi veiaianedi.’ ³⁵ Tomeqabu Yaubada ena alamani qiduana ialamani aqiaqiea, e taudi alamani~nana wese i'awahaqiaqiea ta i'abi'abibodea.”

Taha vavine toluveifana Ieisu 'aqena dede'wega iwaqia

³⁶ Taha tuta Falisi taha ana wawa Saimoni Ieisu 'ebe'ewei maega ina 'ai. 'Inega Ieisu lugu ena vanuea ta toabui sabi 'ai. ^{37 r} Ta omo'e 'abaga~nana 'inaya taha vavine ena ilivu luveifana toatoa. Vavine~nana ni'au

^m 7:26 Lk 1:76 ⁿ 7:27 Mal 3:1 ^o 7:29 Lk 3:12 ^p 7:30 Md 21:32 ^q 7:34 Lk 15:2

^r 7:37 Md 26:7; Mk 14:3; Ion 12:3

alamania Falisi ena vanuea Ieisu 'ai'ai. 'Inega dede'wa meilana aqiaqina ta ana maisa agona ma botolina miea viaviaqina alabasita 'inega. ³⁸'Inega lugu ta tuqatuqanega sobadi Ieisu 'aqenaya doudou ta mataelunega Ieisu 'aqena vebutea ta debana kuena 'inega talaveayea, ta wese Ieisu 'aqena yaoqia 'inega 'abiboda dede'wa~nana 'ewei ta 'aqena iwaqia. ³⁹'Inega Falisi~nana nuana tonovea Ieisu weaqina ta taunega vonaya, "Oloto ba'e 'eguma tauna tovesimasimana, e 'inega nahalamanian vavine ba'e ni'a gigitonovia tauna toluveifana."

⁴⁰Ta Ieisu voneaya, "Saimoni, nuanuagu taha yani weaqina ena voneu."

Ta Saimoni vonaya, "Kaiwabu, uvonegu."

⁴¹'Inega Ieisu voneaya, "Tomotau magilafudi iloaga tovekaikaiwabu taha 'inaya. Taha tomotau ana aga qiduana kavona ya'wala 'aidegina nafewa ana ve'ia 'idewani. Ta wese iana ana aga tufwana goyona kavonaya wai'ena 'aidegina nafewa ana ve'ia 'idewani. ⁴²Ta magilafudina adi aga ge adi fata ina ve'iei, 'inega kaiwabu~nana magilafudina adi aga nuavetavunia. 'Inega ena vetala'aieu magilafudina 'idiega togama kaiwabu~nana nalukaiwa qiduana 'inaya?"

⁴³'Inega Saimoni Ieisu ena vona ve'iea vonaya, "Nage 'oloto~nana tauna ana aga qiduana nalukaiwa qiduana kaiwabu~nana 'inaya."

Ta Ieisu voneaya, "Vonahaqiaqi, eu nuanua tunutunuqina."

⁴⁴'Inega Ieisu tunugivila vavine~nana 'inaya ta vonaya, "Saimoni, ba'e vavine~nana ena viaqa weaqigu u'itea gebu 'idewani o'a, mana eu vanuea yaluguwai ta go'ila 'aqegu ana 'utu weaqina gebu uda neigu. Ta vavine ba'e mataelunega 'aqegu 'utudi ta debanega talaveayedi. ⁴⁵Ta wese eu lukaiwa ge uda ve'itaye 'iguya yaoqega, ta 'esi tauna tuta~nana ya'ifoqe ve'ale 'aqegu 'eyaoyaoqidi. ⁴⁶Ge wese dede'wa uda iwaqia 'iguya ta tauna ena dede'wa meilana aqiaqinega 'aqegu iwaqidi. ⁴⁷Tauna ena luveifana qabuna ni'au yanuavetavunidi, 'inega veveyolubegu qiduana. Ta 'eguma togama ena luveifana goyona ena nuataqoya, 'inega wese ena veyoluba 'iguya goyona."

⁴⁸'Inega Ieisu vavine~nana voneaya, "Eu luveifana ni'au yanuataqoya."

⁴⁹Ta tomotau diavona nawale i'ai'ai Ieisu ena vona inoqolia ta taudiega iveveqae ivonaya, "Isana to'oloto ba'e, mana luveifana qabuna nuanuataqodi?"

⁵⁰^s 'Inega Ieisu vavine~nana voneaya, "Eu vetumaqana 'inega ni'au 'etoyavua ulobe, 'inega me eu nuadaumwala una tauya."

Vivine vaina Ieisu ma enavo ihiuiledi

8 ¹'Abiboda Ieisu tutuvila tauya 'abaga qiduiduadi be goyogoyodi 'idia ta Yaubada ena 'Ebeluvine valena aqiaqina lugaihiea. Ta

^s 7:50 Lk 8:48; 18:42

Tuwelo~dina maega itauya. ^{2 t} Ta wese vaina vivine maega iluvivila, taudi lova 'idiega niboana luveifadi Ieisu 'wavinidi i'ifoqe, ta wese adi vihiqayavo giveaiaqiedi. Taudi vivine~dina adi wawayavo ba'e: Meli Magidala, lova tauna 'inega niboana luveifadi adi yau seveni Ieisu 'wavinidi i'ifoqe, ³ ta wese Ioana, taudi kini Elodi ena tofewa ana wawa Kusa moqanena, ta wese Susana be vaina vivine maega. Ba'e vivine~dina edi kulufayega Ieisu ma enavo ihiuledi ta i'itamakidi.

Witi vewanina vona sesebaina

(Madiu 13:1-9; Maki 4:1-9)

⁴ Taha tuta 'inaya qabu qiduadi 'abaga taha taha 'idiega imai ta itoava~auta Ieisu 'inaya. 'Inega vona sesebaiega ve'itedi vonaya, ⁵ "Tovaoqa taha ena vaoqaya tauya ta witi vewanina veyavuledi, ta vaina vewana 'edabalaya iavuta, 'inega tomotau 'aqediega i'evaosoqosodi, ta manu i'itedi 'inega iwebui mai ta i'ainidi. ⁶ Ta vaina vewana dabodabo 'inaya iavuta ta ge bwa'obwa'o qiduana, 'inega itabo ta 'abiboda imwatuqu, mana bwa'obwa'o~nana ge niginigina. ⁷ Ta wese vaina vewana talitali gamonaya iavuta, ta maega itabo vinivinioya, 'inega talitali vewaiwai ta fai ve'aligidi. ⁸ Ta wese vaina vewana bwa'obwa'o aqiaqina 'inaya iavuta ta itabo ta iveqidua 'inega ivuaqa. Ta 'idiega bolimana aqiaqina lobe, mana vewana 'aidega 'aidega 'idiega 100 lobedi."

'Inega Ieisu tomotau qabudi vonedi vonaya, "Eguma ma taniqami vona ba'e ona noqolia."

Vona sesebai ena 'ifoqe 'iuna

(Madiu 13:10-17; Maki 4:10-12)

⁹ Ta 'abiboda Ieisu ana to'abibodayavo ivetala'aiea ivonaya, "Vona sesebai ba'e, ma'oda ana alamani?"

^{10 u} 'Inega Ieisu vonedia, "Omi'a Yaubada ena 'Ebeluvine gamo aqiaqina ana alamani ni'a awafelea 'imia.

'Ta mali tomotau vona sesebaiega yaveve'itedi, mana inoqonoqolia ta nuadi ge da'eqa'ui, ta wese ma matadi, ta ge ida 'ita aqiaqiea.' "

Witi vewanina vona sesebaina Ieisu givesimatalia

(Madiu 13:18-23; Maki 4:13-20)

¹¹ 'Inega Ieisu vonaya, "Vona sesebaina ana giyavua ba'e 'edewana: Vewani~nana ni'a ya'inanea tauna Yaubada ena vona. ¹² Ta vaina

^t 8:2 Md 27:55-56; Mk 15:40-41; Lk 23:49 ^u 8:10 Ais 6:9-10

tomotau kavona vewana~dina 'edabalaya iavuta, mana Yaubada ena vona inoqolia, ta Seitani maimai ta vona~nana giwalidiega 'ewa'ewa yavulea, 'inega ge adi fata Yaubada ina vetumaqanei be 'etoyavua ina lobei. ¹³ Ta vaina tomotau kavona vewana~dina iavuta bwa'obwa'o ma dabodabona 'inaya, mana Yaubada ena vona inoqolia ta weaqina iqaiawa. Ta kwalamidi gebu, 'inega tuta kukusana 'inaya ivetumaqana, ta tuta~nana Seitani nasitonovidi 'inega ina be'u kwayavona. ¹⁴ Ta vaina tomotau kavona vewana~dina talitali gamonaya iavuta, mana taudi Yaubada ena vona inoqolia, ta edi toa be wese kaikaiwabu weaqina inuanua, ta wese bwa'obwa'o ana qaiawa 'inaya iawafeledi, 'inega Yaubada ena vona ge davuaqa 'idia. ¹⁵ Ta 'esi vaina tomotau kavona vewana~dina bwa'obwa'o aqiaqina 'inaya iavuta. Taudina aqiaqi otaqidi ta giwalidi iawafelea Yaubada 'inaya, mana ena vona inoqolia ta ikafi'i'hia, e 'inega vuaqa aqiaqina 'ifo'ifoqe 'idiega."

Lamufa vona sesebaina

(Maki 4:21-25)

¹⁶ ^v 'Inega wese Iesu vonedi vonaya, "Gebu taha toga lamufa nagabui naha'ukwaivei 'ulena nage 'ivi 'ayanaya, ta 'esi vunavunaqaya naha'ui be 'inega tomeqabu ilugu vanuea nasimatalidi.

¹⁷ ^w "Mana yani qabuna 'wai'waivina be a'ua'ukwaivina nawale na'ifoqe vunavunaqaya ta tomotau qabudi ina 'itea ta wese ina alamani aqiaqiea.

¹⁸ ^x "Inega yani qabuna onoqonoqolia e ona nuave'avina aqiaqiea. Mana tomeqabu egu vona inoqola aqiaqiea e nawale edi alamani nave'ena'i. Ta tomeqabu egu vona ge ida noqolia, e nawale edi alamani goyona 'idia 'eno'eno Yaubada na'ewa yavulea."

Iesu inana be tainavo isalia

(Madiu 12:46-50; Maki 3:31-35)

¹⁹ Abibodanaya Iesu inana be tainavo imai sabi 'itana. Ta qabu qidua va'inedi itoatoa, 'inega ge adi fata ina lugu Iesu 'inaya. ²⁰ Inega taha tomotau Iesu voneaya, "Kaiwabu, inau be taimwavo 'atamanaya itovotovolo, ta nuanuadi ina 'iteu."

²¹ Inega Iesu vonedi vonaya, "Tomeqabu Yaubada ena vona inoqolia ta ivelumamatayagea, e taudi inagwavo be wese taigwavo."

Iesu wedilia wese nufula givedaumwalia

(Madiu 8:23-27; Maki 4:35-41)

²² Taha tuta 'inaya Iesu ana to'abibodayavo vonedi vonaya, "Kana gelu kana vaucamana lavu di'wenaya." 'Inega taha waga igelui 'abo itauya.

^v 8:16 Md 5:15; Lk 11:33 ^w 8:17 Md 10:26; Lk 12:2 ^x 8:18 Md 25:29; Lk 19:26

23 Tuta~nana ivavabala Ieisu matana dune ta 'eno'eno waga gamonaya. 'Inega yaqina waiwaina 'ifoqe ta nufula qiduadi waga gamonaya goi vedodoya, 'abo tuta goyona ida damana.

24 'Inega to'abiboda~dina idivanoya ivoneaya, "Kaiwabu, Kaiwabu, uya'itoto mana tuta goyona kana damana!"

'Inega Ieisu ya'itoto, ta yaqina be nufula lugwaeyedi vonedia, "Olua'u!" Tuata yaqina be nufula 'avalagwaedi.

25 'Inega Ieisu ana to'abibodayavo vonedi vonaya, "Ma'oda? Nage ge oda vetumaqanegu, waisa?"

Ta taudi imwaniniva ta wese nuadi voqana, 'abo taudiega ivonaya, "To'oloto ba'e, mana yani qabuna luluvinedi, ta wese yaqina be nufula bonana ivematamatayagea?"

Ieisu taha 'oloto gamonega niboana luveifadi 'wavi 'ifoqeyedi
(Madiu 8:28-34; Maki 5:1-20)

26 Ta ni'au di'we Galiliega ivaukamana ilugu me Gelasine edi di'we 'inaya. 27 Ieisu ni'a webui balabalaya, 'inega taha 'abaga~nana ana 'oloto 'ifoqe mai 'inaya. Ta 'oloto~nana niboana luveifadi ni'a i'wahalia. Ta tuta kuena ge davekaleko ta wese vanuea ge datoatoa, ta 'esi tuta qabuna deba'unu 'idia toatoa. 28-29 Ta tuta kuena 'inaya niboana luveifana 'oloto~nana luvekwavekwavea, 'inega tomotau nimana be 'aqena iyoqonidi seniega ta i'itamakia. Ta seni~nana 'eluhufeufedi ta niboana luveifana 'ebe'ewei tauyea di'we ilumakavinaya 'idia.

Ta tutana 'oloto~nana Ieisu 'itea 'inega 'alabwau ta 'aqenaya givelukabwebwe. 'Inega Ieisu voneaya, "Niboana luveifana, 'oloto bena'e 'inega u'ifoqe mai!"

'Inega niboana~nana bonana qiduanega gaba vonaya, "Ei Ieisu, o'a Yaubada Toatoa Vanena Natuna, tola'ai nuanuau una viaqi 'iguya? Yavevenoqieu, visiq ge una neigu."

30 'Inega Ieisu vetala'aiea voneaya, "Ma'oda au wawa?"

'Inega vonaya, "Agu wawa 'Ea'ealima", mana niboana luveifadi koyadi ni'au ilugu 'oloto~nana gamonaya ta itoatoa.

31 Ta niboani~dina Ieisu 'inaya ivenoqi waiwai ivonaya, "Gebu una felawebuiema vetoa ge ana 'ebelu'ovoamo ana wawa Abisi 'inaya."

32 Ta taha bwanaga veanaya bawe qabudi iduaduala. 'Inega niboana luveifadi Ieisu ivenoqiea nahawafeledi ina lugu bawe 'idia, e 'inega Ieisu awafeledi. 33 'Inega i'ifoqe 'oloto~nana gamonega ta bawe 'idia ilugu, ta bawe diavona ikwawa ta koyadi ivegaligali'wa'wa itauya dabega iwebui lavuya 'abo igavivila.

34 Bawe adi to'itamakiavo yani qabuna 'ifoqe ni'a i'itea, 'inega ivihila itauya, ta valena isimana dadanea 'abaga qiduqiduadi be goyogoyodi ana totoayavo 'idia. 35 'Inega imai be nuanuadi wese taudi matadiega

ina 'itea tola'ai ni'a 'ifoqe. Ta tutana imai Ieisu 'inaya 'inega 'oloto~nana i'itea lova niboana luveifadi iluvekwavea. Tauna ena nuanua ni'au veaqiaqi ta vekaleko 'abo Ieisu 'aqenaya toabui toatoa. Ta tomotau qabudi imwaniniva.

³⁶Ta tomotau diavona Ieisu ena viaqayavo ni'a i'itedi 'abibodanaya i'evivi edi 'abagaya ta 'oloto~nana lova niboana luveifadi i'wahalia ena veaqiaqi weaqina ivelulu'uyayea ediavo 'idia. ³⁷Inega me Gelasine qabudi imwaniniva qiduana ta Ieisu ivonea vonigo nanogedi ta edi di'we 'inega natauya. 'Inega Ieisu wagaya gelu 'evivi nogedi tauya. ³⁸Ta 'oloto~nana tawadega veaqiaqi mai Ieisu 'inaya venoqiea vonaya, "Nage ana fata ena 'abibodeu?"

'Inega Ieisu 'oloto~nana luvetunei voneaya, ³⁹"Ge au fata una 'abibodegu, ta 'esi una 'evivi una tauya eu 'abagaya, ta Yaubada ena veyoluba qiduana 'iuya weaqina una velulu'uyayea."

E 'inega 'oloto~nana tauya, ta tola'ai Ieisu ni'a viaqia 'inaya simana dadanea 'abaga~nana gamonaya.

Yailo natuna vevihika
(*Madiu 9:18-19; Maki 5:21-24*)

⁴⁰Tutana Ieisu ma ana to'abibodayavo i'evivi Galili 'inaya, 'inega qabu qiduadi me edi qaiawa Ieisu i'ebe'ewea, mana tauna weaqina iba'eba'e. ⁴¹'Inega taha 'oloto ana wawa Yailo, tauna vanue tafwalolo ana tovanugweta, mai Ieisu 'aqenaya iwa'odu ta venoqiea maega ina tauya ena vanuea, ⁴²mana natuna mevavinena 'aidega otaqina tuta goyona na'aliga. Ta gwama~nana ana ya'wala tuwelo 'idewana ni'a lobe.

'Inega Yailo maega 'eday a itautauya, ta wese qabu qidua va'inedi i'abibodedi ta Ieisu ivelia'i'ia.

Vavine taha nuanuana Ieisu ana kaleko nagitonovia
(*Madiu 9:20-22; Maki 5:25-34*)

⁴³Ta qabu~dina nuanidia taha vavine ma ana vihiqa maega itautauya. Ta ana vihiqa sulalina inoqa ya'wala tuwelo 'idia, ta nawale inoinoqa, mana ge taha toga ana fata dagiveaqiaqiei. ⁴⁴'Inega vavine~nana Ieisu 'abibodanega mai 'abo ana kwakwalufai noyana gitonovia, ta omo'e tutana 'inaya sulalina yafaha kwayavonia.

⁴⁵'Inega Ieisu vonaya, "Togama gitonovigu?"

'Inega qabudi ivegeqa ta Fita voneaya, "Kaiwabu, u'itedi qabu qiduadi ivevelia'avala 'inega ilu'oneu."

⁴⁶Ta Ieisu voneaya, "Taha toga agu kwakwalufai gitonovia, mana yalutonovia 'iguyega egu waiwai 'ifoqe."

⁴⁷Ta vavine~nana nuanuana naoukwaiva, ta ge ana fata mana Ieisu ni'a alamania ena waiwai vaukamana 'inaya. 'Inega vavine~nana me

ena tatava mai Ieisu 'inaya ta 'aqenaya iwa'odu. 'Inega tomotau qabudi 'iawadia simana 'ifoqeyea tola'ai weaqina Ieisu ana kwakwalufai gitonovi, ta ma'oda 'inega veaqiaqi kwayavona.

48^y 'Inega Ieisu vavine~nana voneaya, "Natugu, eu vetumaqana 'inega ni'a uveaqiaqi. Uya'itoto me eu nuadaumwala una tauya."

Yailo natuna 'aligega Ieisu giveya'itotoya
(Madiu 9:23-26; Maki 5:35-43)

49 Ieisu nawale vonavona vavine~nana 'inaya, 'inega vanue tafwalolo ana tovanugweta Yailo ena vanuega taha tomotau vale miea 'inaya vonaya, "Natuhu yawaina ni'a gumwala, 'inega Tove'ita ge una ve'aqe visiqi."

50 Vale ba'e Ieisu noqolia 'inega Yailo vonea vonaya, "Ge giwaliu naha'ala, ta 'esi una vetumaqanamo, natuhu nawale naveaqiaqi."

51 'Inega itutuvila itauya 'abo vanuea i'ifoqe. Ta Ieisu tomotau qabudi awatayed i ge taha toga nalugu. Ta nuanuana Fita be, Ioni be Iemesa ta wese gwama~nana tamana be inana maega ina lugu. 52 Ta vaina tomotau nawale idoudou ta wese i'ewa'ewabamu gwama~nana weaqina. 'Inega Ieisu vonedia, "Elovemi, ge ona dou! Gwama ba'e ge da'aliga ta 'esi 'eno motaiva 'eno'eno."

53 'Inega todou Ieisu idagiea, mana ialamania gwama ba'e ni'a 'aliga. 54 'Inega ilugu ta Ieisu gwama nimanaya kafi ta voneaya, "Natugu, uya'itoto!" 55 'Inega gwama~nana yawaha 'evivi ta lukwayavonega ya'itoto. 'Inega Ieisu gwama inana be tamana vonedi 'abwaga ina neia na'ai. 56 Yani ba'e weaqina tamana be inana nuadi voqana aqiaqi. Ta Ieisu luvinedi vonedia, "Gebu taha toga 'inaya ona simana egu viaqa ba'e weaqina."

Ieisu Tuwelo~dina vetunedi
(Madiu 10:5-15; Maki 6:7-13)

9 1 Ieisu Tuwelo~dina gaba va'auqidi, 'inega ena luvine be wese ena waiwai neidi, 'inega adi fata niboana luveifadi tomotau 'idiega ina 'wavinidi ina 'ifoqe, ta wese adi vihiqayavo ina giveaqiaqiedi. 2 'Inega vetunedi itauya ta Yaubada ena 'Ebeluvine valena ina lugaihiea tomotau 'idia, ta wese tovevihiqayavo ina giveaqiaqiedi. 3^z 'Inega vonedi vonaya, "Ge taha yani ona 'ewei emi luvivila 'inaya, ge emi kewala, nage kode, nage 'abwaga, nage mane, nage ami kaleko vemagilafuna. 4 Ta 'eguma taha toga na'ebe'ewemi ena vanuea, 'inega ona lugu 'inaya, ta ona toatoa ana laba 'abaga~nana ona nogea. 5 Ta 'eguma tomotau ge ina 'ebe'ewemi edi vanuea, 'inega tutana 'abaga~nana ona nogei 'aqemiega fwayafwaya

^y 8:48 Lk 7:50 ^z 9:3-5 Lk 10:4-11

ona vavutuvutuqa yavulei. Ta ba'e viaqa~nana nave'ebe'ita 'idia nawale vita ina lobe'a."

⁶Inega Tuwelo~dina itutuvila itauya, ta 'abaga taha taha 'idia vale aqiaqina ilugaihiea, ta wese tovevhiqayavo igiveaqaqiedi.

Kini Elodi nuana voqana Iesu weaqina

(Madiu 14:1-12; Maki 6:14-29)

^{7a} Ta tuta ba'e 'inaya kini Elodi Iesu ena viaqayavo valena noqolia, 'inega nuana voqana qiduana ta giwalina a'ala mana vaina tomotau ivonaya, "Ioni Togivebabita'iso 'aligega ya'itoto 'evivi."

⁸Ta vaina tomotau ivonaya, "Ilaitia wese 'ifoqe 'evivi."

Ta wese vaina ivonaya, "Nage tauna tovesimasimana nugwenugweidi taha 'idiega, ta ba'itagana ni'a ya'itoto 'evivi."

^{9b} Ta Elodi vonaya, "Lova ya'a egu luvineyega Ioni magana ida'ea, ta isana to'oloto ba'e tomotau valena ivonavonaye?" 'Inega Elodi sali waiwai nuanuana Iesu na'itea.

Iesu tomotau qabudi ve'ainidi

(Madiu 14:13-21; Maki 6:30-44; Ioni 6:1-14)

¹⁰Tutana Iesu ena tovaletuyanayavo edi luvivila 'inega i'evivi imai, 'inega edi fewa qabuna weaqina isimana 'inaya. Ta 'abiboda Iesu 'ebe'ewedi ta maega itauya taha 'abaga ana wawa Bedesaida 'inaya, nuanuana adi 'aidega omode ina toatoa. ¹¹Ta tomotau qabudi valena inoqolia, 'inega taudi wese Iesu itala'obei itauya 'inaya. 'Inega Iesu 'ebe'ewedi imai ta Yaubada ena 'Ebeluvine weaqina ve'itedi, ta wese adi vihiqayavo giveaqaqiedi.

¹²Ta baba'au ni'a lia'unuva, 'inega Tuwelo~dina imai Iesu 'inaya ivoneaya, "Kaiwabu, ba'e di'we~nana tomotau geqana, e 'inega yo'o ba'ena una luvetunedi ina tauya 'abaga taha taha di'wedaya 'idia, ta adi 'abwaga be edi 'ebe'eno ina sali."

¹³'Inega Iesu vonedi vonaya, "Omi'a 'abwaga ona neidi ina 'ai."

Ta taudi ivoneaya, "Ima'a ama 'abwaga ge 'ealina, u'itei beledi nima 'aidegana ta 'iqana magilafudimo i'eno'eno. Nage nuanuau ana tauya ta qabu diavona adi 'abwaga ana gimwane'a, waisa?"

¹⁴'Inega Iesu ana to'abibodayavo vonedia, "Tomotau qabudi ona vonedi ina toabui adi yau 50 guguna taha taha 'idia." Ta qabu diavona 'oloto adi yau 5,000 'idewani.

¹⁵'Inega Iesu ena luvine i'abibodei, ta tomotau qabudi itoabui guguna taha taha 'idia. ¹⁶'Inega Iesu beledi nima 'aidegana ta wese 'iqana magilafudi 'ewedi ta 'ita vane mahalaya ta weaqidi lukaiwa ta

^a 9:7 Md 16:14; Mk 8:28; Lk 9:19 ^b 9:9 Lk 23:8

gitomwedi. 'Inega ana to'abibodayavo neidi ta ivewila'ayea tomotau qabudi 'idia, ¹⁷abo qabu~dina i'ai ta gamodi 'elukoko. Ta 'abiboda leisu ana to'abibodayavo 'abwaga 'awagigidi iva'auqia ta 'onena tuwelo iluveagatuna'idi.

Fita ena simana leisu weaqina
(Madiu 16:13-19; Maki 8:27-29)

¹⁸ Ta taha 'aubena 'inaya leisu ana to'abibodayavo maega itoatoa, ta leisu ana 'aidega vevenoqi Yaubada 'inaya. Ta 'abiboda ana to'abibodayavo vetala'aiedi vonaya, "Ma'oda tomotau edi vona weaigigu ya'a togama?"

¹⁹ ^c Ta ana to'abibodayavo ivoneaya, "Tomotau vaina ivonaya vonigo o'a Ioni Togivebabitaio, ta vaina ivonaya vonigo o'a Ilaitia, ta vaina wese ivonaya vonigo o'a taha tovesimasimana 'aligega uya'itoto 'evivi."

²⁰ ^d 'Inega wese vetala'aiedi vonedia, "Ta omi'a, ma'oda emi nuanua vonigo ya'a togama?"

Ta Fita voneaya, "O'a To'etoyavua Yaubada 'inega."

Iesu ana 'abiboda weaqina
(Madiu 16:20-28; Maki 8:30-9:1)

²¹ Omo'e 'inaya leisu ana to'abibodayavo luvine waiwaina neidi be ba'e yani~nana weaqina ge ina vevonavonayei tomotau 'idia. ²² ^e 'Inega leisu wese vonedi vonaya, "Ya'a Tomotau Natuna nawale visiq'a 'ena'ina ena lobe'a 'abaga ana tovanugwetayavo be toveguba qiduquidua ta wese luvine ana tove'itayavo 'idiega, mana nawale ina nogegu be ina luve'aligigu, ta 'aubena vetoina 'inaya Yaubada nagiveya'itoto 'eviviegu 'aligega."

²³ ^f 'Inega leisu tomotau qabudi vonedi vonaya, "Eguma taha toga nuanuana na'abibodegu 'inega ge tauna weaqina nanuanua, ta 'esi luaqiaqiea be taunega ana 'etoluai na'avalei ta 'aubena 'aidega 'aidega na'abibodegu. ²⁴ ^g Ta 'eguma taha toga yawaina navegagalea nawale yawaina naluve'waivia, ta 'eguma taha toga yawaina nahawafelea weaigigu ta na'aliga, e nawale yawaina naloba 'eviviea. ²⁵ Ta 'eguma taha toga bwa'obwa'o ana kaikaiwabu qabuna na'ewedi ta 'abiboda yawaina naluve'waivia, 'inega tola'ai ana aqiaqina? Gebu!

²⁶ ^h "Ya'a Tomotau Natuna 'eguma taha toga weaigigu ta wese egu ve'ita weaqina nainiyauyau ta navegeqegu, e ya'a wese tauna ena vegeqea tuta~nana ya'a me egu simatala qiduana, ta wese Tamagu ena tovale'ewayavo edi simatala aqiaqi otaqinega ena 'evivi mai. ²⁷ Yavona

^c 9:19 Lk 9:7-8 ^d 9:20 Ion 6:68-69 ^e 9:22 Lk 9:44; 18:32-33 ^f 9:23 Md 10:38; Lk 14:27
^g 9:24 Md 10:39; Lk 17:33; Ion 12:25 ^h 9:26 Md 10:33; Lk 12:9

aqiaqi 'imia, tomotau vaina 'imiega ba'idia otovotovololo ge ona 'aliga ana laba Yaubada ena 'Ebeluvine matamiega ona 'itea."

Ieisu ana 'ita vedumaduma
(Madiu 17:14-18; Maki 9:14-27)

²⁸Ieisu ana 'abiboda weaqina ve'itedi gumwala. 'Inega 'aubena 'eita (8) 'abibodanaya Fita be Ioni ta wese Iemesa Ieisu 'ebe'ewedi maega i'watovu taha bwanaga 'inaya sabi venoqi. ²⁹Tutana Ieisu nawale vevenoqi 'inega 'iawana ana 'ita vedumaduma ta wese ana kaleko vewadawadaeya otaqa kavonaya namala simatalina. ³⁰'Inega 'oloto magilafudi Mosese be Ilaitia i'ifoqe, ³¹ⁱ ta edi i'ifoqe kavona taha simatala qiduana dayayaqa. Ta Ieisu maega iveveqae ena 'aliga weaqina nawale Ielusalema 'inaya.

³²^j Ta Fita ma enavo 'wafidi lu'wata'wata 'abo i'eno nuafani i'eno'eno. Ta tuta~nana iya'itoto 'inega Ieisu simatalina qiduana i'itea, ta wese 'oloto magilafudi di'wenaya itovotovololo i'itedi. ³³Tuta goyona magilafudi Ieisu ina nogei, 'inega Fita Ieisu 'inaya vonaya, "Kaiwabu, luaqiaqieda 'eguma ba'idia kana toatoa! 'Inega didi toi ana yoqonidi, taha o'a weaqiu ta taha Mosese weaqina ta wese taha Ilaitia weaqina." Ba'e 'idewani Fita vona 'aiqa, mana ge dahalamaniana tola'ai vonevonei.

³⁴Fita nawale vonavona, 'inega debadia taha gawata webui mai talakabubudi 'inega to'abiboda~dina imwaniniva. ³⁵^k 'Inega gawatega taha bona inoqolia vonaya, "Ba'e Natu Otaqigu vevenua'ivinina. Tauna ena vona ona noqolia!"

³⁶Ta bona~nana ni'a awala, 'inega Ieisu ana 'aidega i'itea to'otovololo. Ta tola'ai matadiega ni'a i'itea ge taha toga 'inaya ida vevonavonayei, ta 'esi yani qabuna nuadia i'waivea. Ta 'abibodanaya isimana 'ifoqeyea.

Ieisu taha gwama giveaqiaqiea niboana luveifana 'inega
(Madiu 17:14-18; Maki 9:14-27)

³⁷Ni'au mahala vulihia 'inega Ieisu ma ana to'abibodayavo toidi bwanagega iwebui mai, 'inega yo'o qiduadi maega ivelobaloba. ³⁸'Inega taha 'oloto yo'o~dina gamodiega Ieisu 'itea 'inega gabea voneaya, "Tove'ita, yanoqinoqi 'iuya nuanuagu natugu me'olotona una 'itea, mana tauna natugu 'aidega otaqina. ³⁹Ta tuta qabuna niboana luveifana ena waiwaiega natugu kafikafia ta 'inega doudou, ta wese vevekaoya ta tafetafefwai, be wese 'awanega fulofulo 'ifo'ifoqe. Ta niboana~nana tuta qabuna gamonaya toatoa, 'inega visiqi qiduana lulutonovia ta tuta goyona na'aliga. ⁴⁰Ta au to'abibodayavo yavenoqiedi vonigo ida 'wavini da'ifoqe, ta ge adi fata."

⁴¹'Inega Ieisu vonedi vonaya, "Omi'a ma'oda, tuta kuena ya'a maega katoatoa ta nuami nawale ge da'eqa'ui, ta tola'ai weaqina ge oda

ⁱ 9:31 Lk 9:22 ^j 9:32 2Fit 1:16-18 ^k 9:35 Lk 3:22

vetumaqanegu? Debami 'i'wanina 'inega 'wafigu siniquaiqi!" 'Inega Iesu 'oloto~nana voneaya, "Natuhu umiei ba'idia eda 'itei."

⁴² Ta tutana gwama~nana mai Iesu 'inaya, 'inega niboana luveifana felei webui bwa'obwa'oya ta vevekaoya. Ta Iesu niboana~nana lugwaeyei ta 'wavi 'ifoqeyea. 'Inega gwama~nana veaiaqi 'abo Iesu nei 'eviviea tamana 'inaya. Ta tomotau qabudi nuadi voqana qidwana Yaubada ena waiwai weaqina.

Iesu tuta vemagilafuna simana ena 'aliga weaqina
(Madiu 17:22-23; Maki 9:30-32)

⁴³ Tomotau qabudi nawale inuavoqana qidwana Iesu ena fewa weaqidi. 'Inega ana to'abibodayavo vonedi vonaya, ⁴⁴ ^l "Egu vona ba'e ena vonemi ona noqola aqiaqiea! Nawale taha toga ya'a Tomotau Natuna nasuluvegu ta nave'ineiegu agu aviayavo nimadia." ⁴⁵ ^m Ta Iesu ena vona ba'e ge ida alamania, mana ena vona a'ua'ukwaivina 'idia. 'Inega nuadi ge da'eqa'ui vona~nana weaqina. Ta wese imwaniniva 'inega ge nuanuadi Iesu ina vetala'aiei.

Togama qidwana?
(Madiu 18:1-5; Maki 9:33-37)

⁴⁶ ⁿ Iesu ana to'abibodayavo ive'ale taudiega ive'ae'aetoga vonigo toga gamodiega naveqidua va'ine. ⁴⁷ Ta Iesu edi nuanua ni'a alamania, 'inega taha gwama 'ebe'ewei miea ta di'wenaya vetovoloya ta vonedia, ⁴⁸ ^o "Gwama ba'e ona 'itea, 'eguma taha toga gwama ba'e 'idewana agu wawega veveyolubea, e 'inega wese veveyolubegu. Ta 'eguma taha toga veveyolubegu 'inega tauna agu Tovetune wese veveyolubea. 'Inega 'eguma taha toga 'imiega ana wawa goyona, e tauna qidua va'inena."

Togama ana fata Iesu ana wawa navefewei?
(Maki 9:38-40)

⁴⁹ Ta Ioni Iesu voneaya, "Kaiwabu, taha 'oloto a'itea au wawega niboana luveifadi 'wavinidi i'ifoqe tomotau 'idiega. 'Inega ahawatayea mana 'oloto~nana tauna ge iada."

⁵⁰ ^p Ta Iesu voneaya, "Ge ona awatayei! Mana 'eguma taha toga ge davevoalaneda e tauna ada toiula."

Me Samelia vaina Iesu inogea

⁵¹ Iesu ena 'evivi mahalaya ana tuta ni'a vadi'wea, 'inega vemanini tutuvila natauya Ielusalema weaqina. ⁵² Ta nawale tautauya 'inega Iesu

^l 9:44 Lk 9:22 ^m 9:45 Lk 18:34 ⁿ 9:46 Lk 22:24 ^o 9:48 Md 10:40 ^p 9:50 Md 12:30;
Lk 11:23

vaina tomotau kavona tovale'ewa vetunedi inugweta itauya me Samelia edi 'abaga taha 'inaya nuanuana vaina yani ina 'iva'ava'aia weaqina. ⁵³ Ta totoa 'abaga ge nuanuadi Ieisu nalugu edi 'abagaya, mana ialamania tauna tautauya Ielusalema 'inaya. ⁵⁴ Ta ana to'abibodayavo Iemesa ta Ioni vale ba'e inoqolia 'inega Ieisu ivoneaya, "Kaiwabu, nage nuanuau 'aiwe 'ala'alata mahalega ana gabei nawebui mai 'inega 'abaga~nana ana totoayavo na'ala 'ovoidi?"

⁵⁵ Ta Ieisu tunugivila ta awatayedi, ⁵⁶ 'inega itauya mali 'abagaya.

'Oloto toidi nuanuadi Ieisu ina 'abibodea

(Madiu 8:19-22)

⁵⁷ Ta nawale itautauya 'inega taha 'oloto mai Ieisu 'inaya ta voneaya, "Ma'inaya utautauya nuanuagu be ena 'abibodeu."

⁵⁸ 'Inega Ieisu 'oloto~nana ena vona ve'iea vonaya, "Bwadu'e ma adi vetoa ta wese manu ma adi nevuqa, ta ya'a Tomotau Natuna ge taha egu 'ebeveyawaimo."

⁵⁹ 'Inega taha wese 'oloto mai, ta Ieisu voneaya, "U'abibodegu!"

'Inega 'oloto~nana vonaya, "Kaiwabu, una awafelegu ena 'evivi 'abagaya tamagu ena tavuna nugwetea, ta 'abiboda ena mai ena 'abibodeu."

⁶⁰ Ta Ieisu voneaya, "Eguma uvetumaqana aqiaqiegu una 'abibodegu, ta tomeqabu niboanidi 'ali'aligidi e taudiega edi to'aligayavo ina tavunidi. Ta o'a una tauya ta una simana Yaubada ena 'Ebeluvine weaqina."

⁶¹ Ta taha wese 'oloto mai vonaya, "Kaiwabu, ena 'abibodeu ta nugweta una awafelegu ena 'evivi 'abagaya egu gadeavo ena lukafoiedi ta 'abiboda ena mai ena 'abibodeu."

⁶² 'Inega Ieisu 'oloto~nana voneaya, "Eguma taha toga nuanuana Yaubada ena 'Ebeluvine weaqina nafewa, ta ena kulufa be wese ena susu nanuaidi, e 'inega tauna ge ana fata."

Ieisu ana to'abibodayavo adi yau 72 luvetunedi

10 ¹ Ieisu ena vona gumwala, 'inega to'abiboda adi yau 72 wese venua'ivinedi 'abo lua be lua luvetunedi ina nugweta 'abaga taha taha 'idia, ta tomotau qabudi ina 'iva'ava'aidi Ieisu ena mai 'idia weaqina.

² 'Inega Ieisu vona sesebaiega vonedi vonaya, "Bolimana qiduana ana tuta ni'a 'ifoqe ta toala ge 'ealidi, 'inega bolimana ana Kaiwabu 'inaya ona venoqi be yaqisa tofewa 'eala navetunedi ena vaoqaya sabi ala.

³ "Ona tauya, ta ge ona nuafania ya'a yavevetunemi kavona lami yubai sasasadi nuanidia. ⁴ Ta ge mane nage kode nage ami 'aqeyafayafa

^q 9:54 2Kin 1:9-16 ^r 9:61 1Kin 19:20 ^s 10:1 Mk 6:7 ^t 10:2 Md 9:37-38; Ion 4:35

^u 10:3 Md 10:16 ^v 10:4 Md 10:7-14; Mk 6:8-11; Lk 9:3-5

ona 'ewedi. Ta wese tauya nana 'inaya ge ona vavenuana ta ona lukaiwa tomtout 'idia.

⁵“Ta tuta nana ona lugu taha vanue 'inaya, e nugweta tonivanue ona vona veyolubea ona vonaya, 'Nuadaumwala 'iuya ta wese eu gadeavo maega!’ ⁶Ta 'eguma tonuadaumwala toatoa e 'inega emi veyoluba 'inaya na'eno vataya. Ta 'eguma tonivanue~nana 'oloto lueifana e 'inega veyoluba~nana na'evivi namai 'imia. ^{7w}'Inega tonuadaumwala 'inaya ona toatoa ta 'abwaga be go'ila 'iawamia naha'uya e ona 'ai, mana tofewa luaqiaqiedi adi ve'ia ina lobe. Ta ge ona lugu kavokavovo vanue taha taha 'idia.

^{8x}“Ta 'eguma taha 'abaga 'inaya ona lugu ta ina 'ebe'ewemi 'idia, e 'inega tola'ai wese 'iawamia ina a'uya e ona 'ai. ⁹Ta wese 'abaga~nana ana totoayavo edi tovevhiqayavo ona giveaqiaqiedi, ta ona vonedi ona vonaya, 'Yaubada ena 'Ebeluvine ni'a mai di'wemia.' ¹⁰Ta 'eguma taha 'abaga 'inaya ona 'ifoqe ta ge nuanuadi omi'a, tua ta ona lugu ta ona vonedi ona vonaya, ^{11y}'O'itei, emi 'abaga fwayafwayana 'aqemega avavutuvutuqa yavulea emi noga weaqina. Ta ona alamani, Yaubada ena 'Ebeluvine ni'a vadi'wemi!’ ^{12z}Yavona aqiaqiemi, nawale vetala'ai ana tuta 'inaya me Sodoma luvine ina lobe, ta tomeqabu ge nuanuadi ina 'ebe'ewemi edi 'abagaya e taudina luvine qidua va'inena ina lobe, ta 'abiboda Sodoma.”

Ieisu ena vona waiwaina vaina 'abaga weaqidi
(Madiu 11:20-24)

¹³'Inega Ieisu 'abaga diavona ana totoayavo weaqidi vonaya, “Me Kolesini be me Bedesaida nuakolokolomi, mana 'ebenuavoqana ni'a yaviaqidi 'imia ta ge oda nuagivila. Ta 'eguma me Taia be me Saidoni 'idia lova 'idewani eda maduviaqia ida nuagivila, be edi vaiqavu 'inega taudiega ida ve'itayedi ni'a edi ilivu lueifana 'idiega inuagivila. ¹⁴Ta vetala'ai ana tutaya me Taia be me Saidoni luvine ina lobe, ta omi'a luvine qidua va'inena ona lobe, ta 'abiboda Taia be Saidoni. ¹⁵Ta me Kafaneumi omi'a ma'oda? Nage onuaia vonigo Yaubada ami wawa nagivaneyea mahalaya, waisa? Gebu! Nawale ona webui 'aiwe 'ala'alata 'inaya.”

^{16a}“'Inega Ieisu ana to'abibodayavo vonedia, “'Eguma taha toga emi vona nanoqolia e 'inega wese egu vona nanoqolia. Ta 'eguma taha toga nanogemi, e 'inega ya'a wese nanogegu ta wese tauna agu Tovetune nanogea.” Ieisu ena vona gumwala 'inega luvetunedi itauya.

To'abiboda 72~dina i'evivi imai Ieisu 'inaya

¹⁷Ta to'abiboda 72~dina me edi qaiawa ni'a i'evivi imai Ieisu 'inaya ta ivoneaya, “Kaiwabu, ema luvivila 'inaya yani qabuna 'ebenuavoqana

^w 10:7 1Kol 9:6-14; 1Tim 5:18 ^x 10:8 1Kol 10:27 ^y 10:11 Via 13:51; 18:6

^z 10:12 Nug 19:24-25; Md 10:15; 11:24 ^a 10:16 Md 10:40; Lk 9:48; Ion 5:23

aviaqidi, ta wese niboana luveifadi imatayagema i'ifoqe tuta~nana au wawega a'wavinidi."

^{18 b} 'Inega leisu vonedia, "Idewani, mana lova Seitani ya'itea mahalega 'avalata'ia webui mai kavona namala. ^{19 c} Ta wese egu luvine be egu waiwai ni'a yaneimi, 'inega ami fata ona vewaiwai ta ami avia Seitani ena waiwai ona vewaiwai va'inea, ta wese mwata be bunelala ona vataqodi ta ge ona veilage. ^{20 d} Ta ge ona qaiawa niboana luveifadi edi matayaga 'imia weaqina, ta 'esi ona qaiawa qiduana mana ami wawayavo Yaubada ni'a 'wayavia mahalaya."

Iesu ena qaiawa
(Madiu 11:25-27; 13:16-17)

²¹ Tuta omo'e 'inaya Niboana Gwalagwalana ena qaiawa qiduana lugu Iesu 'inaya ta giveqaiawea, 'inega Iesu vonaya, "Tamagu, yahawahawatubou, o'a mahala be bwa'obwa'o ana Kaiwabu! Yani ba'e ua'ukwaivea toalamaniavo 'idiega, ta 'esi gogama goyogoyodi 'idia uve'itayea. Vonahaqiaqi Tamagu, ba'e eu nuanua aqiaqina."

^{22 e} Ta wese vonaya, "Tamagu yani qabuna nimaguya ni'a a'uya. Ge taha toga dahalamanigu, ta Tamagu ana 'aidega. Ta wese ge taha toga Tamagu dahalamaniana, ta ya'a agu 'aidega yahalamaniana. Ta wese tomeqabu nuanuagu ena venua'ivinedi be Tamagu ena ve'itayea 'idia, e taudi wese Tamagu ina alamaniana."

²³ 'Inega Iesu tunugivila ana to'abibodayavo 'idia vonaya, "Omi'a ona qaiawa qiduana, mana yani qabuna matamiega ni'au o'itedi. ²⁴ Yavona aqiaqiemi, lova tovesimasimanayavo ta toluvine qiduquadi qabudi nuanuadi ba'e yani diavona ina 'itedi ta ge ida 'itei. Ta wese vona~nana ni'au onoqolia taudi wese nuanuadi ina noqolia, ta ge ida noqoli."

Samelia 'olotona aqiaqina vona sesebaina

^{25 f} Taha tuta luvine ana toalamani qiduana mai Iesu 'inaya nuanuana nasitonovia 'inega voneaya, "Tove'ita, tola'ai ena viaqi be yawaigu vataya ena lobei?"

²⁶ 'Inega Iesu voneaya, "Luvine qabudi Mosese 'wayavidi Buki Nugwenugweina 'inaya nage ni'a ualamanidi, waisa?"

^{27 g} 'Inega 'oloto~nana voneaya, "Vonahaqiaqi, ba'e 'idewana vonaya, 'Kaiwabu eu Yaubada una veyolubea giwaliuyega be, niboaniuyega be, eu waiwaiega ta wese eu nuanua qabuna 'inega.' Ta wese vonaya, 'Iau una veyolubea 'idewani tau'u uveveyolubeu.' "

^b **10:18** Ion 12:31; Ve 12:8-9 ^c **10:19** Same 91:13; Mk 16:18 ^d **10:20** Fil 4:3; Ve 3:5
^e **10:22** Ion 3:35; 10:15 ^f **10:25** Md 22:35-40; Lk 18:18 ^g **10:27** Luve 6:5; Luvu 19:18

28^h Ta Ieisu voneaya, “Vonahaqiaqi, ’inega ’eguma ’idewani una viaqa ’aiqa yawaiu vataya una lobeal!”

29 Ta ’oloto~nana ni’a alamania luvine~dina ge da’abiboda aqiaqiedi, ’inega nuanuana ena luveifana weaqina taunega navata’ita’iea, ’inega vetala’ai taha vitana Ieisu neia, ta voneaya, “Isana toga iagu?”

30 Inega Ieisu vona sesebaiega ’oloto~nana vonea vonaya, “Taha ’oloto Ielusalemega tutuvila tautauya Ieliko weaqina. Ta ’edaya tovanawala ilobei ta ikafia, ’inega ana kaleko iabu yavulei ta ivunuqa veiveifea tuta goyona da’aliga, ’abo inogei ta itauya. 31 Nawale ’edaya ’eno’eno ’inega taha toveguba mai ’edanegana, ta ’ita naqo toveilae~nana ’itea ta vakesi tauya. 32 Ta wese ’idewani taha ’oloto mai ’edanegana, tauna Libai ena gadeyega, ta ba’e gade dina taudi toveguba adi toiulayavo. Ta tauna wese toveilae~nana ’ita naqoyeamo ta tauya.

33 “Ta ’abiboda taha Samelia ’olotona wese mai ’edanegana ’inega toveilae~nana ’itea ta nuakolokoloyea. 34 Inega naqo di’wenaya ta dede’wa be ’oine ’ewedi ’abo ana ’abia ’awanaya iwaqidi ta fainidi. Inega ena donikia vegelui, ta magilafudi itauya wagawaga edi vanuea ta omo’e ’inaya ’itamakia.

35 “Ta mahala vulihia ’inega mane magilafuna vanue~nana ana to’itamaki neia ta voneaya, ‘Toveilae ba’e una ’itamakia weaigu, ta ’eguma ’evisa mane wese una a’uya toveilae~nana weaqina, ’inega tuta~nana ena ’evivi ena mai e ena ve’ieu.’ ”

36 Inega Ieisu toalamani~nana vetala’aiea vonaya, “Ba’e ’oloto diavona toidi ’idiega, toga toveilae~nana ia otaqina?”

37 Inega toalamani~nana vonaya, “Tauna toveilae~nana ana tonuakolokolo.”

’Inega Ieisu voneaya, “Vona aqiaqi, ’inega una tauya ta wese ’idewana una viaqa ’aiqa.”

Ieisu ena vayausa Meli be Mata ’idia

38 Ta Ieisu ma ana to’abibodayavo wese itutuvila itautauya, ’inega taha ’abaga ’inaya i’ifoqe. Ta vavine taha ana wawa Mata Ieisu ’ebe’ewei itauya ena vanuea. 39ⁱ Ta vavine~nana taina ana wawa Meli wese vanuea toatoa. Ta Meli~nana mai Ieisu ’aqenaya toabui ta ena vona vivineneqea. 40 Ta Mata ’abwaga ’iva’ava’aia ta fewa qabuna viaviaqia, ’inega mai Ieisu ’inaya ta voneaya, “Kaiwabu, ma’oda taigu o’a maega otoatoa, ta ge daiulegu. Inega una vonei naiulegu!”

41 Inega Ieisu voneaya, “Mata, Mata, tola’ai weaqina yani qabuna weaqidi unuanua? 42^j Ta ’esi yani ’aideganamo weaqina una nuanua, ’idewani taiu Meli. Tauna ena nuanua ’inega yani aqiaqi otaqina ni’a

^h 10:28 Luvu 18:5 ⁱ 10:39 Ion 11:1; 12:2-3 ^j 10:42 Md 6:33

venua'ivinea mana nuanuana egu vona nanoqolidi, 'inega ge taha toga nahawatayei."

Ieisu ena ve'ita venoqi weaqina

(Madiu 6:9-13; 7:7-11)

11 ¹Taha tuta Ieisu ana 'aidega di'we taha 'inaya vevenoqi. Ta ena venoqi 'abibodanaya ana to'abiboda taha voneaya, "Kaiwabu, venoqi weaqina una ve'itema 'edewana Ioni ana to'abibodayavo ve'ita 'aiqedi."

²'Inega Ieisu vonedia,

"Ba'e 'edewana ona noqi 'aiqa,

'Tamama,

au wawa gwalagwalana ana 'amayabea,

ta nuanuama una luvinema.

³Nuanuama ama 'abwaga

tuta qabuna una neima.

⁴Ta ema luveifana una nuataqodi

'idewana ima'a tomotau

iveilivu veifa 'imaya anuataqodi.

'Ebesitonova 'inaya gebu una awafelema.' "

⁵Ta Ieisu wese vonedia, "Ebevetalatutula taha ena neimi venoqi ana alamani weaqina, e ba'e 'edewani: 'Eguma taha iau luluvaiega tou gamonaya namai 'iuya, ta ge taha tola'ai 'iuya da'eno'eno be una neia na'ai. 'Inega taha iau 'inaya una tauya be una venoqiea una vonaya, 'Iagu, nage ana fata una iulegu be beledi toi una neigu, ⁶mana iagu taha luluvaiega mai ta ge taha kulaqea 'iguya be ena neia na'ai."

⁷"'Inega 'oloto~nana vanue gamonega eu vona nave'iea navonaya, 'Iagu, ge una vedivanovano, mana natugwavo maega a'eno'eno ta wese 'awa ni'au yagibodea, 'inega ge agu fata be ena iuleu.' ⁸Ta yavona aqiaqiemi, 'eguma iau navemanuguba, 'inega o'a una 'alataya 'inaya, 'inega naya'itoto ta tola'ai weaqina uvevenoqiea naneiu, mana ge nuanuana nawale tomotau ina 'awaluveifei.

⁹"'Inega yavonemi, ona venoqi 'inega Yaubada naneimi, wese ona sali 'inega ona lobe, ta wese ona 'auveida'a 'inega 'awa na'ewa'ea weaqimi.

¹⁰Mana tomeqabu inoqinoqi Yaubada naneidi, ta tomeqabu isalisali nawale ina lobe, ta wese tomeqabu 'awaya i'au'auveida'a nawale na'ewa'ea weaqidi.

¹¹"Ta ma'oda omi'a, 'eguma natumiavo 'iqana weaqina inoqinoqi nage dadabweta ona neidi? ¹²Ta wese 'eguma fo'u weaqina ina venoqi 'imia nage bunelala ona neidi? Gebu'e otaqa! ¹³Vonahaqiaqi, omi'a luveluveifami, ta ni'a oalamanianatumiavo 'idia yani aqiaqi dimo ona neidi, 'inega ona alamani aqiaqiea tomeqabu inoqinoqi Tamami mahalaya

ena 'iwavo aqiaqi otaqina naneidi. 'Inega 'eguma tomeqabu ina venoqiea Niboana Gwalagwalana weaqina e 'inega naneidi."

Ieisu be niboana luveifadi edi kaiwabu

(Madiu 12:22-30; Maki 3:20-27)

¹⁴Taha tuta 'inaya Ieisu taha 'oloto lobe a niboana luveifana meana givilea 'inega ge ana fata navona. Ta Ieisu niboana luveifana 'wavini 'ifoqe, 'inega 'oloto~nana meana tunuqa ta veqae. Ta tomotau qabudi yani~nana i'itea inuavoqana qiduana. ¹⁵⁻¹⁶^k Ta tomotau vaina nuanuadi Ieisu ina sitonovia 'eguma 'ebe'ita taha mahalega naviaqi ina 'itea. Ta wese vaina taudiega ivonaya, "Niboana luveifadi edi kaiwabu Belisibubi ena waiwaiega Ieisu niboana luveifadi 'wavi'wavi 'ifoqeyedi."

¹⁷Ta Ieisu edi nuanua ni'a alamania 'inega vonedia, "Belisibubi ge ana fata enavo na'wavinidi ina 'ifoqe. Ta 'eguma taha 'ebeluvine 'inaya tomotau ina ve'eto'eto'idi ta taudiega ina vevedavi, e nawale 'ebeluvine~nana nadawalili ta nabe'u. Ta wese 'edewani 'eguma taha gade taudiega ina vevedavi nawale edi toa luveifa otaqina ina lobe a. ¹⁸Seitani wese 'edewani 'eguma ma enavo taudiega ina vevedavi, nawale ena 'ebeluvine nadawalili ta nabe'u. Ta ya'a egu vona ba'e 'idewani mana omi'a ovonaya be ya'a Belisibubi ena waiwaiega niboana luveifadi eda lulu'wavina 'ifoqeyedi. ¹⁹Omi'a ba'e 'idewani oveve'ewegu, ta ma'oda omi'a ami to'abibodayavo nage wese oveve'ewedi vonigo niboana luveifadi ilulu'wavina 'ifoqeyedi Belisibubi ena waiwaiega? 'Inega ami to'abibodayavo wese ni'a ialamania omi'a emi vona ge tunutunuqina. ²⁰Ta 'esi ya'a Yaubada ena waiwaiega niboana luveifadi yalulu'wavina 'ifoqeyedi, e 'inega ona alamania Yaubada ena 'Ebeluvine ni'au 'ifoqe 'imia.

²¹"Seitani tauna kavonaya taha 'oloto waiwaina me ena kulufa 'ebeluvina ta ena vanue agona ta kaikaiwabuna 'ita'itamakia, 'inega ge taha toga ana fata ena kulufayavo nawanawali. ²²^l Ta 'eguma taha 'oloto waiwai otaqina na'ifoqe namai, e nawale 'oloto~nana Seitani navunuqi ta ena 'abiyavo nimanega naneboi ta ena kulufa qabudi naluqononidi navewila'ayedi enavo 'idia.

²³^m "Eguma taha toga ge ya'a maega e tauna agu avia. Ta wese 'eguma taha toga ge naiulegu be tomotau ge nava'auqidi, e tauna egu fewa ana togiveluveifa."

Niboana luveifana 'evivi taha 'oloto 'inaya

(Madiu 12:43-45)

²⁴"Ta tuta~nana niboana luveifana 'oloto taha 'inega 'ifoqe ta 'oloto~nana veaqiaqi, 'inega niboana~nana tauya di'we go'ila geqana

^k 11:15-16 Md 9:34; 10:25; Md 12:38 ^l 11:22 Kol 2:15 ^m 11:23 Lk 9:50

'inaya yabayaba dadana be ena 'ebeveyawai salisalia ta ge taha dalobei. 'Inega taunega vonaya, 'Ana 'ita ena 'evivi lova egu 'ebetoaya.' ²⁵ 'Inega 'evivi lova ena 'ebetoa 'inaya ta 'itea vunavunaqina ta 'i'iva'ava'aina. ²⁶ 'Inega 'evivi tauya ta niboana luveifa otaqidi adi yau seveni 'ebe'ewedi miedi maega ilugu 'oloto~nana 'inaya ta itoatoa. 'Inega 'oloto~nana ena toa igiveluveifa aqiaqiea, ge 'edewani lova."

²⁷ "Ieisu ba'e 'idewani nawale vonavona tomotau qabudi 'idia, 'inega taha vavine qabu~dina 'idiega bonana qiduanega gaba Ieisu 'inaya vonaya, "Kaiwabu, vavine~dina ivenatuneu ta wese ivesusuhu veyoluba qiduana 'idia!"

²⁸ Ta Ieisu voneaya, "Tomeqabu Yaubada ena vona inoqolia ta ivelumamatayagea, e taudi toqaiawa aqiaqi."

Iona tauna 'ebe'ita 'idaya

(Madiu 12:38-42)

²⁹ "Ta ni'au tomotau adi yo'o veqidua va'ine 'inega Ieisu vonedi vonaya, "Lagata ba'e omi'a luveluveifami! Nuanuami 'ebe'ita taha ona 'itea. Ta 'ebe'ita 'aideganamo ena neimi lova Iona 'idewani nawale ona 'itea, ta'iwa! ³⁰ Mana Iona tauna me Ninibe edi 'ebe'ita, ta ya'a Tomotau Natuna omi'a lagata ba'e emi 'ebe'ita. ³¹ "Vonahaqiaqi, vetala'ai ana tuta 'inaya me Siba edi kwini naya'itoto be omi'a lagata ba'e nave'ewemi, mana vavine~nana luluvaiega lova mai toalamani qiduana Solomoni ena vona sabi noqolina. Ta ba'e 'itaga taha 'oloto Solomoni ena alamani veqidua va'inea mai toatoa, ta ena vonayavo omi'a ge nuanuami ona noqolidi.

³² "Wese 'edewani vetala'ai ana tuta 'inaya me Ninibe ina ya'itoto ta omi'a lagata ba'e ina ve'ewemi, mana Iona 'idia lugaihi, 'inega edi ilivu luveifana 'idiega inuagivila. Ta ba'itagana lugaihi aqiaqi otaqina onoqonoqolia taha 'oloto 'inega, tauna Iona ena lugaihi veqidua va'inea, ta omi'a ge oda nuagivila."

Lamufa vona sesebaina

(Madiu 5:15; 6:22-23)

³³ "Ge taha toga lamufa nagabui ta naha'ukwaivei, nage 'ulenega natalakabubui, ta 'esi luaqiaqiea 'ebea'u debanaya naha'uya, be 'inega taudi vanuea ilugulugu navesimalalidi. ³⁴ Ba'e 'idewani matau 'wafiu ana simatala, ta 'eguma matau aqiaqina 'inega 'wafiu qabuna simasimalalina. Ta 'eguma matau luveifana 'inega wese 'wafiu qabuna navelovelovanea. ³⁵ 'Inega una 'itamaki aqiaqieu be yaqisa eu lamufa gamouya ge na'weu'weu. ³⁶ 'Inega 'eguma 'wafiu qabuna 'inaya simatala 'eno'eno ta

ⁿ 11:27 Lk 1:28,42,48 ^o 11:29 Md 16:4 ^p 11:31 1Kin 10:1-10 ^q 11:32 Ioa 3:5-10

^r 11:33 Mk 4:21; Lk 8:16

ge taha wese velovelovana 'inaya, e 'inega 'wafiu qabuna simasimalatina, kavonaya lamufa qiduana ena simatala.”

Falisiavo be luvine ana toalamaniavo Iesu lugwaeyedi
(*Madiu 23:1-36; Maki 12:38-40*)

³⁷Ta tuta~nana Iesu ena vona lu'ovoia 'inega taha Falisi Iesu 'ebe'ewea itauya sabi 'ai. 'Inega Iesu lugu 'abo toabui 'ebe'ai 'inaya. ³⁸Ta Falisi~nana nuana voqana mana 'itea Iesu nimana ge da'utui ta 'ai'ai. ³⁹Ta Iesu Falisi~nana ena nuanua ni'a alamania 'inega voneaya, “Omi'a Falisiavo kavonaya vedi be kaivoe gwavu dimo 'utu'utudi ta gamodi ge adi 'utumo, mana giwalimi bwavubwavudi 'inega vemanuguba be ilivu luveifadi giwalimiega 'ifo'ifoqe. ⁴⁰Kwavakwavami! Mana ni'au oalamanian gwavumi be giwalimi adi To'iva'ava'ata Yaubada. ⁴¹Ta luaqiaqemi be giwalimi ona awafeledi lukwalukwa 'idia be 'inega ona vevunavunaqa aqiaqi.

⁴²“Ta omi'a Falisiavo nuakolokolomi! Vonahaqiaqi, emi nei kavovo aqiaqina oneinei kavovo be ana luvine qabuna o'itamaki aqiaqiea. Ta vaina yani goyogoyodi Yaubada 'inaya oa'ua'udi 'edewani mali fai be mali fai 'idiega. Ta luvine magilafudi onuafanidi 'idewani ma'oda Yaubada ona veyoluba 'aiqei, ta wese ma'oda tomotau ona vanugweta 'aiqedi luvine 'aideganega.

⁴³“Omi'a Falisiavo nuakolokolomi! Mana vanue tafwalolo 'inaya 'ebetoa aqiaqidi 'idia otoatoa, ta wese tutana otautauya 'ebegimwane 'idia nuanuami tomotau qabudi ina lukaiwa 'imia ta ina 'amayabemi.

⁴⁴Nuakolokolomi, mana omi'a kavonaya tomotau 'ali'aligidi ta ami deba'unu debanaya tomotau iyabayaba, ta ge ida alamanian bwa'obwa'o gamonaya o'eno'eno.”

⁴⁵'Inega taha luvine ana toalamani qiduana Iesu vonea vonaya, “Tove'ita, eu vonayavo ba'e 'idiega ima'a wese uinalima.”

⁴⁶Ta Iesu voneaya, “Omi'a luvine ana toalamaniavo qiduami wese nuakolokolomi, mana luvine qabudi 'idiega tomotau 'ava'avala vitadi oneineidi, ta omi'a taumiega ge nuanuami ona awafelemi be vita diavona 'idiega ona iuledi. ⁴⁷Nuakolokolomi, mana tubumiavo tovesimasimana iluve'aligidi, ta omi'a deba'unudia adi 'ebenuave'avina oviaqia. ⁴⁸Ta yani ba'e 'inega tubumiavo edi ilivu luveifana o'awahaqiaqiea, mana taudi tovesimasimana iluve'aligidi ta omi'a adi deba'unu oveve'ivala aqiaqiedi. ⁴⁹Yani ba'e weaqidi Yaubada ena alamani qiduana vona 'ifoqeyea tutana vonaya, 'Tovesimasimana be tovaletuyana ena vetunedi ina wai be vaina ina luve'aligidi ta wese vaina ina vevoalanedi.”

⁵⁰“'Inega lagata ba'e omi'a nawale luvematasabu qiduana ona lobe a tovesimasimana qabudi sulalidi weaqina bwa'obwa'o ana tuta 'ebeve'ale 'inega. ⁵¹Eibolo ana luve'aliga 'inega be mai Sakalaia ana luve'aliga

'inaya, tauna iluve'aligia Vanue Gwalagwalana ta 'ebeveguba nuanidia. Vonahaqiaqi, luve'aliga diavona adi ve'ia lagata ba'e omi'a ona 'avalea.

⁵² “Ta omi'a luvine ana toalamani qiduqiduami, nuakolokolomi! Mana alamani ana 'awa ana 'ebesiva' oluve'waivia. 'Inega omi'a ge ami fata ona lugu, ta wese taudi nuanuadi be ina lugu oawatayedi.”

⁵³ Ta tutana Iesu di'we omo'e nokea, 'inega luvine ana tove'itayavo ta wese Falisiavo edi nualuveifa 'inega ive'ale i'awaluveifea ta ivetala'aiea yani taha taha weaqina. Ta edi vetala'ai qabuna 'idiega itoho waiwai ⁵⁴nuanuadi Iesu ena ve'ia 'inega ena luveifana ina lobei ta ina kafia.

Iesu ena lugaihi

(Madiu 10:26-27)

12 ¹Qabu qidua va'inedi iva'auta 'aideganaya ta di'we nana iveliave'alaia. Ta Iesu ana to'abibodayavo 'idia vonaya, “Ona 'itamakimi, mana Falisiavo edi 'eu'au'ava kavona falawa ana isiti 'idewani, 'inega ge ona 'abibodedi. ^{2s} Ta yani~dina 'wai'waividi nawale Yaubada nagive'ifoqeyedi ona 'itedi ta ona alamanidi. ³Ta wese tola'ai velovelovana 'inaya ovonayea nawale 'aubena 'inaya tomotau ina noqolia. Ta tola'ai ni'au ove'awahayahayayea vanue gamonaya nawale tomotau qabudi 'idia 'atamanaya ona vona 'ifoqeyea.

Togama kana mwaninivea?

(Madiu 10:28-31)

⁴“Egwavo, yavona aqiaqiemi tomeqabu adi fata 'wafimi ina luve'aligia ge ona mwaninivedi, mana adi fata 'wafi~mimo ina luve'aligia ta niboanimi gebu. ⁵Ta 'esi Yaubada ona 'amayabea, mana tauna ana fata ena luvineyega tomotau naluve'aligidi ta 'abiboda nafelawebuiedi 'aiwe 'ala'alata 'inaya. Vonahaqiaqi, ana 'aidega me emi 'amayaba ona mwaninivea.

⁶“Dagedage adi yau faibi kana vegimwaneyedi ta adi ve'ia mane goyosikwana, ta manu~dina Yaubada ge wese 'aidegana 'idiega nanuafania. ^{7t} 'Inega ge giwalimi naha'ala, mana omi'a Yaubada ena yani qiduana, ta 'abiboda dagedage. Ta omi'a ge ami fata ami kia 'inaya debami adi yau ona alamanidi, ta 'esi Yaubada adi yau ni'a alamanidi.

Tomotau vaina Iesu i'awahaqiaqiea be wese vaina ivegeqea

(Madiu 10:19-20; 10:32-33; 12:32)

⁸“Ta yavona aqiaqiemi, 'eguma taha toga tomotau 'iawadia na'awahaqiaqiegu, e 'inega wese ya'a Tomotau Natuna Yaubada ena tovale'ewayavo 'iawadia ena 'awahaqiaqiea. ⁹Ta 'eguma taha toga

^s 12:2 Lk 8:17 ^t 12:7 Lk 12:24; Via 27:34

navegeqegu tomotau 'iawadia, 'inega ya'a wese nawale Yaubada ena tovale'ewayavo 'iawadia tauna ena vegeqea.

¹⁰ “Ya'a Tomotau Natuna 'eguma taha toga na'awaluveifegu ta 'abibodanaya nanuagivila, e 'inega ana fata Yaubada nanuataqoya. Ta 'eguma taha toga Niboana Gwalagwalana na'awaluveifea, e 'inega Yaubada gebu nanuataqoi.

¹¹ ^u “Ta tutana tomotau ina tauyemi vanue tafwalolo 'inaya ta ina vetala'aiemi emi vetumaqana weaqina kaiwabuyavo be toluvineavo 'iawadia, 'inega ge ona nuanua ma'oda edi vetala'ai 'imia ona vona 'evivi 'aiqedi, ¹² mana tuta~nana 'inaya Niboana Gwalagwalana namai 'imia nave'itemi tola'ai ona vonayea 'idia.”

Vona sesebai tovekaikaiwabu kwavakwavana weaqina

¹³ Ta qabu~dina 'idiega taha 'oloto Ieisu 'inaya vonaya, “Tove'ita, tuagu una vonai be 'ebeluvine dibuna naneigu, lova tamama 'inega 'ewea.”

¹⁴ Ta Ieisu 'olotona ena vona ve'iea voneaya, “Oloto, ya'a gebu agu fata ena luvine emi 'ebeluvine weaqina.” ¹⁵ ^v 'Inega Ieisu wese tomotau qabudi vonedi vonaya, “Ona 'itamaki aqiaqiemi vekaikaiwabu 'inega, mana nawale vekaikaiwabu~nana 'inega ona vemanuguba, ta ge taha toga ana fata ena kulufa qiduana 'inega yawai aqiaqina nalobei.”

¹⁶ 'Inega 'ebevetalatutula taha vona sesebaiega neidi vonaya, “Taha kaiwabu ena vaoqa 'idiega bolimana qiduana lobe. ¹⁷ 'Inega 'oloto~nana taunega nuana vetonovea vonaya, 'Bolimana qiduana 'iguya, ta egu sailakayavo gebu adi fata. 'Inega tola'ai ena viaqi? ¹⁸ Ana 'ita ba'e 'idewana ena viaqia. Nugweta sailaka 'itu'ituwaidi ena qeu yavuledi ta 'esi sailaka vauvaudi be qiduiduadi ena yoqonidi, 'inega 'abwaga ta wese egu kulufa qabudi 'idia ena vedododi. ¹⁹ Ta 'abiboda me egu qaiawa tauguyega ena vonaya, “Ya'a taha tovekaikaiwabu, yani qabudi aqiaqidi ni'a yaluveaqedi ana fata ya'wala 'evisa nalobe. 'Inega ena veyawai fewa 'inega ta me egu qaiawa ena toatoa, ta nonoqina ena 'ai'ai be ena numanuma.” ²⁰ Ta Yaubada 'oloto~nana 'inaya vonaya, 'O'a 'oloto kwavakwavau! Velovelovana ba'e 'inaya una 'aliga ta kulufa~dina ni'au uluveaqedi togama na'ewedi?”

²¹ ^w 'Inega Ieisu tomotau qabudi vonedi vonaya, “Vonahaqiaqi, 'eguma taha toga ena kulufa kaikaiwabuna na'iva'ava'aia taunega weaqina, ta ge nuanuana Yaubada maega ina veiaiana aqiaqi, e tauna kwavakwavana!”

Ge una nuanua yani taha taha weaqina

(Madiu 6:25-34)

²² 'Inega Ieisu ana to'abibodayavo vonedia, “Emi toa bwa'obwa'oya weaqina ge ona nuanua qiduana ami 'abwaga nage ami kaleko weaqidi.

^u 12:11 Mk 13:11; Lk 21:12-15 ^v 12:15 1Tim 6:9-10 ^w 12:21 Md 6:19-20

²³ Mana Yaubada yawaida ni'a neida, e 'inega wese ana fata nave'ainida be navekalekoda. ²⁴ Ba'e taha 'ebevetalatutula ona nuaia bwayobwayo weaqidi. Taudi ge ida dauna ta ge ida bolimana ta wese ge edi sailakamo, ta tuta qabuna Yaubada adi 'abwaga neineidi. Ta ona nuave'avinia omi'a yani 'ena'ina Yaubada 'inaya, ta 'abiboda manu.

²⁵ "Nage taha toga 'imiega ana 'abwaga be wese ana kaleko ana 'ewa 'ibe weaqina nuanua qiduana. Ta yavona aqiaqiemi ge taha toga ana fata ba'e nuanua~nana 'inega taunega ena tuta nagivekuei bwa'obwa'oya.

²⁶ Ta 'eguma ge ana fata yani goyona 'idewani ona viaqia, e 'inega ge wese ona nuanua yani qabuna weaqina.

²⁷ "Ta wese ona nuaia libi idina edi tutulagata weaqina. Taudi ge ida fewa, ta wese adi kaleko ge ida viaqidi. Ta vonahaqiaqi, kini Solomoni ana kaleko be wese ana 'ivalayavo adi 'ita aqiaqidi, ta libi idina adi 'ita aqiaqi otaqidi. ²⁸ Inega ona nuave'avinia Yaubada ena 'itamaki 'imia weaqina. Tauna ba'itagana libi idina veve'ivala aqiaqiedi, ta 'ibe ina mwatuqu be ina gabudi. Ta omi'a libi idina oveaqiaqi va'inedi, 'inega vonahaqiaqi ami kaleko naneimi. Omi'a emi vetumaqana Yaubada 'inaya dawalilina.

²⁹ "Ta gebu ona nuanua qiduana nage giwalimi naha'ala 'abwaga be go'ila weaqidi, ³⁰ mana tomeqabu ge ida vetumaqana ba'e yani diavona weaqidi inuanua qiduana. Ta Tamami Yaubada 'wafimi ana iula weaqina ni'a alamania, 'inega ami 'abwaga be ami go'ila ta wese ami kaleko neinei kavovomi. ³¹ Ta 'esi luaqiaqiemi Yaubada ena 'Ebeluvine ona sali nugwetea, 'inega 'abiboda ba'e yani diavona wese naneimi.

Kaikaiwabu mahalaya (Madiu 6:19-21)

³² "Ta omi'a 'idewani Yaubada ena sifiavo, 'inega ge ona mwaniniva, mana me ena qaiawa qiduana nuanuana ba'e 'itaga na'ebe'ewemi ena 'Ebeluvine 'inaya. ³³⁻³⁴ ^x Ta ona nuave'avinia ma'inaya emi kaikaiwabu 'eno'eno, e omo'e 'inaya emi nuanua wese natautauya. 'Inega emi kulufayavo ona vegimwaneyedi be manedi lukwalukwa 'idia ona vewila'ayea be 'inega mahalaya emi kaikaiwabu na'eno vataya. Ta kaikaiwabu~nana mahalaya 'eno'eno ge wese ena awalamo, mana ge taha wese tovanawala be nayanaya 'abaga~nana 'inaya ida toatoa be ina giveluveifei.

'Iva'ava'ata weaqina

³⁵ ^y "Inega omi'a ona 'iva'ava'ata aqiaqiemi ta wese emi lamufa na'ala'alata ta ona ba'eba'e. ³⁶ Ta ona ba'eba'e kavona tofewa edi lamufa

^x 12:33-34 Lk 18:22 ^y 12:35 Md 25:1-13

'ala'alata ta iba'eba'e edi kaiwabu ena 'evivi mai vaqi 'abwagana 'inega. Ta tuta~nana na'ifoqe be 'awaya na'auveida'a ina lukwayavoni 'awa~nana ina siwa'ei ta nalugu. ³⁷Ta luaqiaqiedi 'eguma edi kaiwabu nalobedi me edi 'iva'ava'ata itoatoa iba'eba'eyea, e 'inega nawale ina qaiawa. Vonahaqiaqi, edi kaiwabu nawale mali kaleko naveaqedi ta ena tofewa navonedi ina toabui ta tauna weaqidi nafewa ta adi 'abwaga naneidi. ³⁸Ta 'eguma wese tou gamonaya nage manu bodobodoya nalobedi me edi 'iva'ava'ata itoatoa e nawale wese ina qaiawa qiduana. ^{39z} Ta wese yani ba'e ona alamania, 'eguma tonivanue dahalamanian totutaya tovanawala lugu ena vanuea, 'inega tauna da'iva'ava'ata aqiaqi ta ena vanue da'itamakia be 'inega ge taha tovanawala ana fata daqeuni ta dalugu. ⁴⁰Inega omi'a wese ona 'iva'ava'ata aqiaqiemi be ona ba'eba'e egu tuta 'evivi mai weaqina, mana tuta omo'e 'inaya tomotau ina vegeqa ina vonaya, 'Ana 'ita ge namai!' E 'inega ya'a Tomotau Natuna ena 'ifoqe ena luveafedi."

Tofewa magilafudi weaqidi
(*Madiu 24:45-51*)

⁴¹'Inega Fita vonaya, "Kaiwabu, eu vona sesebai bena'ena nage ima'a mamu weaqima uvonavona, nage tomotau qabudi weaqidi?"

⁴²'Inega Ieisu vonaya, "Ya'a togwavubiga be toalamani weaqina yavonavona. Tauna ena kaiwabu navenua'ivinea ta ena vanue na'itamakia be tofewa qabudi adi 'abwaga naneidi 'aubena 'aidega 'aidega 'idia.

⁴³Ba'e tofewa~nana nawale naqaiawa, mana tuta~nana ena kaiwabu na'evivi namai nalobea fewafewa aqiaqina. ^{44a} Yavona aqiaqiemi, nawale kaiwabu~nana ena tofewa navonea ena kulufa ta wese ena kaikaiwabu qabudi adi luvine naneia be na'itamakidi. ⁴⁵Ta 'esi 'eguma tofewa~nana taunega navonaya, 'Egu kaiwabu nawale gigive'ove'o 'inega taugu egu nuanua ena viaqidi.' 'Inega tofewa me'olotodi be vivivinedi 'efofolidi ta ge wese adi 'abwaga daneidi, ta ana 'aidega 'ai'ai ta go'ila waiwaina numanuma 'inega vekwavakwava. ⁴⁶Ta taha 'aubena ena kaiwabu naluveafei namai ta ena fewa luveifana na'ita lobe. 'Inega luvematasabu qiduana naneia ta na'wavini natauya taudi tovegwavu'ai edi di'wea.

^{47b} "Ta 'eguma tofewa~nana ena kaiwabu ena nuanua ni'a alamania ta ana veyoveyoya ge daviaqidi, e tauna nawale luvematasabu qiduana nalobea. ⁴⁸Ta 'eguma taha toga ena kaiwabu ena nuanua ge nahalamanian ta nafewa veifa, nawale wese luvematasabu nalobea, ta 'esi tufwana goyona. Ta wese 'idewana 'eguma tofewa taha ana veyoveyoya qiduana, e luaqiaqiea be ena kaiwabu weaqina nafewa qiduana. Ta wese 'idewani 'eguma taha tofewa ana veyoveyoya qidua va'inena 'inega wese fewa qidua otaqina naviaqia ena kaiwabu weaqina."

^z 12:39 Md 24:43-44; 1Te 5:2 ^a 12:44 Md 25:21,23 ^b 12:47 Iem 4:17

Ieisu weaqina ve'eto'eto'idi na'ifoqe
(Madiu 10:34-36)

⁴⁹Ta Ieisu wese vonedi vonaya, “Ya'a yamai vonigo 'aiwe ena mu'ea ba'ade bwa'obwa'oya, ta nuanuagu qiduana 'aiwe~nana na'alata kwayavona. ⁵⁰^c Ta tuta goyona 'inaya taha babitaiso vitana ena lobe. 'Inega nuagu vita qiduana ana laba babitaiso~nana 'iguya ina viaqa 'ovoia. ⁵¹Ta omi'a ma'oda, nage emi nuanua vonigo egu mai bwa'obwa'oya 'inega toadaumwala ona lobe? Gebu! Ta 'esi nawale vedavi be ve'eto'eto'idi 'imia na'ifoqe. ⁵²Ta tuta ba'e 'inega gade gamodia ve'eto'eto'idi na'ifoqe. Ta gade~nana gamodia 'eguma tomotau adi yau faibi itoatoa nawale 'idiega toidi ina toasi'i ta wese magilafudi ina toasi'i. ⁵³^d 'Inega wese 'idewani tama natuna me'olotona navevoalanea, ta wese nawale natuna tamana navevoalanea. 'Idewani wese ina natudi mevavinena maega ina vevoalana, ta wese nawale natudi navevoalaneidi. Ta wese vivine lawadiavo maega ina vevoalana be ina vetoatoasi'i.”

Tuta adi alamani weaqina
(Madiu 16:2-3)

⁵⁴Ta Ieisu wese tomotau qabudi 'idia vonaya, “Tuta~nana gawata kwaukwausina ona 'itea yavalata 'inega nagalu navanevane 'inega ovonaya be nawale na'wei, e bena'e vonahaqiaqi. ⁵⁵Ta wese bolimana ana tuta 'inaya yaqina natoa 'inega ovonaya be tuta goyona ive na'ifoqe, ta bena'e wese vonahaqiaqi. ⁵⁶Omi'a toveameahaqila, mana bwa'obwa'oya yani qabuna adi 'ebe'ita ni'au oalamanidi. Ta tola'ai weaqina egu viaqayavo ni'au o'itedi weaqidi nuami ge da'eqa'ui?

Givetunuqa weaqina
(Madiu 5:25-26)

⁵⁷“Ta tola'ai weaqina taumiega ge oda nuanua aqiaqi vonigo toyani aqiaqina be toyani lueifana? ⁵⁸'Inega 'eguma au tove'ewa maega otautauya sabi kotu, luaqiaqieu be yani qabuna ona madugivetunuqa be 'inega tove'ewa~nana maega ona veiaiana 'evivi, fole nawale natauyeu toluvine matanaya, ta nave'ineieu folisi 'idia be ina a'uluguyeu vanue 'ebeyoqona 'inaya. ⁵⁹Ta yavoneu, ge wese una 'ifoqe ana laba ena mane qabuna una ve'ia 'ovoidi!”

Ve'ita nuagivila weaqina

13 ¹Omo'e tutana 'inaya vaina tomotau imai Ieisu 'inaya, ta ivematamagilafuyea me Galili vaina weaqidi ivoneaya, “Kaiwabu,

^c 12:50 Mk 10:38-39 ^d 12:53 Mai 7:6

vaina me Galili yubai ifofolidi ta iveguba Yaubada 'inaya, ta Failato ena toluaviayavo luvetunedi ta toveguba~dina iluve'aligidi."

^{2e} 'Inega Ieisu vonedi vonaya, "Ta omi'a nage onuaia taudi toveguba diavona me Galili qabudi edi luveifana qidua va'inena, 'inega omo'e luvmatasabu~nana qiduana ilobe, waia? ³Gebu! Ta omi'a 'eguma ge ona nuagivila emi ilivu luveifana 'idiega nawale wese veilae qiduana ona lobe. ⁴Ta ma'oda omi'a onuanua 'aiqa taudi me Sailoama adi yau 18 weaqidi tuta~nana taha vanue kuen 'avalaeuni webui luve'aligidi? Ta nage onuaia vonigo taudi edi ilivu luveifana qidua va'inena me Ielusalema qabudi 'idiega, ta 'inega veilae~nana ilobe, waia? ⁵Gebu! Ta omi'a 'eguma emi ilivu luveifana 'idiega ge ona nuagivila, e nawale qabumi wese 'idewani veilae qiduana ona lobe."

'Ala'ai vuaqa geqana

⁶'Inega Ieisu taha vona sesebai neidi vonedia, "Taha 'oloto ena vaoqaya 'aiwe 'ala'ai 'wadia 'oine ana loi nuanidia. Ta tuta qabuna maimai 'aiwe~nana 'inaya vuaqina sabi goluna ta ge taha wese vuaqina dalobe. ^{7f}'Inega ena vaoqa ana to'itamaki vonea vonaya, 'Ni'au ualamanian ya'wala toi 'idia yamaimai ba'e 'inaya 'ala'ai~nana weaqina sabi goluna, ta vuaqina ge taha tuta eda lobe. 'Inega ba'e 'itaga una talaqa yavule, mana bwa'obwa'o aqiaqina tovolodea.' ^{8g} Ta vaoqa ana to'itamaki ena kaiwabu ve'iea vonaya, 'Kaiwabu, 'eguma ana fata 'aiwe~nana ge ena talaqa yavulei, ta 'esi ena ve'avui be ena 'itamaki tonovia, 'inega omo'e ya'wala~nana 'inaya kana 'itea. ⁹Ta 'eguma navuaqa e natovole, ta 'eguma ge navuavuaqa e 'inega kana talaqa yavule."

Sabatea Ieisu vavine taha giveaqiaqiea

¹⁰Taha Sabate 'inaya Ieisu vanue tafwalolo taha 'inaya lugu 'inega veve'ita. ¹¹Ta vanue~nana 'inaya taha vavine wese toatoa, tauna ya'wala 18 gamonaya niboana luveifana giveluveifea, 'inega vevihia ta tuta qabuna ena tauya gwavuna kuyukuyu ta tautauya, ge ana fata natunuvane be natauya tunutunuqa. ¹²Ta tuta~nana Ieisu vavine~nana 'itea 'inega gabea vonaya, "Vavine umai, au vihiqa ni'a awala." ¹³Ta Ieisu nimanega vavine~nana gitonovia, 'inega lukwayavoni tunuvane ta Yaubada awatuboya.

^{14h} Ta vanue tafwalolo ana tovanugweta Ieisu ena viaqa 'itea, 'inega diana vilea mana Sabatea tovevihia giveaqiaqiea. 'Inega totafwalolo 'idia simana vonaya, "Vonahaqiaqi, 'aubena sikisi 'idia eda fewa kana viaqidi, 'inega luaqiaqiea be 'aubena diavona 'idia ona mai ami giveaqiaqi weaqina, ta ge wese Sabate 'inaya ona mai yani ba'e weaqina!"

^e 13:2 Ion 9:2 ^f 13:7 Lk 3:9 ^g 13:8 2Fit 3:9,15 ^h 13:14 'Ifo 20:9-10; Luve 5:13-14

¹⁵ ⁱ Ta Iesu ena vona ni'au noqolia 'inega vonaya, "Omi'a tovemeahaqila, mana Sabate 'aidega 'aidega 'idia emi yubai qabudi adi 'aliega oli'ali'amidi ta 'inega i'ifo'ifoqe 'abagaya ta adi go'ila ovevenumedi. ¹⁶ Ta ma'oda onuanua 'aiqa vavine ba'e weaqina? Nage ge ana fata ana vihiqa 'inega ena li'ami Sabatea be 'etoyavua nalobei 'edewani emi yubaiavo? Mana vavine ba'e Ebelamo ena gadeyega, ta Seitani ya'wala ¹⁸ 'idia ni'a yoqonia." ¹⁷ Iesu ena vona ba'e 'inega tolugwae diavona giveiniyauyaunidi, ta tomotau qabudi iqaiawa qiduana Iesu ena viaqa aqiaqina weaqidi.

Iesu ena vona sesebai magilafuna Yaubada ena 'Ebeluvine weaqina
(*Madiu 13:31-33; Maki 4:20-32*)

¹⁸ 'Inega qabu~dina 'idia wese vonaya, "Ma'oda 'inega Yaubada ena 'Ebeluvine ena giveleleqa 'aiqei 'imia, nage 'ebevetalatutula taha ba'e 'edewana: ¹⁹ Yaubada ena 'Ebeluvine kavona taha 'oloto te'wa vewanina 'ewei vaoqaya 'wadia, 'inega tabo vane veqidua, ta 'abiboda manu imai 'abo ilunevuqa laqanaya."

²⁰ 'Inega Iesu wese vonedi vonaya, "Ma'oda wese ena givesimatala 'aiqei 'imia be 'inega Yaubada ena 'Ebeluvine ona alamania, nage 'ebevetalatutula taha ba'e 'edewana: ²¹ Yaubada ena 'Ebeluvine kavonaya falawa ana isiti goyona taha vavine 'ewei 'abo falawa qiduana maega wayavilea 'inega falawa didina."

'Ebelugu sadana yawai vataya weaqina
(*Madiu 7:13-14, 21-23*)

²² 'Inega Iesu wese tutuvila tautauya Ielusalema weaqina, ta 'edayava inaina 'abaga qiduquduadi be goyogoyodi 'idia 'ifoqe, 'abo veve'ita totoa 'abaga 'idia. ²³ 'Inega taha 'oloto Iesu vetala'aiea voneaya, "Kaiwabu ma'oda, nage nawale tomotau lutoidi yawai vataya mahalaya ina lobe, waisa?"

'Inega Iesu voneaya, ²⁴ "Mahala ana 'awa sadana. 'Inega ona vetafe'wa waiwai ana lugu weaqina, mana tomotau qabudi itohotoho waiwai vonigonuanuadi ina lugu. ²⁵ ^j Ta tuta~nana tonivanue 'awa~nana nabaginia 'inega omi'a emi give'ove'o 'inega masu'edanaya ona tovolota ona 'auveida'a be ona noqi ona vonaya, 'Kaiwabu, 'awa usiwa'ei be ima'a wese ana lugu wai.' 'Inega navona 'eviviemi navonaya, 'Omi'a tomeqabu? Ya'a ge taha ana tufwa eda alamanimi!' ²⁶ Ta omi'a ona voneaya, 'Ima'a lova maega ka'ai'ai kanumanuma, ta wese ema 'abaga 'inaya uve'ita 'imaya.' ²⁷ ^k Ta 'inega tonivanue navonemi navonaya, 'Vonahaqiaqi, ge eda alamanimi, ma'inega omai? Onogegu, mana omi'a tomotau luveluveifami!'

ⁱ 13:15 Lk 14:5 ^j 13:25 Md 25:10-12 ^k 13:27 Same 6:8

28^l “Inega omi’a ona dou ta alami navetalakikokiko tuta~nana ’abaga gwavunaya ina felawebuiemi. Ta omo’e ’inega ona ’ita naqo Ebelamo be, Aisake be, Iakobo ta wese tovesimasimana qabudi ona ’itedi Yaubada ena ’Ebeluvine ’inaya itoatoa. 29^m Ta di’we qabuna ’idiega tomotau ina mai ta edi ’ebetoe aqiaqidi ina ’ewedi Yaubada ena ’Ebeluvine sagalina ’inaya. 30ⁿ Vonahaqiaqi, tomeqabu ba’e ’itaga inugwenugweta nawale ina ’abiboda, ta tomeqabu taudi ba’e ’itaga i’abi’abiboda, e nawale ina nugweta.”

Ieisu ena nuavita Ielusalema weaqina
(Madiu 23:37-39)

31 Tuta omo’e ’inaya vaina Falisiavo imai Ieisu ’inaya ivoneaya, “Una tutuvila ’abaga ba’e una nogea, mana Elodi nuanuana naluve’aligiu.”

32 Inega Ieisu vonedi vonaya, “Elodi~nana tauna kavona waqiwaiqi, ta ya’a ’iguya tauna yani kavokavovo, e ’inega ona ’evivi ona tauya ’inaya be ona vonea vonigo ba’itagana niboana luveifadi tomotau ’idiega ya’wavinidi i’ifoqe ta tovevhiqayavo yagiveaqiaqiedi, ta wese ’ibe ’edewani, ta ’aubena vetoina ’inaya egu viaqa qabuna ena lu’ovoia. 33 Vonahaqiaqi, ya’a ba’itagana yatautauya Ielusalema weaqina, ta ’ibe be wese navulihia ’inega ena ’ifoqe, ta omo’e ’inaya ena ’aliga, mana tovesimasimana qabuma ge daluaqiaqiema be mali ’abagaya ana ’aliga, ta ’esi Ielusalema namo ’inaya.”

’Inega Ieisu nuana vita Ielusalema weaqina dou vonaya, 34 “Ielusalema ye, Ielusalema ye! O’a tovesimasimanayavo uluve’aligidi, ta wese taudi Yaubada vetunedi imai ’iuya daboyega uluve’aligidi. Tuta qabuna nuanuagu be eu tomotauyavo ena gaba va’auqidi kavonaya kamukamu natudiavo fafediega i’aubwaedi, ta eu tomotauyavo inogegu. 35^o Inega Yaubada nawale nanogeu ta yavoneu ge wese una ’ita ’eviviegu ana laba eu tomotauyavo ina ’awahaqiaqiegu be ina vonaya, ‘Tauna Kaiwabu ana wawega maimai kana awatuboya.’ ”

Ieisu Sabatea taha ’oloto giveaqiaqiea

14 ¹Sabate taha ’inaya Ieisu tauya sabi ’ai Falisiavo edi tovanugweta taha ena vanuea. Ta tutana lugulugu ’inega tomotau qabudi Ieisu ivevekova aqiaqiea. ²Ta Ieisu ’iawanaya taha tovevhiqa toatoa vayovayoqa ’inega ’wafina qabuna ’elulolonea. ^{3p} Inega Ieisu luvine ana toalamaniavo be Falisiavo vetala’aiedi vonedia, “Ma’oda onuanua ’aiqa, nage ana fata ’aubena Sabate ’inaya tovevhiqa kana giveaqiaqiedi nage gebu?”

^l 13:28 Md 8:11-12 ^m 13:29 Same 107:3 ⁿ 13:30 Md 19:30 ^o 13:35 Same 118:26
^p 14:3 Lk 6:9

⁴Ta tomotau qabudi igenu'wana, 'inega leisu tovevihiqa~nana nimanega gitonovia 'abo giveaiaqiaiea, 'inega luvetunei tauya. ⁵^q 'Inega leisu vetala'aiedi vonaya, "Eguma taha toga 'imiega natuna me'olotona nage ena bulumakau Sabate 'inaya nabe'u gulia e 'inega ona lihi vaneyea, waisa?"

⁶Ta taudi ge taha tola'ai wese ida vonei.

Ge taha 'ebetoa aqiaqina taumiega ona venua'ivinei

⁷Ai~nana gamonaya leisu totoa va'auta vaina 'itedi nuanuadi 'ebetoa aqiaqina 'inaya ina toabui, 'inega taha vona sesebai neidi vonaya, ⁸^r "Eguma taha toga nagabeu vaqi 'abwagana weaqina ge una toabui tovekaikaiwabu edi 'ebetoya, mana nawale nage taha 'oloto qiduana namai. ⁹'Inega 'eguma ni'a utoabui nawale toni'abwaga namai navoneu, 'Uya'itoto mana 'oloto kaikaiwabuna ba'e 'inaya natoabui!' 'Inega o'a me eu iniyauyau una 'evivi masu'edanaya ta una toabui. ¹⁰Ta 'esi 'eguma taha toga nagabeu 'ai weaqina, 'inega 'ebetoa kavokavovo 'inaya una toabui, 'inega toni'abwaga namai na'iteu 'inega navoneu, 'Iagu, utoa vanemai 'ebetoa aqiaqinaya.' 'Inega me eu qaiawa una toa vane tomotau qabudi matadia ta ina 'awahaqiaqieu. ¹¹^s Ba'e 'inega kana alamania, 'eguma taha toga taunega ana wawa nagivaneqea e nawale Yaubada naha'uwebuiea, ta 'eguma taha toga taunega ana wawa naha'uwebuiea nawale Yaubada nagivaneqea."

¹²'Inega leisu Falisi~nana voneaya, "Tutana 'ai una viaqia 'inega ge emwavo nage taimwavo nage eu gadeavo nage tovekaikaiwabu daisidi una gabedi 'ai~nana 'inaya, mana taudi nawale ina gaba 'evivieu sabi 'ai, 'inega au 'abwaga ina ve'iea. ¹³Ta 'esi tuta~nana 'abwaga una viaqia 'inega wese taudi lukwalukwadi be, belubeludi be, 'aqedi veifana ta wese matadi kwayakwayana una gabedi ina 'ai. ¹⁴^t 'Inega veyoluba qiduana una lobe, mana taudi ge adi fata be eu veyoluba~nana ina ve'iei 'iuya, ta 'esi Yaubada 'inega au ve'ia una lobe tuta~nana tunutunuqidi ina ya'itoto 'aligega."

'Abwaga qiduana vona sesebaina

(Madiu 22:1-10)

¹⁵^u Ta nawale i'ai'ai 'inega totoa va'auta taha 'idiega leisu ena vona ba'e noqolia 'inega voneaya, "Vonahaqiaqi, tomeqabu ina lugu Yaubada ena 'Ebeluvine 'inaya 'ai qiduana weaqina taudi ina qaiawa qiduana."

¹⁶'Inega leisu 'oloto~nana voneaya, "Taha kaiwabu 'abwaga qiduana 'iva'ava'aia ta tomotau qabudi ve'aionidi. ¹⁷Ta 'abwaga ana 'iva'ava'ata ni'a

^q 14:5 Md 12:11; Lk 13:15 ^r 14:8 Vos 25:6-7 ^s 14:11 Md 23:12; Lk 18:14

^t 14:14 Ion 5:29 ^u 14:15 Lk 13:29

lu'ovoia, 'inega ena tofewa vetunea taudi lova ni'a vematamagilafuyedi 'idia, 'inega vonedi vonaya, 'Ona mai kana tauya, mana toni'abwaga yani qabuna ni'a 'iva'ava'aia omi'a weaqimi!' ¹⁸Ta tomotau diavona inoga ta vona taha taha ineia, ta taha vonaya, 'Ya'a bwa'obwa'o vauvauna yagimwane, 'inega nuanuagu ena tauya ena 'itea. Kaiwa qiduana, ta ana 'ita ge ena wai.' ¹⁹Ta taha wese vonaya, 'Kaiwa qiduana, ta ana 'ita ya'a ge ena wai, mana bulumakau 'alabwatadi adi yau teni ni'a yagimwanedi, 'inega yatautauya be ena vefewa tonovidi.' ²⁰ Ta wese taha vonaya, 'Ya'a vauvaugu yavaqi 'inega ge ana fata ena wai.'

²¹ "Inega tofewa~nana 'evivi 'abo ena kaiwabu 'inaya simana voneaya, 'Qabudi inoga.' 'Inega toni'abwaga gamosoala ta ena tofewa voneaya, 'Ulukwayavoni utauya 'abaga qiduana ana 'edayavo 'idia be tomotau una lobedi lukwalukwadi nage belubeludi nage 'aqedi veifana nage matadi kwayakwayana e qabudi una 'ebe'ewedi una miedi ina 'ai.' ²² 'Inega tofewa~nana ena kaiwabu ena nuanua viaqia, ta 'abiboda 'evivi mai ta voneaya, 'Tomotau~dina yagabedi ni'a imai, ta eu vanue ge ida luveagatuna'ia.' ²³ 'Inega kaiwabu~nana wese voneaya, "Eda qiduquidadi ta goyogoyodi 'idia una tauya ta tomotau una vonedi be ina mai, ta 'inega egu vanue ina luveagatuna'ia. ²⁴ Yavona aqiaqiemi, tomotau~dina yamadugabedi ta inogaya ge taha 'idiega nalugu be 'abwaga~nana nagudatonovi.' "

Isisu ana 'abiboda weaqina

(Madiu 10:37-38)

²⁵ Yo'o qiduadi Isisu maega itautauya, 'inega tunugivila 'idia vonaya, ²⁶ w "Eguma taha toga nuanuana na'abibodegu 'inega namaduveyolubegu qiduana ta 'abiboda tamana be, inana be, moqanena be, natunavo be, tainavo ta novunavo wese naveyolubedi. Ta wese 'eguma yawaina navegagalea 'inega tauna ge ana fata na'abibodegu. ²⁷ Ta 'eguma taha toga ge nuanuana taunega ana 'etoluai na'avalei be vita nalobei 'idewana ya'a, e 'inega tauna ge ana fata na'abibodegu.

²⁸ "Ta wese 'edewana 'eguma taha toga nuanuana be vanue qiduana nayoqonia, e nugweta ana maisa ta wese yani qabuna na'iva'ava'aidi vanue~nana ana yoqona weaqina. ²⁹ Mana 'eguma 'oqola namo navetovolodi ta ge vanue qabuna nalu'ovoi, 'inega nawale tomotau ina 'itea 'abo 'oloto~nana ina givenu'wea, ³⁰ ta ina vonaya, "Oloto ba'e lova 'oqola 'evetovolodi, ta ge ana fata vanue qabuna dalu'ovoi, mana ena mane ge damadu'iva'ava'aia vanue~nana ana yoqona weaqina.'

³¹ "Ta wese 'eguma taha kini me ena toluavia adi yau 10,000 ina tauya sabi luavia taha wese kini maega, ta omo'e kini~nana me ena

v 14:20 1Kol 7:33 w 14:26 Lk 9:23

toluavia adi yau 20,000. 'Inega 10,000~dina edi kini ma'oda nanuanua 'aiqa? Nugweta natoabui ta nanuanua 'eguma adi fata 20,000~dina ina vewaiwai va'inedi, waisa? ³²Ta 'eguma ge ana fata, e 'inega vaina tomotau navetunedi ina tauya 20,000~dina edi kini 'inaya nawale luluvaia itoatoa, be 'inega ina venoqi 'inaya toadaumwala weaqina."

³³'Inega Iesu ena vona lu'ovoia 'idia vonaya, "Eguma nuanuau be una 'abibodegu e nugweta yani qabuna 'iuya 'eno'eno una 'abifeledi."

Mwade'wa weaqina
(Madiu 5:13; Maki 9:50)

³⁴"Mwade'wa yani aqiaqina, ta 'eguma nagibwa 'inega ge wese ana fata navedibidibi 'evivi. ³⁵Ta wese ge ana fata be bwa'obwa'o ena waiwai nagive'ena'ia nage nagiveaqiaqiei, 'inega luaqiaqiea be kana guiwaqa yavulea. 'Eguma ma taniqami vona ba'e ona noqolia!"

Sifi luluve'waivina vona sesebaina
(Madiu 18:12-14)

15 ¹Taha tuta takesi ana to'ewayavo ta wese toluveifadi itoava'auta Iesu 'inaya ena vona sabi noqolina. ^{2x}'Inega Falisi be wese luvine ana tove'itayavo taudiega ilulumugi ivonaya, "Oloto ba'e toluveifadi veiaianedi ta wese maega i'ai'ai."

³'Inega edi lumugi weaqina Iesu vona sesebai toi ba'e neidi vonedia, ^{4y}"Ma'oda 'eguma taha toga 'imiega ena sifi adi yau 100 itoatoa, ta 'aidegana naluve'waiva, 'inega 99~dina nanogedi ta sifi luluve'waivina nasalia ana laba nalobea, waisa? ⁵Ta tutana nalobea me ena qaiawa 'avalanaya naha'ui ⁶be na'evivi 'abagaya. 'Inega enavo nagaba va'auqidi be navonedina, 'Egu sifi luluve'waivina ni'a yalobea, 'inega weaqina kana qaiawa.' ⁷Ta yavonemi, wese 'edewana 'eguma tomotau 100 itoatoa ta 99 'idiega ni'a inuagivila, ta ta'a mona gebu. 'Inega 'eguma tauna ana 'aidega wese nanuagivila, 'inega totoa mahalaya ina qaiawa gegoyo weaqina, ta 'abiboda taudi 99~dina, mana lova inuagivila, 'inega Yaubada matanaya ni'au ivetunutunuqa.

Mane luluve'waivina vona sesebaina

⁸"Edewana wese vavine taha ena mane siliba ana yau 10 'inaya 'eno'eno. Ta 'eguma 'aidegana naluve'waivia, 'inega tola'ai naviaqi be naloba 'eviviei? Mana ba'e siliba~nana kavona taha tomotau ana ve'ia na'ewea 'aubena 'aidegana ana fewa weaqina. Ana 'ita lamufa nagabuya be vanue gamona nalo'ilia ta nasali aqiaqiea ana laba nalobea, waisa? ⁹Ta tutana nalobea 'inega enavo nagaba va'auqidi be navonedina, 'Egwavo,

x 15:2 Lk 5:30 y 15:4 Isi 34:11,16; Lk 19:10

qabuda kana qaiawa, mana egu mane luluve'waivina ni'a yalobeal'
 10'Edewana wese Yaubada ena tovale'ewayavo iqaiqaiawa qiduana
 tuta~nana toluveifana taha nanuagivila."

Taha kaiwabu natuna me'olotona luluve'waivina vona sesebaina

11 Ta Iesu wese vona sesebaiega vonedi vonaya, "Taha kaiwabu natunavo me'olotodi magilafudi maega itoatoa, 12 ta natuna keke'ina tamana 'inaya vonaya, 'Tamagu, nuanuagu ba'e 'itaga agu vaufa una neigu eu 'ebeluvine be eu kulufayavo 'idiega.' 'Inega tamadi yani qabuna vewila'ayea natunavo 'idia.

13 "'Inega ge tuta kuena 'abibodanaya natuna keke'ina ena kulufa vegimwaneyedi ta manedi 'ewei. 'Inega tutuvila tauya luluvaia taha di'we 'inaya, 'abo qaiawa kavokavovo nuana 'ewei ta ena mane vegumwalia. 14 Ta ni'au ena mane qabuna vegumwalidi 'abo nima 'ava'avana toatoa. Ta tuta~nana 'inaya kulaka qiduana di'we~nana 'inaya 'ifoqe, 'inega ve'ale botana lutonovia.

15 "'Inega ena fewa sali 'abo di'we~nana gamonaya kaiwabu taha lobeal, 'inega vetunea be ena baweavo na'itamakidi. 16 Ta toluve'waiva~nana nuanuana bawe adi 'abwagega na'ai ta gamona nakoko, mana ge taha toga ana 'abwaga daneia.

17 "'Inega nuana 'eqa'uuya ta taunega 'inaya vonaya, 'Vonahaqiaqi, tamagu ena tofewayavo adi 'abwaga qiduana ge adi fata ina 'ai 'ovoi, ta ya'a ba'idia botana qiduana vunuvunuqigu. 18^z 'Inega ena tutuvila ena 'evivi tamagu 'inaya be ena voneaya, "Tamagu, ni'au luveifana qiduana yaviaqia Yaubada 'inaya ta wese o'a 'iuya. 19 'Inega ge daluaqiaqiegu be una 'awanatunegu ta 'esi una gabegu ya'a eu tofewa 'idewana."

20 "Ba'e 'idewana nuana tonovea, 'inega ya'itoto e tamana 'inaya tauya. Ta luluvaiega tamana natuna 'itea maimai. 'Inega me ena nuakolokolo vihila 'inaya ta talafafei maega ivedoudou.

21 "'Inega natuna tamana vonea vonaya, 'Tamagu, ni'au yaluveifa Yaubada matanaya ta wese o'a 'iuya, 'inega ge daluaqiaqiegu be una 'awanatunegu.'

22 "Ta tamana ena tofewayavo gabedi imai vonedia, 'Olukwayavoni be kaleko aqiaqi otaqina omiei natugu ona vekalekoi be mwali ona miei be 'ataqinaya ona veaqea. Ta wese 'aqeyafayafa 'aqenaya ona yoqonia. 23 Ta wese bulumakau kekeyavauna ta bilabilana ona vunuqi ona miei ta 'abwaga qiduana kana viaqi, be 'inega me eda qaiawa natugu maega kana 'ai 'aideganaya. 24^a Mana natugu ba'e kavonaya lova da'aliga, ta ba'itagana mayawaina kaloba 'eviviea.' 'Inega me edi qaiawa itoa va'auta ta i'ai'ai.

^z 15:18 Same 51:4 ^a 15:24 Efe 2:1,5

25 “Ta natuna ’unutauna nawale vaoqaya fewafewa, ta tutana ’abaga di’wenaya ’ifo’ifoqe ’evosi be lavua butuna noqolidi. 26 ’Inega taha tofewa gabei mai vetala’aiea voneaya, ‘Tola’ai ’iuna ’inega iqaiqaiawa?’

27 “Ta tofewa~nana voneaya, ‘Taiu ba’e ’itaga ’evivi mai ’inega tamau bulumakau kekeyavauna ta bilabilana vunugia maega a’ai’ai ta aqaiqaiawa, mana taiu mayawaina ta aqiaqina loba ’eviviea.’

28 “Ta tuta~nana vona ba’e noqolia ’inega diana vilea ta ge nuana nalugu vanuea. ’Inega tamana webui ta natuna ’unutauna venoqi waiwai maega ina lugu vanuea. 29 Ta wese noga mana diana vilea, ’inega tamana ’inaya vonaya, ‘Tamagu, ya’wala ’eala ’idia weaqiu yafewafewa be tuta qabuna eu nuanua ya’abibodea. Ta ge taha wese yubai uda neigu be ma egwavo ada ’ai ta ada qaiawa. Gebu’e otaqa! 30 Ta natuhu ba’e eu kulufa qabuna ’eluveyaveyavuledi toyafwauta ’idia, ’inega tola’ai weaqina bulumakau kekeyavauna ta bilabilana uvunuqi maega o’ai’ai ta oqaiqaiawa?’

31 “Ta ’inega kaiwabu~nana natuna ’unutauna ’inaya vonaya, ‘Natugu una alamania, o’a tuta qabuna di’weguya utoatoa, ta ya’a egu kulufa be egu bwa’obwa’o o’a wese eu kulufa be eu bwa’obwa’o, waisa? 32 Ta taiu lova kavona ’aliga ta ba’e ’itaga mayawaina toatoa, ta wese lova luluve’waivina ta ba’e ’itagana ni’a kaloba ’eviviea. ’Inega luaqiaqieda be maega kana qaiawa.’ ”

Vona sesebai to’itamaki luveifana weaqina

16 ¹Isisu ana to’abibodayavo ’idia vonaya, “Taha ’oloto kaikaiwabuna ena kulufa ana to’itamaki maega itoatoa. ’Inega taha tuta ’inaya tomotau vaina vale imiea kaiwabu~nana ’inaya ivonaya, ‘Kaiwabu, eu to’itamaki eu mane ta eu kulufayavo ’eluveyaveyavuledi.’

2 “Inega kaiwabu~nana ena to’itamaki gabei mai ta voneaya, ‘Vaina vona luveifadi weaqiu yanoqolidi, ’inega ge ana fata weaqigu una fewa. ’Inega ba’e ’itagana taha fefwai una ’wayavia egu kulufayavo weaqidi ’evisa nawale i’eno’eno, ta ’inega una webui.’

3 “Inega to’itamaki~nana nuana tonovea ta taunega vonaya, ‘Ma’oda ba’e ’itaga ena viaqa ’aiqa, mana egu kaiwabu egu fewa ’inega ni’au a’uwebiegu? Ta gebu agu fata be ena vaoqa mana ge waiwaigu, ta wese yainiyauyau ’eguma ena tauya tomotau ’idia be ’abwaga weaqina ena venoqinoqi.’ 4 Inega taha nuanua lobeia ta vonaya, ‘E ba’e ’edewanina ena viaqa ’aiqa tutana fewa ba’e ’inega ena webui, ’inega nawale tomotau ina gabegu edi vanuea.’

5 “Inega to’itamaki~nana taudi lova iloaga gabedi imai ta ’aidega ’aidega adi loaga weaqina vetala’aiedi. ’Inega taha ’idiega nugweta lugu, ta to’itamaki~nana voneaya, “Evisa au loaga ba’idia ’eno’eno egu kaiwabu ’inaya?”

6“Ta ’oloto~nana voneaya, ‘Dede’wa ma wagedi ’ena’ena’idi ana yau 100 yaloagedi.’

“Inega to’itamaki~nana voneaya, ‘Ulukwayavoni, eu fefwai ba’e ’inaya au loaga 50 una ’wayavia.’

7“Inega ’oloto vemagilafuna lugu vetala’aiea voneaya, ‘Ta o’a wese ’evisa au loaga?’

“Ta ’oloto~nana vonaya, ‘Abwaga ma fwatadi ana yau 100 yaloagedi.’

“Inega to’itamaki~nana wese voneaya, ‘Eu fefwai ba’e ’inaya au loaga adi yau 80 una ’wayavia.’ Ba’e ’edewani toloaga qabudi adi loaga wese a’uwebuiedi.

8“Inega ena kaiwabu ena viaqa ba’e weaqina noqolia ’abo awatuboya ena alamani aqiaqina weaqina.”

Ta Ieisu vonaya, “Vona sesebai ba’e ve’iteda totoa bwa’obwa’o ialamani aqiaqiea bwa’obwa’o ana kaikaiwabu ma’oda ’inega ina vefewedi, ta Yaubada ena qabuyavo edi alamani yani ba’e weaqina tufwana ge aqiaqina.”

9“Inega Ieisu wese vonedi vonaya, “Bwa’obwa’o ana kaikaiwabuyavo ’inega tomotau luveifana iviaqia. Ta omi’a kaikaiwabu~dina ’idiega ona vefewedi emi veiaiana tomotau maega. ’Inega nawale tutana kaikaiwabu~dina ina awala emiavo ina ’ebe’ewemi mahalaya, ta ina qaiawa weaqimi. 10^b ’Eguma taha toga yani goyona na’itamaki aqiaqiea e wese yani qiduana nawale ana fata na’itamakia. Ta ’eguma taha toga yani goyona ge na’itamakia, wese nawale yani qiduana weaqina ge na’itamakia.

11“Inega omi’a wese ’idewana, ’eguma bwa’obwa’o ana kaikaiwabu weaqidi gebu ona ’itamaki aqiaqi, nawale Yaubada wese ge kaikaiwabu aqiaqina naneimi mahalega. 12Ta ’eguma wese tomotau edi kaikaiwabu weaqina gebu oda ’itamaki aqiaqiedi, e ’inega ge wese taha toga emi kaikaiwabu naneimi be ona ’itamakia.

13^c “Ge taha toga ana fata navetofewa kaiwabu magilafudi ’idia. Mana ’eguma ’idewanina nawale taha nanogea ta taha naveyolubea. Ta wese taha na’awahaqiaqiea ta taha na’awaluveifea. ’Inega omi’a ge ana fata be Yaubada ta wese bwa’obwa’o ana kaikaiwabu weaqidi ona vetofewa.”

Ieisu wese vaina ve’ita Falisiavo neidi
(*Madiu 11:12-13; 5:31-32; Maki 10:11-12*)

14Tutana Falisiavo Ieisu ena vona inoqolia ’inega igivenu’wea, mana taudi nuanuadi qiduana mane. 15^d ’Inega Ieisu vonedia, “Omi’a onuaia vonigo emi ilivu aqiaqina tomotau ’iawadia, ta vonahaqiaqi luveifana qabuna giwalimia ’eno’eno Yaubada ni’a alamanidi. Mana tola’ai tomotau nuadi ’ewe’ewea ta Yaubada matanaya yani kavokavovo.

^b 16:10 Lk 19:17-26 ^c 16:13 Md 6:24 ^d 16:15 Md 23:28; Lk 18:9-14

^{16e} “Ta vonahaqiaqi, Mosese ena luvineavo ta wese tovesimasimana edi 'wayaviavo 'imia i'enova ana laba Ioni Togivebabitaiso mai. Ta tuta omo'e 'inega be ba'e 'itaga 'inaya vale aqiaqina Yaubada ena 'Ebeluvine weaqina ana lugaihi nawale tautauya. Ta 'Ebeluvine~nana weaqina tomotau qabudi edi waiwaiiega ilugulugu. ^{17f} Mahala be bwa'obwa'o ana fata ina awala, ta Mosese ena luvineavo 'idiega ge taha yani goyosikwa otaqina nahawala.

¹⁸ “Eguma taha 'oloto moqanena nasa'iledi ta navaqi ukamana mali vavine 'inaya, e tauna luabu ilivuna ni'a viaqia. Ta wese 'idewana 'eguma taha 'oloto vavine sa'isa'ilidi navaqidi, e 'inega ba'e 'oloto~nana wese luabu ilivuna ni'a viaqia.”

Taha 'oloto kaikaiwabuna ta Lasalo

¹⁹ Ta Iesu wese vonedi vonaya, “Taha tuta 'inaya taha 'oloto kaikaiwabuna toatoa 'abagaya. Ta ana kaleko aqiaqi otaqidi ta wese ana 'abwaga 'eala ta aqiaqidi. 'Inega 'aubena 'aidega 'aidega 'idia me ena qaiawa 'ai'ai, ta me ena kulufa qiduana toatoa.

²⁰ “Ta kaiwabu~nana ena vanue masu'edanaya taha 'oloto lukwalukwana ana wawa Lasalo toatoa. Ta 'wafina qabuna lubonubonu, 'inega kedewa imai ta bonuna iluyamoidi. ²¹ Ta Lasalo nuanuana be kaiwabu~nana ana 'abwaga salimugunega na'ai, ta ge taha yani daneia.

²² “Ta tuta~nana Lasalo 'aliga 'inega Yaubada ena tovale'ewayavo i'ebe'ewea itauyea mahalaya Ebelamo di'wenaya. Ta 'abiboda kaiwabu~nana wese 'aliga ta itavunia. ²³ 'Inega me ena visiq qiduana 'aiwe 'ala'alata 'inega 'ita vane ta luluvaia Lasalo 'itea Ebelamo maega itoatoa. ²⁴ 'Inega bonana qiduanega gaba voneaya, 'Ei tamagu Ebelamo! Uda nuakolokoloyegu, be Lasalo uda vetunei damai ta go'ila fayou'una 'inaya nimana da'aubwa'ui damiei ta meagu dagivefayo'uni, mana visiq qidua va'inena 'aiwe 'ala'alata 'inaya yalulutonovia.'

²⁵ “Ta Ebelamo voneaya, 'Natugu, una nuave'avina lova bwa'obwa'oya tuta qabuna me eu qaiawa utoatoa, ta Lasalo lova ge taha wese 'ebeqaiawa dalobei. Ta 'itaga Lasalo me ena qaiawa ba'idia toatoa, ta o'a visiq qiduana ululutonovia. ²⁶ Ta wese una alamania daba kuena nuanidaya vetoasi'ieda. 'Inega gebu ana fata ba'e 'inega ima'a ana vaugamana wai. Ta wese omi'a ge ami fata be ona vaugamana mai 'imaya.'

²⁷ “Ta kaiwabu~nana Ebelamo 'inaya vonaya, “Eguma ge ana fata tua, ta nuanuagu Lasalo uda vetunei datauya egu qabuyavo 'idia. ²⁸ Ta taigwavo adi yau faibi navebibinedi ina nuagivila, be yaqisa taudi ge wese ina mai visiq ena di'we ba'e 'inaya.'

^e 16:16 Md 11:12-13 ^f 16:17 Md 5:18

29 “Inega Ebelamo kaiwabu~nana voneaya, ‘Gebu, mana Mosese be tovesimasimana edi vona Buki Nugwenugweina gamonaya ’eno’eno yani ba’e weaqina, ’inega taimwavo ’eguma taudi edi vona inoqola aqiaqiedi e ’inega ge ina ’ifoqe ba’idia, ta ge nuanuadi vona diavona ina noqolidi!’

30 “Inega kaiwabu~nana voneaya, ‘Tamagu Ebelamo, ana ’ita gebu, mana debadi ’i’wana. Ta ’esi ’eguma taha toga ’aligega naya’itoto ’evivi ta natauya ’idia, e omo’e ’inega ina nuagivila aqiaqi.’

31 “Ta Ebelamo kaiwabu~nana ’inaya wese vonaya, “Eguma taimwavo Mosese be tovesimasimana edi vona ge nuanuadi ina noqoli, e ’inega ge wese nuadi na’eqa’ui ’eguma taha toga ’aligega naya’itoto ’evivi be natauya ’idia.’ ”

Iesu ena ve’ita ilivu luveifana weaqina

(Madiu 18:6-7,21-22; Maki 9:42)

17 ¹Iesu ana to’abibodayavo vonedi vonaya, “Ebesitonova qabudi nawale ina mai ’imia ta ina gibebe’uyemi, ta aiqabu ’ebesitonova diavona ’idiega ina ’ifoqe e taudi nuakolokolodi. ²Ta ’esi luaqiaqiea ’eguma togibebe’u~dina dabo qiduana ’ebefiaqa magadia ina yoqonidi ta malavetaya ina felawe buiedi ’inega ge ana fata be gogama ina gibebe’uyedi.

Nuataqo weaqina

38 “Inega ona ’itamakimi, ta ’eguma taiu ilivu luveifana naviaqia ’iuya, e ’inega una tauya ’inaya ta una vonei be nalua’u, ta ’eguma nanuagivila ’inega ena luveifana una nuataqoya. ⁴Ta wese ’eguma ’aubena ’aidegana ’inaya luveifana seveni ana yau ’iuya naviaqia, ta wese tuta seveni ana yau nanuagivila be navenoqi ’iuya nuataqo weaqina, e ’inega luaqiaqieu be ena luveifana qabuna una nuataqodi.”

Vetumaqana weaqina

⁵Inega Iesu ena tovaletuyanayavo ivoneaya, “Ema vetumaqana una givewaiwaiea.”

⁶ ^h Ta Iesu vonedi vonaya, “Eguma omi’a emi vetumaqana goyona kavona te’wa vewanina, e ’inega ami fata be omo’e ’aiwe~nana qiduana ona voneaya, ‘Tau’u uabuhu be mwade’waya una ’wadiu!’ E ’inega emi vona namatayagea.”

Tofewa edi viaqayavo

⁷Ta wese Iesu ’idia vonaya, “Ona nuaia, ’eguma taha kaiwabu me ena tofewa itoatoa ta tofewa~nana geogeova nage bawe ’ita’itamakidi,

^s 17:3 Md 18:15 ^h 17:6 Md 17:20; 21:21

ta lavilavia na'evivi namai vanuea, 'inega kaiwabu~nana ge navonei na'ai nugweta, ⁸ta 'esi navoneaya, 'Agu 'abwaga una 'iva'ava'aia ta una 'itamakigu 'inega ena 'ai be ena numa, ta 'abibodanaya o'a wese una 'ai.' ⁹Ta nage tofewa~nana ena fewa ba'e weaqina lukaiwa nalobei ena kaiwabu 'inega? Gebu, mana tauna tofewa. ¹⁰Ta omi'a wese 'edewani, tutana Yaubada ena nuanua qabuna oviaqa 'ovoidi 'inega ona simana ona voneaya, 'Ima'a eu tofewa kavovo, ta lova ama veyoveyoa uneima, e 'idewani ni'a aviaqia.' ”

Ieisu tomotau 'wago'wagoidi adi yau teni giveaiaqiedi

¹¹Ieisu nawale tautauya Ielusalema weaqina, 'inega tauya di'we Samelia be Galili nuanidia. ¹²Ta tutana taha 'abaga 'inaya lugu, 'inega 'oloto 'wago'wagoidi adi yau teni Ieisu 'itedi tufwana luluvaia itoatoa. ¹³ⁱ 'Inega bonadi qiduanega ivegabagaba ivonaya, “Kaiwabu Ieisu, uda nuakolokoloyema.”

¹⁴^j Ta Ieisu 'ita makimakidi vonedia, “Ona tauya toveguba 'idia ta taumiega ona ve'itayemi!” Ta tuta~nana itautauya 'edayi adi 'wagota 'evutuqidi ta 'wafidi veaqiaqi.

¹⁵Ta teni~dina 'idiega taha 'oloto 'wafina 'itea ni'a veaqiaqi, 'inega 'evivi mai ta bonana qiduanega Yaubada awatuboya. ¹⁶'Inega Ieisu 'agenaya iwa'odu ta lukaiwa. Ta tauna Samelia 'olotona. ¹⁷'Inega Ieisu 'oloto~nana voneaya, “Tawadega ami yau teni yagiveaiaqiemi ta ma'inaya emwavo adi yau naeni itoatoa? ¹⁸Tola'ai weaqina ge ida 'evivi ida mai be Yaubada 'inaya ida lukaiwa? Ta o'a ge Diu 'olotou, ta tua umai sabi lukaiwa Yaubada 'inaya.” ¹⁹'Inega Ieisu voneaya, “Uya'itoto utauya, eu vetumaqana 'inega ni'a uveaqiaqi.”

Yaubada ena 'Ebeluvine ena mai weaqina

(Madiu 24:23-28,37-41)

²⁰Taha tuta Falisiavo vaina imai Ieisu ivetala'aiea totuta 'inaya Yaubada ena 'Ebeluvine na'ifoqe namai. 'Inega Ieisu edi vetala'ai ve'iea ba'e 'idewana vonaya, “Yaubada ena 'Ebeluvine ena mai ge ana fata tomotau matadiega ina 'itei. ²¹Ta wese ge adi fata be ina vonaya, 'O'itei ba'e! nage, 'Omo'inaya! mana ni'au Yaubada ena 'Ebeluvine giwalimia toatoa.”

²²'Inega ana to'abibodayavo vonedi vonaya, “Nawale ena nogemi ta 'abiboda nuanuami qiduanega vonigo ya'a Tomotau Natuna maega kada toatoa, ta 'esi ona 'ita 'avegu. ²³^k Ta nawale tomotau ina vonaya, 'Keliso ba'idia! nage 'Keliso omo'e! ta gebu ona 'abibodedi. ²⁴Mana lukwayavonega ena 'evivi ena mai, ta mahala ana 'ita kavonaya namala

ⁱ 17:13 Luvi 13:45-46 ^j 17:14 Luvi 14:2-3; Md 8:3-4 ^k 17:23 Mk 13:21; Lk 21:8

'idewana nasimatala 'ava'ava. ²⁵ Ta nugweta lagata ba'e ina nogegu, ta visiqā qidwana ena lutonovia 'idiega.

²⁶ "Ta egu 'evivi mai ana tuta kavonaya Noa ena tuta 'inaya 'edewana. ²⁷ Mana lova Noa ena tutaya tomtau i'ai'ai ta inumanuma, ta wese 'oloto be vivine ivaqivaqi ta wese ivevevaqiedi ana laba Noa me ena susuyavo ena wagaya igelu ta seuseu 'ifoqe 'inega tomtau qabudi luwegwamumuidi. Ta ya'a Tomotau Natuna egu 'evivi mai wese 'edewana.

²⁸ ¹ "Ta wese lova Lota ena tutaya 'edewana, tomtau qabudi i'ai'ai ta inumanuma ta wese igimwagimwane be ivevegimwane, ta ivaovaoqa be wese edi vanueavo i'e'eyoqonidi. ²⁹ Ta tutana Lota Sodoma nokea 'inega 'aiwe 'ala'alata be dabo salofa 'wea'weavidi mahalega iavuta 'edewani 'wei, 'abo tomtau qabudi luwegwamumuidi. ³⁰ Ba'e veilāqe diavona lova i'ifoqe tomtau 'idia nawale wese 'edewana na'ifoqe 'aiqa tutana Tomotau Natuna na'evivi namai.

³¹ ^m "Ta tutana 'inaya 'eguma taha toga selovaya veveyawai ge wese vanuea nalugu sabi kulufa. Wese 'idewanina 'eguma taha toga talaqaya fewafewa ge wese na'evivi 'abagaya ena kulufa weaqina. ³² ⁿ Ta ona nuaia lova tola'ai 'ifoqe Lota moqanena 'idia. ³³ ^o 'Eguma taha toga yawaina nāvegagalea nawale yawaina naluve'waivia, ta 'esi 'eguma taha toga yawaina nahawafelea be naluve'waivia e nawale naloba 'eviviea. ³⁴ Ta yavona aqiaqiemi, velovelovana omo'e 'inaya tomtau magilafudi 'ivi 'aidegana 'inaya ina 'eno'eno, 'inega taha ena 'ebe'ewea ta taha natao. ³⁵⁻³⁶ Wese 'edewanina vivine magilafudi ina dābidabi, 'inega taha ena 'ebe'ewea ta taha natao."

³⁷ 'Inega Ieisu ana to'abibodayavo ivetala'aiea ivonaya, "Kaiwabu, ma'inaya ba'e yani diavona na'ifoqe?"

'Inega Ieisu vonedia, "Ma'inaya to'aliga 'wafina 'eno'eno e omo'e 'inaya bwayobwayo ina va'auta."

Wada'e taha ena venoqi 'alataya toluvine 'inaya

18 ¹ ^p 'Inega taha vona sesebai Ieisu ana to'abibodayavo neidi nuanuana nave'itedi me edi bibitaqo tuta qabuna ina vevenoqi ta ge ina lua'u. ² 'Inega vonedi vonaya, "Taha 'abaga 'inaya taha toluvine toatoa, tauna Yaubada ana 'amayaba be ana mwaniniva 'inaya ge da'eno'eno, ta wese tomtau weaqidi ge danuanua.

³ "Ta 'abaga~nana 'inaya wese taha wada'e toatoa, ta tuta qabuna tautauya toluvine~nana 'inaya ta vevenoqi ana iula weaqina vonevoneaya, 'Kaiwabu, uda iulegu mana taha tomtau veilivu veifegu, ta nuanuagu una luvinea.'

¹ 17:28 Nug 18:20; 19:25 ^m 17:31 Md 24:17-18 ⁿ 17:32 Nug 19:17,26 ^o 17:33 Lk 9:24
^p 18:1 Kol 4:2; 1Te 5:17

4“‘Aubena ‘aidega ‘aidega ‘edewana lulu‘evi‘evivi ta toluvine~nana ge nuanuana naiulei. Ta taha tuta ‘inaya ‘wafina siniqaiqai wada’e ena ‘alataya weaqina, ‘inega taunega ‘inaya vonaya, ‘Tua Yaubada ge eda mwaninivei ta wese tomotau ge eda nuanua weaqidi, 5ta wada’e ba’e ena ‘alataya ‘iguya weaqina ena iulea ana avia ‘inega, mana ge nuanuagu wese nave‘wafi siniqaiqaequ!” ”

6‘Inega Iesu wese vonedi vonaya, “Kaiwabu ba’e ena vona weaqina ona nuaia. Vonahaqiaqi, tauna ‘oloto luveifana ta tua wada’e iulea. 7Ta Yaubada aqiaqi otaqina, ‘inega nawale ena tomotauyavo vevenua‘ivinidi ge nanogedi. Ta tutana ina noqi ‘evi‘evivi ‘inaya ‘aubena ta wese velovelovana ‘idia e ‘inega naiuledi. 8Ta yavona aqiaqiemi, lukwayavonega Yaubada ena iula tunutunuqina tovenoqi naneidi. Ta tutana ya’a Tomotau Natuna ena ‘evivi mai bwa’obwa’oya ‘evisa tomotau me edi vetumaqana ena lobedi itoatoa?”

Taha Falisi ta takesi ana to’ewa vona sesebaidi

9Tomotau vaina inuaia vonigo taudi tunutunuqidi, ta mali tomotau i’itedi iawawebedi, ‘inega Iesu vona sesebai ba’e neidi vonaya, 10“Taha tuta taha Falisi ta wese takesi ana to’ewa taha ilugu Vanue Gwalagwalana ‘inaya sabi venoqi Yaubada ‘inaya. 11‘Inega Falisi~nana ya’itoto ta taunega weaqina venoqi vonaya, ‘Yaubada, yalulukaiwa ‘iuya mana ya’a gebu ‘edewana vaina tomotau edi ilivu, mana taudi tovevanuguba ta to’eu’au’ava ta wese tovelamo’eno, ta wese ya’a gebu takesi ana tova’auta ba’e ‘idewana. 12^q Mana ya’a wiki ‘aidega ‘aidega ‘idia ‘aubena magilafuna ge eda ‘ai’ai ma botanigu yavevedede ta wese egu kulufa qabuna ‘idiega dibuna yaneineiu Mosese ena luvine ‘idewani.’

13^r “Ta takesi ana to’ewa tufwana luluvaiega tovolu ta me ena iniyauiyau lumalumana tutuya ‘inega tunuiwa’odu ta venoqi vonaya, ‘Yaubada ye, ni’au ualamanigu ya’a luveifagu ‘inega uda nuakolokoloyegu.’ ”

14^s ‘Inega Iesu vonedi vonaya, “Vonahaqiaqi, ‘oloto ba’e ‘evivi tauya ena vanuea, ta ena venoqi weaqina Yaubada ‘awahaqiaqiea, ta Falisi~nana gebu. Mana ‘eguma taha toga taunega ana wawa nagivaneyea nawale Yaubada nagiwebuiea, ta ‘eguma taha toga taunega ana wawa naha’uwebuiea e nawale Yaubada nagivaneyea.”

Gogama Iesu vona veyolubedi (Madiu 19:13-15; Maki 10:13-16)

15Vaina tomotau natudiavo goyogoyodi imiedi Iesu ‘inaya nuanuadi nagitonovidi, ta ana to’abibodayavo tomotau diavona i’itedi ‘inega

^q 18:12 Ais 58:1-4; Md 23:23 ^r 18:13 Same 51:1 ^s 18:14 Md 23:12

iawatayedi. ¹⁶ Ta Ieisu gogama gaba va'auqidi ta to'abiboda~dina vonedia, "Gogama ge ona awatayedi ta ona awafeledi ina mai 'iguya. Mana Yaubada ena 'Ebeluvine gogama ba'e 'idewana weaqidi. ¹⁷ Yavona aqiaqiemi, 'eguma tomotau edi vetumaqana gebu gogama ba'e edi vetumaqana 'edewanina, e 'inega ge wese adi fata ina lugu Yaubada ena 'Ebeluvine 'inaya!"

Taha 'oloto kaikaiwabuna weaqina

(Madiu 19:16-30; Maki 10:17-31)

¹⁸ Me Diu edi toluvine taha mai Ieisu 'inaya vetala'aiea vonaya, "Tove'ita aqiaqiu, tola'ai ena viaqi be 'inega yawaigu vataya ena lobei?"

¹⁹ Ta Ieisu voneaya, "Tola'ai weaqina uvonaya ya'a aqiaqigu? Mana ge taha toga aqiaqina, ta 'esi Yaubada ana 'aidega. ²⁰ Yaubada ena luvineavo ni'au ualamanidi, vonaya, 'Ge una luabu, ge una luve'aliga be, ge una vanawala, ta ge u'avega una simana mali tomotau weaqidi kotu ana tutaya', ta wese, 'Tamau be inau una 'amayabedi.' "

²¹ 'Inega 'oloto~nana voneaya, "Egu tuta gwama 'inega ta mai ba'e 'itagana luvine diavona ya'abiboda aqiaqiedi."

²² Ena vona ba'e Ieisu noqolia 'inega voneaya, "Yani 'aideganamo nawale ge uda viaqia, 'inega 'eguma eu kulufa qabuna una vegimwaneyedi ta manedi una 'ewei una vewila'ayea lukwalukwa 'idia, ta 'inega una mai una 'abibodegu be nawale eu kaikaiwabu mahalaya una lobei."

²³ Tutana ba'e vona~nana noqolia, 'inega nuana vita, mana ena kulufa qiduana vegagalea.

²⁴ Ta ena nuavita Ieisu ni'a alamania 'inega vonaya, "Tomeqabu taudi me edi kaikaiwabu qiduana edi lugu Yaubada ena 'Ebeluvine 'inaya vita otaqina. ²⁵ Vonahaqiaqi, kameli yubai qiduana ta ena lugu saima vetoana 'inega vitana. Ta tovekaikaiwabu edi lugu Yaubada ena 'Ebeluvine 'inaya vita otaqina."

²⁶ Ta qabu~dina Ieisu maega itoatoa vona~nana inoqolia 'inega ivetala'aiea ivonaya, "Eguma ba'e 'edewanina, 'inega togama ana fata 'etoyavua nalobei?"

²⁷ 'Inega Ieisu vonedia, "Tola'ai tomotau ge adi fata ina viaqi, e Yaubada 'inaya ana fata!"

²⁸ Ta 'inega Fita Ieisu voneaya, "Kaiwabu, ta ima'a ma'oda? Mana ni'au ema 'abagayavo be ema kulufayavo anogedi ta a'abibodeu."

²⁹ Ta Ieisu vonedia, "Yavonahaqiaqi 'imia, aiqabu omi'a 'eguma emi 'abagayavo nage moqanemiavo nage taimiavo nage tamamiavo nage inamiavo nage natumiavo ni'a onogedi ta Yaubada ena 'Ebeluvine 'inaya

† 18:17 Md 18:3 º 18:18 Lk 10:25 ˇ 18:20 'Ifo 20:12-16; Luve 5:16-20

oawafelemi, ³⁰inega ba'e yani diavona ni'au onogedi nawale Yaubada ma ana luvetomana nanei 'eviviem i tutana bwa'obwa'oya otoatoa, ta wese tuta maimai 'inaya yawai vataya ona 'ewe." "

Ieisu ena simana vetoina ena 'aliga weaqina

(Madiu 20:17-19; Maki 10:32-34)

³¹ Ieisu Tuwelo~dina gaba va'auqidi ivanaqo tufinaya ta vonedia, "Ba'e itaga ka'wato'watovu Ielusalema 'inaya, ta yani qabuna lova tovesimasimana i'wayavidi ya'a Tomotau Natuna weaqigu nawale ana aqiaqi na'ifoqe be ona 'itea. ³² Inega ina ve'ineiegu taudi ge me Diu 'idia, ta ina givenu'wegu be ina gida'wegu be ina 'awaluveifegu, ³³ ta wese wayo metametanega ina vunuqa dadanegu ta 'inega ina luve'aligigu. Ta 'aubena vetoina 'inaya 'aligega ena ya'itoto 'evivi."

³⁴ Ta ana to'abibodayavo ena vona ba'e ge ida nua'eqa'ui, mana vona~nana ana alamani weaqidi 'wai'waivina. 'Inega tola'ai Ieisu tawa vonedi ge ida alamania.

Ieisu taha matakwaya giveaqiaqiea

(Madiu 20:29-34; Maki 10:46-52)

³⁵ Ieisu ma ana to'abibodayavo tuta goyona ina 'ifoqe Ieliko 'inaya. 'Inega taha 'oloto matana kwayakwayana 'eda nanavinaya toatoa ta tomotau 'idia vevenoqi mane be wese kulufa weaqidi. ³⁶ Ta tutana matakwayana Ieisu me ena qabuyavo bonadi noqolia 'inega vetala'aiedi vonedia, "Tomeqabu omi'a?"

³⁷ Inega ivoneaya, "Ima'a Ieisu Nasaleta 'olotona maega amaimai."

³⁸ Inega matakwaya~nana me ena waiwai gaba vonaya, "Ieisu ye, o'a Deibida natuna uda nuakolokoloyegu!"

³⁹ Ta taudi inugwenugweta 'oloto~nana iawatayea ivoneaya, "Eloveu, gebu una vegabagaba!"

Ta tauna wese bonana qiduanega gaba waiwai vonaya, "Deibida natuna ye, uda nuakolokoloyegu!"

⁴⁰ Inega Ieisu veutovolo ta tomotau vonedi be 'oloto~nana ina miea 'inaya. 'Inega mai Ieisu di'wenaya ta matakwaya~nana vetala'aiea voneaya, ⁴¹ "Tola'ai nuanuau ena viaqi 'iuya?"

'Inega voneaya, "Kaiwabu, nuanuagu matagu una giveaqiaqiedi be yaqisa agu fata ena 'ita."

⁴² Ta Ieisu voneaya, "Tuta ba'e 'inaya matau na'eaea, mana eu vetumaqana 'inega ni'a uveaqiaqi."

⁴³ Ta ba'e tuta~nana 'inaya matana veaqiaqi kwayavona. 'Inega Ieisu 'abibodea ta Yaubada awahawatuboya. Ta tomeqabu yani ba'e i'itea taudi wese Yaubada iawatuboya.

^w 18:31 Lk 24:44 ^x 18:32 Lk 9:22,44 ^y 18:34 Mk 9:32

Ieisu ta Sakiusa

19 ¹Ta Ieisu qabu maega ni'a ilugu Ieliko 'inaya ta 'abaga gamonega itautauya. ²'Abaga~nana 'inaya takesi ana to'ewayavo adi tovanugweta toatoa, ana wawa Sakiusa, tauna taha tovekaikaiwabu. ³Ta Sakiusa nuanuana Ieisu na'itea ta gebu ana fata, mana tauna 'oloto kukusana ta wese yo'o qiduadi maega itautauya. ⁴'Inega vihila nugweta taha 'aiwe ana wawa sikamole^z 'inaya vaneqa Ieisu sabi 'itana, mana 'edanegana maimai. ⁵Ta tutana Ieisu mai 'aiwe~nana di'wenaya 'inega 'ita vane ta Sakiusa 'itea 'inega voneaya, "Sakiusa, ulukwayavoni uwebui mai, mana nuanuagu ba'itagana eu vanuea kana toa."

⁶'Inega Sakiusa lukwayavoni webui ta me ena qaiawa Ieisu 'ebe'ewea. ⁷^a Ta tutana tomotau qabudi yani ba'e i'itea 'inega ilumugi ivonaya, "Ma'oda 'inega Ieisu lugu toluveifana ena vanuea?"

⁸^b Ta Sakiusa ya'itoto ta Ieisu 'inaya vonaya, "Kaiwabu, ba'itaga 'inega egu kulufayavo dibuna ena vewila'ayea lukwalukwa 'idia. Ta wese 'eguma lova togama 'inega taha yani u'avega ya'ewa kavovoya e 'inega ana luvetomana foa maega ena nei 'eviviea."

⁹^c 'Inega Ieisu voneaya, "Ba'e 'itagana vanue ba'e 'inaya 'etoyavua ni'a 'ifoqe, mana 'oloto ba'e ena vetumaqana tubuna Ebelamo 'idewana. ¹⁰^d Vonahaqiaqi, ya'a Tomotau Natuna yamai luluve'waividi sabi salidi adi 'etoyavua weaqina, 'idewani 'oloto ba'e."

Vona sesebai tofewa aqiaqidi be luveifadi weaqidi (Madiu 25:14-30)

¹¹Nawale tomotau qabudi Ieisu ivivineneqea. 'Inega vona sesebai ba'e neidi tutana Ielusalema ivadi'wea, mana tomotau inuaia vonigo Yaubada ena 'Ebeluvine tuta goyona nave'ale. ¹²Vonaya, "Taha 'oloto kaikaiwabuna 'iva'ava'ata be natauya di'we taha luluvaia, ta omo'e 'inaya luvine na'ewei navetoluvine, ta 'abiboda wese na'evivi namai. ¹³'Inega ena tofewayavo teni gaba va'auqidi ta ena mane qiduana tofewa 'aidega 'aidega vevewila'edi ta vonedia, 'Mane ba'e ona 'itamakidi ta ona vefewedi ta adi luvetomana ona lobedi ana laba ena 'evivi ena mai.'

¹⁴"'Inega kaiwabu~nana tauya, ta ena tomotauyavo ivevoalanea, ge nuanuadi na'evivi navetoluvine 'idia, 'inega vale ivetunei ivonaya, "Oloto bena'e ge nuanuama na'evivi namai be navetoluvine 'imaya!'

¹⁵"Ta tuta~nana 'evivi mai 'inega ena tofewayavo gaba va'auqidi imai nuanuana nahalamanian mane~nana lova vewila'ayea 'idia 'evisa ana

^z 19:4 Sikamole "sycamore" ena tabo kukusana ta ma 'wae lu'uvina, ta wese ana vane meaqana mana 'ale'itunega laqalia vane. ^a 19:7 Lk 15:2 ^b 19:8 'Ifo 22:1; Naba 5:6-7

^c 19:9 Via 16:31; Lk 13:16 ^d 19:10 Lk 15:4; Ion 3:17; 1Tim 1:15

luvetomana ni'a ilobedi. ¹⁶ 'Inega taha tofewa nugweta mai ena kaiwabu 'iawanaya tovolu ta voneaya, 'Kaiwabu, eu mane lova uneiguya ba'e ana luvetomana teni yalobedi.'

^{17e} "'Inega kaiwabu~nana vonaya, 'Vonahaqiaqi, o'a ma au vetumaqana, mana yani goyona u'itamaki aqiaqiea ta ugiveqideua 'inega au ve'ia ena neiu ta 'abaga teni 'idia una vetoluvine.'

¹⁸ "'Inega tofewa vemagilafuna wese mai voneaya, 'Kaiwabu, eu mane lova uneiguya ba'e ana luvetomana faibi yalobedi.'

¹⁹ "'Inega ena kaiwabu voneaya, 'O'a 'abaga faibi 'idia una vetoluvine.'

²⁰ "Ta wese vetoina mai voneaya, 'Kaiwabu, eu mane ba'e kaleko matavusinega ya'afwalia ta yaha'ukwaiva aqiaqiea. ²¹ Ta vonahaqiaqi, yamwaniniveu mana o'a 'oloto falafalau ta eu kaikaiwabu u'ewe'ewedi mali tomotau edi fewa 'idiega.'

²² "'Inega kaiwabu~nana voneaya, 'O'a tofewa luveifau. Tau'u eu vona 'inega au luvine ena neiu. Vonahaqiaqi, ni'au ualamanigu ya'a 'oloto falafalagu, ta egu kaikaiwabu yalobelobea mali tomotau edi fewa 'idiega. ²³ Ta tola'ai weaqina gebu mane ana sailakaya egu mane uda a'ui, be yaqisa tuta~nana ni'a ya'evivi yamai mane~nana ma ana luvetomana eda lobeas?'

²⁴ "'Inega taudi kaiwabu~nana di'wenaya itovotovololu vonedi vonaya, 'Egu mane tofewa luveifana 'inega ona 'ewei ta tofewa~nana tauna luvetomana teni lobeas e ona neias.'

²⁵ "'Inega ivoneaya, 'Kaiwabu, ge nuanuama ana neias mana tauna ni'au luvetomana teni lobeas, 'inega ta'iwa ana fata.'

^{26f} "Ta kaiwabu~nana wese 'idia vonaya, 'Yavona aqiaqiemi, 'eguma taha toga yani ena neias ta navefewa aqiaqiea, e nawale wese ana luvetomana nalobeas. Ta 'eguma taha toga yani ena neias ta ge navefewa aqiaqiei, e nawale toyani goyona 'inaya 'eno'eno wese ena 'ewa yavuleas. ²⁷ 'Inega tuta ba'e agu aviayavo lova inogegu vonigo ge nuanuadi ena vetoluvine 'idia e taudi ona gaba va'auqidi ina mai 'iawaguya ta ona luve'aligidi.' "

Ieisu lugulugu Ielusalema 'inaya

(Madiu 21:1-11; Maki 11:1-11; Ioni 12:12-19)

²⁸ Ieisu ena vona ba'e lu'ovoias, 'inega ana to'abibodayavo nugwetedis maega itauyas Ielusalema weaqina. ²⁹ Nawale itautauyas ta tuta goyona ina 'ifoqe 'abaga Bedifegi be Bedani 'idia bwanaga Olibe 'inaya. 'Inega ana to'abibodayavo magilafudi luvetunedi vonedias, ³⁰ "'Abaga~nana oas'e 'iawadaya 'inaya ona tauyas, ta tutana ona 'ifoqe yubai doniki ona 'itea kekeyavauna yoqoyoqonina toatoa, lovas ge taha toga dagelu tonovias,

^e 19:17 Lk 16:10 ^f 19:26 Md 13:12; Lk 8:18

ta yubai~nana ona yavui ona miea 'iguya. ³¹ Ta 'eguma taha toga navetala'aiemi navonaya, 'Tola'ai weaqina yubai bena'e oyavuyavui?' 'Inega 'oloto~nana ona voneaya, 'Kaiwabu nuanuana.' "

³² 'Inega magilafudi itutuvila itauya 'abo yani qabuna ilobedi 'edewani Iesu ni'a vonedi. ³³ Tutana doniki iyavuyavui 'inega toniyubai i'ifoqe ivetala'aiedi ivonaya, "Ma'oda 'inega ema yubai oyavuyavui?"

³⁴ 'Inega ivonedia, "Kaiwabu nuanuana."

³⁵ 'Inega yubai~nana i'ewei itauyea Iesu 'inaya, ta adi kwakwalufaiyega gwavuna ita'ulia, 'inega Iesu 'inaya gelu ta tauya. ³⁶ Ta tutana itautauya tomtau qabudi adi kwakwalufai wese 'edaya ita'ulidi.

³⁷ 'Inega ni'au imai Ielusalema di'wenaya ta iwebuwebui bwanaga Olibe ana 'eda 'inaya, 'inega to'abiboda qabudi bonadi qiduanega me edi qaiawa Yaubada iawatuboya, mana ni'au ena viaqa waiwaidi 'ebenuavoqana i'itedi 'inega ivonaya,

³⁸ § "Yaubada, nuanuama Kini~nana maimai Kaiwabu ana wawega una vona veyolubea.

Toadaumwala mahalaya

ta simatala qiduana mahala deba otaqinaya!"

³⁹ 'Inega Falisiavo vaina qabu~dina 'idiega Iesu ivonea ivonaya, "Tove'ita, au to'abibodayavo uvonedi ilua'u!"

⁴⁰ Ta Iesu vonedia, "Gebu ena awatayedi, mana 'eguma ena awatayedi e nawale dabo ba'e bonadi qiduanega ina kolua."

Iesu ena dou Ielusalema weaqina

⁴¹ Iesu ni'a 'ifoqe Ielusalema di'wenaya ta 'abaga~nana 'itea. 'Inega nuana vita ta weaqina dou vonaya, ⁴² "Ielusalema ye, eu tomtauyavo nuakolokolodi. Mana lova toadaumwala ana 'eda aqiaqi ge ida alamania. Ta ba'itagana tuta ni'au vekusakusa be toadaumwala ana 'eda matadiega ge adi fata ida lobei, mana 'eda~nana 'wai'waivina 'idiega. ⁴³ Ta vonahaqiaqi, tuta maimai 'idia au aviayavo ina mai ina toa viviliu ta ina luvatubodeu, 'inega ge wese taha toga ana fata nadena. ⁴⁴ ^h 'Inega o'a natumwavo maega ina luvegwamumuimi, ta wese vanue qabudi ina qeu yavuledi. Yani ba'ena nawale na'ifoqe 'iuya, mana Yaubada ena 'etoyavua vetunei mai natumwavo 'idia ta ge ida 'inanea."

Iesu tovegimwane Vanue Gwalagwalanega 'wavinidi

(Madiu 21:12-17; Maki 11:15-19; Ioni 2:13-22)

⁴⁵ 'Inega Iesu lugu Vanue Gwalagwalana 'atamaninaya ta vebutu tovegimwane 'wavi 'ifoqeyedi ta vonedia, ⁴⁶ ⁱ "Buki Nugwenugweina 'inaya Yaubada ena vona 'waya'wayavina vonaya, 'Egu vanue ba'e vanue 'ebevenoqi', ta omi'a ogivilea vonigo tovanawala adi watu'ubu."

§ 19:38 Same 118:26; Lk 2:14 ^h 19:44 Lk 21:6 ⁱ 19:46 Ais 56:7; Iel 7:11

^{47j} E 'inega 'aubena 'aidega 'aidega Vanue Gwalagwalana 'inaya veve'ita, ta toveguba qiduquduadi be luvine ana tove'itayavo ta wese tomotau adi tovanugwetayavo nuanuadi qiduana Iesu ina luve'aligia. ⁴⁸ Ta ge adi fata taha 'eda ida lobei be Iesu ina luve'aligi, mana ena ve'itayavo tomotau qabudi nuadi 'eweia.

Iesu ena luvine ta ena waiwai weaqina
(Madiu 21:23-27; Maki 11:27-33)

20 ¹ Taha tuta 'inaya Iesu veve'ita Vanue Gwalagwalana 'inaya ta lulugaihiea tomotau 'idia. 'Inega toveguba qiduquduadi be luvine ana tove'itayavo ta wese 'abaga ana tovanugwetayavo imai ta Iesu ivevetala'aiea, ² ivoneaya, "O'a eu luvine ta eu waiwai to'edega u'ewei 'inega yani qabuna ba'e uviaviaqidi? Togama eu luvine neiu?"

³ Ta Iesu vonedia, "Nugweta ya'a wese taha yani ena vetala'aiemi ta ona vona 'eviviegu. ⁴ Ioni Togivebabitaio togama ena luvine 'inega ena givebabitaio 'ifoqe, nage Yaubada 'inega nage tomotau 'inega?"

⁵ 'Inega taudiega iveveqae ivonaya, "Ena vona ma'oda kana ve'ia 'aiqei? Mana 'eguma kana vonaya, 'Yaubada 'inega', e nawale navona 'evivieda navonaya, "Inega tola'ai weaqina Ioni ge oda vetumaqanei?"

⁶ Ta 'eguma kana vonaya, "Tomotau 'inega', e nawale tomotau qabudi daboyega ina fofolida, mana edi vetumaqana waiwaina Ioni tauna taha tovesimasimana." ⁷ 'Inega Iesu ena vetala'ai ge ida ve'iei, ta ivoneaya, "Avodi, ge ada alamania to'edega babitaio~nana 'ifoqe."

⁸ 'Inega Iesu vonedi vonaya, "'Inega ya'a wese ge ena simana 'ifoqeyei 'imia togama ena luvineyega yani qabuna yaviaviaqidi."

Vona sesebai kaiwabu ena vaoqa ana to'itamakiavo weaqidi
(Madiu 21:33-46; Maki 12:1-12)

^{9k} 'Inega Iesu tomotau diavona vona sesebai neidi vonedia, "Taha 'oloto ana talaqaya 'oine ana loi vaoqidi, 'inega tomotau vaina 'ewedi imai luvine neidi be ana talaqa ina 'itamakia. Ta tauna tauya mali di'wea ta omode tuta kuena toatoa. ¹⁰ Ta bolimana ana tutaya kaiwabu~nana ena tofewa taha vetunea ta 'oine vuaqina vaoqa ana to'itamakiavo ina neia. 'Inega tauya ta ivunuqia ta nima 'ava'avana iluvetunei 'evivi. ¹¹ 'Inega kaiwabu~nana taha wese tofewa vetunei 'idia. Ta tauna wese ivunuqia ta iveilivu veifea ta nima 'ava'avana iluvetunei 'evivi. ¹² Ta wese 'idewani vetoina vetunei 'idia ta tauna wese ivunuqia ta talaqega ifelawebuiea.

¹³ "'Inega tonivaoqa~nana taunega vonaya, 'Tola'ai ena viaqi? Ana 'ita natu otaqigu tauna yaveyolubea qiduana ena vetunei 'idia, mana tauna ina 'amayabea.'

^j 19:47 Lk 21:37 ^k 20:9 Ais 5:1

¹⁴ “Ta tutana to’itamaki~dina kaiwabu natuna i’itea maimai taudiega iveveqae ivonaya, “Oloto omo’e maimai tauna kaiwabu natuna ana ’aidega otaqa. ’Inega ba’itagana kana luve’aligia be yaqisa ita’a taudega vaoqa kana luvinea.’ ¹⁵ ’Inega ikafia ta vaoqega ifelei webui talaqa gwavunaya ta iluve’aligia.”

Ta Iesu ena vona sesebai lu’ovoia ’inega tomotau qabudi vetala’aiedi vonaya, “Tola’ai nawale kaiwabu~nana ana to’itamakiavo ’idia naviaqi?”

¹⁶ Ta Iesu taunega vona ’eviviedi vonaya, “Vonahaqiaqi, kaiwabu~nana namai be to’itamaki~dina naluve’aligidi be ’inega vaoqa~nana mali tomotau naneidi.”

Tutana tomotau qabudi Iesu ena vona ba’e inoqolia taudiega ivonaya, “Vonahaqiaqi, ita’a ge wese ’idewani kana viaqi!”

¹⁷ ^l ’Inega Iesu ’ita makimakidi ta vonedia, “’Inega Buki Nugwenugweina ’inaya ’wayavi ba’e ma’oda ana alamani, vonaya?

“Oqola~nana lova to’eyoqona inogea,

ba’itagana ni’au vetamana ’oqola qabudi ’idia.’

¹⁸ ^m Tomeqabu ’oqola ba’e ’inaya ina lutuhuyedi ta ina be’u luludi na’evelubai, ta ’eguma ’oqola~nana nabuini nawebui taha toga debanaya nawale natutumemea.”

Takesi toluvine qiduana Sisa weaqina

(Madiu 22:15-22; Maki 12:13-17)

¹⁹ Omo’e ’inaya toveguba qidquiduadi ta luvine ana tove’itayavo ’eda isalia be ma’oda ’inega Iesu ina kafi kwayavoni, mana ni’a ialamania Iesu ena vona sesebai taudi weaqidi. Ta ge ida kafia, mana imwaniniva yo’o ’idia.

²⁰ ⁿ Ta me Diu adi toluvineavo nuanuadi Iesu ina ’itamaki aqiaqiea. ’Inega vaina tomotau iluvetunedi Iesu ’inaya ta u’avega iveiaiaanea, ta ivevekovekovea ’eguma ena vona ’inega ena luveifana ina lobe. ’Inega ina simana toluvine ’idia, ta ’abiboda ina luvetunea me Loma edi gavana ’inaya. ²¹ ’Inega tovekovakova imai ta Iesu ivetala’aiea ivonaya, “Tove’ita, vonahaqiaqi o’a eu vonayavo be eu ve’itayavo qabudi tunutunuqidi, ta wese ahalamania o’a ge uda mwaniniva tomotau ’ena’ena’idi edi vona nage edi nuanua weaqina, ta ’esi Yaubada ena nuanua uve’ita aqiaqiea tomotau qabudi ’idia. ²² ’Inega ma’oda luaqiaqiea be toluvine qiduana Sisa ’inaya takesi kana a’uya nage gebu?”

²³ Ta Iesu edi nuanua luveifana ni’a alamania ’inega vonedia, ²⁴ “Mane taha omiei eda ’itei.” ’Inega ineia ta Iesu vonedia, “Ona vonegu ba’e toga ’aye’ayewana ta ma’oda ana wawa mane~nana ’inaya?”

²⁵ Ta taudi ivoneaya, “Toluvine qiduana Sisa.”

^l 20:17 Same 118:22 ^m 20:18 Ais 8:14-15 ⁿ 20:20 Lk 11:54

'Inega leisu vonedia, "Idewana, 'inega Sisa ena yani tauna 'inaya ona neia, ta wese Yaubada ena yani tauna 'inaya ona neia."

²⁶Leisu ena vona ba'e tunutunuqina tomotau matadia, ta ge taha vona luveifana da'inanei be 'inega ida kafia. Ta ena vona 'evivi weaqina nuadi voqana ta igenu'wana.

To'aliga edi ya'itoto 'evivi weaqina
(Madiu 22:23-33; Maki 12:18-27)

²⁷'Inega vaina Sadusiavo imai leisu 'inaya, taudi ge ida vetumaqana to'aliga edi ya'itoto 'evivi weaqina, ta leisu ivetala'aiea ivonaya, ²⁸° "Tove'ita, luvine ba'e 'idewani Mosese 'wayavia weaqida vonaya, "Eguma taha 'oloto navaqi ta natu geqana ta na'aliga, 'inega 'oloto~nana taina wada'ena navaqi be 'inega 'eguma vavine~nana navenatuna natudiavo to'waiva~nana ana ilafa.' "

²⁹'Inega taha 'ebevetalatutula leisu ineia ivoneaya, "Taha 'oloto ma tainavo itoatoa, ta qabudi adi yau seveni. Ta 'unutauna vaqi ta natu geqana ta 'abiboda 'aliga. ³⁰'Inega ana tubutaqotaqo wada'e~nana maega ivaqi itoatoa ta wese natu geqana ta 'abiboda 'aliga. ³¹'Inega wese tugamwanina wada'e~nana vaqi ta wese 'idewani natu geqana ta 'aliga. Ta wese 'idewana tainavo qabudi wada'e~nana ivaqi, ta natu geqadi ta 'aliga. ³²Ta 'abiboda wese vavine 'aliga. ³³'Inega nuanuama ana vetala'aieu, 'eguma tomotau 'aligega ina ya'itoto 'evivi e to'oloto vavine~nana moqane aqiaqina, mana seveni~dina lova ivaqi?"

³⁴'Inega leisu vona 'eviviedi vonaya, "Tuta ba'e 'inaya vavine be 'oloto ivaqivaqi ta ivevevaqiedi. ³⁵Ta tuta maimai 'inaya Yaubada ena tomotauyavo venua'ivinidi vivine be 'oloto 'aligega ina ya'itoto 'evivi, ta ge ina vaqi ta wese ge taha toga ina vevaiei. ³⁶Mana taudi ni'au iya'itoto 'evivi 'aligega nawale ina toa Yaubada ena tovale'ewayavo 'idewani, 'inega ge wese ana fata ina 'aliga 'evivi. Ta tomeqabu ni'au iya'itoto 'aligega Yaubada na'awanatunedi.

³⁷P "Ta Buki Nugwenugweina ni'a ve'ita aqiaqieda to'aliga edi ya'itoto 'evivi weaqina tutana Mosese di'we tomotau geqana 'inaya tauya ta Yaubada 'aiwe saesaelina 'inega vonea vonaya, 'Ya'a Ebelamo be Aisake be Iakobo edi Yaubada.' ³⁸Ba'e 'inega kana alamania Yaubada ge to'aliga edi Yaubada, ta 'esi mayawaidi edi Yaubada, mana Yaubada ana fata tomotau qabudi nagiveyawaha 'eviviedi."

³⁹Omo'e 'inaya vaina luvine ana tove'itayavo ivonaya, "Tove'ita, eu vonayavo aqiaqi otaqina!" ⁴⁰Ta gebu taha wese vetala'ai ida neia.

To'etoyavua Iesu Deibida ena gade 'inega
(Madiu 22:41-46; Maki 12:35-37)

41 'Inega Iesu vetala'aiedi vonaya, "Ma'oda 'inega vaina tomotau ivonaya vonigo To'etoyavua Keliso tauna Deibida tubuna? 42^q Mana buki Same 'inaya Deibida vonaya,
 'Kaiwabu egu Kaiwabu 'inaya vonaya,
 "Ataqiguya una toabui
43 ana laba au aviayavo
 ena a'uwebuiedi 'aqeu 'ayanaya
 ta una luvinedi." '
44 Ba'e 'inega Deibida Keliso 'awa-Kaiwabuyea, ta isana ma'oda Keliso~nana Deibida natuna?"

Luvine ana tove'itayavo edi ilivu
(Madiu 23:1-36; Maki 12:38-40)

45 Tomotau qabudi nawale Iesu ena vona ivivineneqea, 'inega ana to'abibodayavo 'idia vonaya, 46 "Luvine ana tove'itayavo edi ilivu ge ona 'abibodei, mana taudi nuanuadi adi kaleko kuekuedi ina veaqedi be tomotau nuanidia ina yabayaba be nuanuadi totoa va'auta ina 'amayabedi. Ta wese nuanuadi 'ebetoea aqiaqidi vanue tafwalolo 'inaya ina toabui, ta wese sagali ana tutaya nuanuadi tomotau qiduquiduadi edi 'ebetoea ina toabui. 47 Ta wese tomotau matadia Yaubada 'inaya ivevenoqi kuena, ta edi venoqi ge aqiaqina, mana edi venoqi 'iuna nuanuadi tomotau ina 'awahaqiaqiedi. Ta 'abiboda 'waivega wadawada'e iu'au'avedi be edi kulufayavo i'ewe'ewedi edi vanue 'idiega. 'Inega nawale Yaubada ve'ia luveifa otaqina naneidi."

Wada'e taha ena nei kavovo
(Maki 12:41-44)

21 1 Tutana Iesu tunuvane 'inega tovekaikaiwabu 'itedi edi nei kavovo mane ana 'ebea'u 'inaya ia'ua'udi. 2 'Inega taha wada'e 'itea 'watovu ta ena nei kavovo mane goyogoyona magilafuna a'uya. 3^r 'Inega Iesu vonaya, "Yavona aqiaqiemi, yo'o~dina 'idiega wada'e omo'e ena nei kavovo veqidua va'inedi, 4 mana tovekaikaiwabu edi mane 'ena'ina nawale 'eno'eno, ta wada'e omo'e lukwalukwana ena mane ni'a a'u'ovoia, 'inega ge taha wese ena tufwa da'eno'eno be 'inega ana 'abwaga nagimwanei."

^q 20:42-43 Same 110:1 ^r 21:3 2Kol 8:12

Tuta vitana nawale na'ifoqe
(Madiu 24:1-2; Maki 13:1-2)

⁵Ta Ieisu ana to'abibodayavo vaina 'idiega Vanue Gwalagwalana ana 'ita aqiaqina i'itea 'inega Ieisu ivoneaya, "Kaiwabu, Vanue Gwalagwalana ana 'ita aqiaqi otaqina, mana dabo adi 'ita aqiaqidi 'idiega iviaqia. Ta wese tomotau edi kulufa aqiaqina iawafelea Yaubada 'inaya ta 'idiega vanue~nana ive'ivalia."

Ta Ieisu 'idia vonaya, ^{6s} "Vanue~nana ba'itagana o'ite'itea, ta tuta maimai 'inaya ada aviayavo ina qeu yavulea ta ge wese taha ana dabo naluve'avina be ona 'ita 'eviviei."

Tuta vitana be vevoalana
(Madiu 24:3-14; Maki 13:3-13)

⁷Inega Ieisu ivetala'aiea ivonaya, "Tove'ita, uvonema totuta 'inaya yani qabuna ba'e na'ifoqe, ta to'ebe'ita ana 'itei be 'inega ana alamania yani~nana ni'a uvonayedi ina 'ifoqe?"

⁸Inega Ieisu vonedia, "Ona 'itamakimi, mana nawale tomotau qabudi agu wawega ina mai ta ina vanugweta veifemi ta ina vonaya, 'Ya'a ba'e to'etoyavua!' ta wese ina vonaya, 'To'etoyavua ena tuta ni'a 'ifoqe mai!' Ta ge ona vetumaqanedi. ⁹Ta wese tutana vedavi valedi ona noqolidi ge giwalimi naha'ala mana yani ba'e ina madu'ifoqe, ta bwa'obwa'o ana 'ebeluo'ova ana tuta nawale."

¹⁰Ta Ieisu wese vonedi vonaya, "Nawale mali qabu be mali qabu maega ina luavia, ta wese mali 'ebeluvine be mali 'ebeluvine maega ina luavia. ¹¹Ta tuta~nana 'inaya mwani'ini'i be kulaka ta wese vihiqa qiduana ina 'ifoqe di'we qabudi 'idia. Ta wese 'ebe'ita qiduadi ta 'ebemwaniniva mahalega ina 'ifoqe. ¹²Ba'e yani diavona ina 'ifoqe, ta nugweta taudi ge ida vetumaqanegu ina salimi nuanuadi ina veilivu veifemi. Ta vanue tafwalolo be wese vanue 'ebeyoqona 'idia 'i'imega ina tauyemi sabi vetala'aiemi. Ta wese ina tauyemi toluvineavo be kiniavo matadia ya'a agu wawa weaqina. ¹³Ta omo'e tuta~nana 'inaya Valegu Aqiaqina ona simanea 'idia. ^{14t} Ta ge ona nuanua edi ve'ewa 'imia weaqina be 'inega ma'oda ona vona 'aiqa 'idia, ^{15u} mana ya'a emi vona tunutunuqidi ta wese alamani aqiaqi ena neimi. 'Inega ami aviayavo ge adi fata ina vona 'eviviem nage u'avega ina 'awaluveifemi. ^{16v} Ta tuta~nana 'inaya wese tamamiavo be, inamiavo be, taimiavo be, emi qabuyavo ta wese emiavo ina suluvemi, ta vaina 'imiega ina luve'aligimi. ¹⁷Ta wese tomotau qabudi ina vevoalanemi mana omi'a agu tovetumaqanayavo. ¹⁸Vonahaqiaqi, nuanuadi 'wafimi qabuna ina giveluveifea, ta ge adi fata. Ta wese ge adi

^s 21:6 Lk 19:44 ^t 21:14 Lk 12:11-12 ^u 21:15 Via 6:10 ^v 21:16 Md 10:21-22

fata debami 'aidegana ina 'ewa yavulei. ¹⁹'Inega omi'a ona tovoloi'ita be 'inega yawai vataya ona lobeia.

Ielusalema ana giveluveifa
(*Madiu 24:15-21; Maki 13:14-19*)

²⁰“Ta tutana toluavia ona 'itedi Ielusalema ni'a ivavivilia, 'inega ni'a oalamanian 'abaga~nana ana tuta luveawala ni'a 'ifoqe. ²¹'Inega di'we Iudia ana totoayavo luaqiaqiedi be ina dena bwanaga 'idia. Ta Ielusalema ana totoayavo luaqiaqiedi be 'abagega ina 'ifoqe, ta wese taudi talaqaya ifewafewa gebu ina lugu 'evivi 'abagaya. ²²^w Mana omo'e tuta~nana 'inaya luvematasabu ana tuta, 'idewani lova Buki Nugwenugweina maduvonayea ana aqiaqi na'ifoqe. ²³Tuta omo'e 'inaya tovegawegamwe'i be tovesusuyavo nuakolokolodi, mana di'we ba'ena ana totoayavo tuta vita otaqina ina lobeia, be omo'e 'inaya nawale Yaubada ena gamosoala 'inega luvematasabu qiduana ina lobeia. ²⁴^x Omo'e tutana 'inaya taudi ge me Diu tomotau ina luve'aligidi ta wese vaina ina kafidi be di'we taha taha 'idia ina tauyedi. Ta wese ina vewaiwai be Ielusalema ina luvinea ana laba taudi edi tuta nagumwala.

Ieisu ena 'evivi mai weaqina
(*Madiu 24:29-31; Maki 13:24-27*)

²⁵^y “Ta wese 'ebe'ita na'ifoqe baba'au be wai'ena ta wese 'wadi'wadima 'idiega. Be wese nufula agoagodi butudi ena nunuqa 'inega totoa bwa'obwa'o qabudi ina mwaniniva ta ina tafefwai. ²⁶'Inega tomotau me edi mwaniniva ta wese me edi nuavoqana qiduana itoatoa tuta~nana yani luveifana i'itea bwa'obwa'oya 'ifo'ifoqe, mana yani qabudi waiwaidi mahalaya ina 'eludedela ta ina avuta. ²⁷^z Ya'a Tomotau Natuna tuta omo'e 'inaya bwa'obwa'o ana totoayavo qabudi ina 'itegu gawatega ena webui mai me egu waiwai ta wese me egu simatala qiduana. ²⁸Ta tutana yani qabuna ba'e nave'ale be ona 'itedi, 'inega ge ona mwaniniva ta 'esi me emi giwalifatu ona lu'ita vane, mana ami 'etoyavua ni'a vadi'wemi.”

Mafa vona sesebaina
(*Madiu 24:32-35; Maki 13:28-31*)

²⁹'Inega Ieisu taha vona sesebai neidi vonedia, “Mafa ta wese vaina 'aiwe adi tuta ona nuaidi. ³⁰Tutana 'aiwe 'waedi ona 'itedi igalugalu 'evivi 'inega ni'a oalamanian tuta goyona ive nave'ale. ³¹Ta wese 'idewani tutana ba'e 'ebe'ita diavona ona 'itedi 'inega ona alamanian Yaubada ena 'Ebeluvine tuta goyona na'ifoqe.

^w 21:22 Iel 5:29; 46:10; Ose 9:7 ^x 21:24 Same 79:1; Ve 11:2 ^y 21:25 Ais 13:10; Isi 32:7; Ioe 2:31; Ve 6:12-13 ^z 21:27 Dan 7:13; Md 26:64; Ve 1:7

³² “Yavona aqiaqiemi, lagata ba’e ge ona awala ana laba ba’e ’ebe’ita diavona nugweta ina ’ifoqe. ³³ Mahala be bwa’obwa’o ina awala ta ya’a egu vonayavo gebu taha tuta ina awala.

’Itamaki be ’iva’ava’ata weaqina

³⁴ “Ona ’itamaki aqiaqiemi, ta ge ona qaiawa kavokavovo toyafwauta ’idewani, be ge go’ila waiwaina ana numa ’inaya ona awafelemi. Ta wese emi toa bwa’obwa’oya weaqina ge ona nuanua ’ena’ina. Mana ’eguma ’edewani ona viaqia ’inega nawale Yaubada ena ’aubena qiduana ’inaya naluveafemi be kavona si’wa ’inega nasi’wemi ta ona veilaqe. ³⁵ Mana ’aubena~nana luveafega na’ifoqe totoa bwa’obwa’o qabudi ’idia. ³⁶ Inega ona ’iva’ava’ata vataya! Ta tuta qabuna ona noqinoqi Yaubada ’inaya be nagivewaiwaiemi, ’inega ami fata ona tovoloi’ita ya’a Tomotau Natuna ’iawaguya.”

³⁷ Ta ’aubena ’aidega ’aidega ’idia Iesu Vanue Gwalagwalana ’inaya veve’ita, ta lavilavi ’aidega ’aidega tautauya taha bwanaga ana wawa Olibe ’inaya. ³⁸ Ta tomotau qabudi ’awa’awai otaqaya imai Vanue Gwalagwalana ’inaya Iesu ena vona sabi vineneqina.

Iudasa nuanuana Iesu nasuluvea

(Madiu 26:1-5,14-16; Maki 14:1-2,10-11; Ioni 11:45-53)

22 ¹ Ta ni’au Beledi ge ana isitimo Sagalina wese igabea ana wawa ’Auvivia Sagalina ana tuta ludi’wea. ² Tuta~nana ’inaya toveguba qiduquduadi be luvine ana tove’itayavo ’eda isalisalia ma’oda ’inega be Iesu ina kafia ta ’waivega ina luve’aligi. Ta ge adi fata mana qabu qiduadi imwaninivedi.

³ Ta tuta omo’e ’inaya Seitani lugu Iudasa ’inaya, tauna taha Tuwelo~dina gamodiega. Ta ba’e Iudasa~nana wese igabea ana wawa Isakaliota. ⁴ Inega Iudasa tauya toveguba qiduquduadi be Vanue Gwalagwalana ana to’itamaki adi tovanugwetayavo ’idia, ta maega iveqae ma’oda ’inega Iesu nasuluva ’aiqi ’idia. ⁵ Inega Iudasa ena vona weaqina iqaiawa ta ivona fofofola ’inaya ana ve’ia mane ’evisa nawale ina neia. ⁶ Ta Iudasa ve’ia~nana weaqina awafela, ’inega tuta aqiaqina ba’eyea be Iesu nasuluvea ’idia ’inega adi fata ina kafia. Ta gebu tomotau matadia.

’Auvivia Sagalina

(Madiu 26:17-25; Maki 14:12-21; Ioni 13:21-30)

⁷ Ni’au Beledi ge ana isitimo Sagalina ’ifoqe, ta ’aubena~nana wese sifi natudiavo lami ivunuqidi ’Auvivia Sagalina ana ’ebenuave’avina weaqina. ⁸ Inega Iesu ana to’abibodayavo Ioni be Fita vematamagilafuyedi

^a 22:3 Ion 13:2,27 ^b 22:7 ’Ifo 12:1-27

vonedia, “Ona tauya be 'Auvivia Sagalina 'abwagana weaqida ona 'iva'ava'aia.”

⁹Inega ivetala'aiea ivonaya, “Ma'inaya nuanuau 'abwaga~nana ana 'iva'ava'aia weaqida?”

¹⁰Inega Ieisu vonedia, “Ona tauya Ielusalema 'inaya, ta tutana ona 'ifoqe taha 'oloto ona 'itea go'ila ana 'ebegoi 'ava'avalea. Ta 'oloto~nana ona 'abibodea be tovanue 'inaya lugulugu, e omi'a wese 'inaya ona lugu. ¹¹Ta tonivanue ona voneaya, 'Ema Tove'ita ba'e 'edewani vona 'aiqa vonaya, “Tosifaufa gamonaya una awafelei be 'inaya ma agu to'abibodayavo 'Auvivia Sagalina 'abwagana ana 'ainia?” ¹²Inega sifaufa qiduana debanaya ni'a 'i'iva'ava'aina nave'itemi, e tauna 'inaya 'abwaga~nana ona 'iva'ava'aia weaqida.’ ”

¹³Inega to'abiboda~dina itauya ta tola'ai Ieisu ni'a simanea 'idia, e 'idewani yani qabuna ilobedi. 'Inega sifaufa~nana 'inaya 'Auvivia Sagalina 'abwagana i'iva'ava'aia.

Kaiwabu Tuwelo~dina maega i'ai'ai

(Madiu 26:26-30; Maki 14:22-26; 1 Kolinita 11:23-25)

¹⁴Ta yani qabuna ni'au i'iva'ava'aia, 'inega Ieisu me ena tovaletuyanayavo itoa va'auta 'abo maega i'ai'ai. ¹⁵Ta edi 'ai gamonaya Ieisu vonedi vonaya, “Lova 'inega nuanuagu qiduana be omi'a ya'a maega 'Auvivia Sagalina ana 'abwaga ba'e kana 'aini, ta 'abiboda visiqa qiduana ena lobei. ¹⁶Yavona aqiaqiemi, ge wese 'Auvivia Sagalina 'abwagana ena gudatonova 'eviviei ana laba ana alamani aqiaqi na'ifoqe tuta~nana Yaubada ena 'Ebeluvine namai.”

¹⁷Inega 'oine ma vedina 'ewea 'abo weaqina lukaiwa Yaubada 'inaya ta 'abiboda vonedia, “Vedi ba'e o'ewei ta qabumi 'inega ona numa. ¹⁸Ta yavonemi, tuta ba'e 'inega ge wese 'oine ena numa 'eviviei ana laba Yaubada ena 'Ebeluvine namai!”

¹⁹Inega beledi 'ewei 'abo weaqina lukaiwa Yaubada 'inaya, ta 'abiboda gitomwei ta ena tovaletuyanayavo vewila'ayea 'idia ta vonedia, “Ba'e 'wafigu, ta yaneineimi omi'a weaqimi ona 'ewea, ta 'abiboda wese 'idewani ona viaqia agu 'ebenuave'avina weaqina.”

²⁰Ta ni'a i'ai gumwala 'inega wese 'idewani vedi 'ewei ta vonedia, “Sulaligu ba'ena luvine 'evauna ana avutugu, ta inoinoqa weaqimi.

²¹^c “Ta o'itei, 'olotona nawale nasuluvegu ba'idia toatoa, ta tuta ba'e 'inaya tauna maega a'ai'ai. ²²Ya'a Tomotau Natuna nawale ena tauya 'eda~nana lova Yaubada venua'ivinina weaqigu. Ta agu tosuluva~nana nuakolokolona!”

²³Ena tovaletuyanayavo vona ba'e inoqolia 'inega taudiega ivetala'aiedi ivonaya, “Isana toga tauna omo'e 'edewana naviaqa 'aiqa?”

^c 22:21 Same 41:9; Ion 13:21-22

Togama ana wawa qiduana?

^{24 d} 'Inega tovaletuyana~dina ive'ale taudiega ive'ae'aetoga vonigo toga 'idiega ana wawa naveqidua. ^{25 e} 'Inega leisu vonedia, "Taudi ge me Diu edi toluvine qiduquidua edi tomotauyavo iluviluvinedi ta luvine vitana ineineidi, ta tua nuanuadi edi tomotauyavo ina 'awahaqiaqiedi. ^{26 f} Ta omi'a ge wese 'edewana ona viaqa 'aiqa. Ta 'esi 'eguma taha toga 'imiega ana wawa qiduana, 'inega taunega nagiwebuiea, ta emi tovanugwetayavo ina vetofewa weaqimi. ^{27 g} Ta ona nuaia, 'eguma taha toga natoabui sabi 'ai, ta taha tomotau ana 'abwaga namiei 'inaya 'abo na'ai, 'inega togama 'idiega 'oloto qiduana? Ana 'ita to'ai~nana, waisa? Ta ya'a ba'e 'itaga nuanimia yatoatoa emi tofewa ta ami toiula 'idewani.

²⁸ "Vonahaqiaqi, omi'a egu tuta vita 'idiega otovolo'i'ita di'weguya, 'inega ba'itagana omi'a ya'a maega katoatoa. ²⁹ Tamagu ena 'Ebeluvine ni'a awafelea 'iguya, 'inega ya'a wese 'idewani yahawafelemi 'Ebeluvine~nana 'inaya, ^{30 h} be 'inega nawale omo'e 'inaya ya'a omi'a maega kana 'ai be kana numa, be wese 'ebetoa kaikaiwabuna 'idia ona toabui be me Isileli edi gadeavo tuwelo ona luvinedi."

Fita ena vegeqa leisu vona 'ifoqeyea (Madiu 26:31-35; Maki 14:27-31; Ioni 13:36-38)

³¹ 'Inega wese leisu vonaya, "Saimoni, Saimoni, uvineneqa, Seitani ni'au awafela 'ewea be qabumi nasitonovimi, 'edewani tovaoqa ena witiavo givutuqidi aqiaqidi be luveifadi. ^{32 i} Ta 'ebesitonova 'inaya ge una dawalili aqiaqi, ta weaqiu ni'au yanoqi waiwai vonigo eu vetumaqana ge nagumwala. Be tutana una givila 'evivi 'iguya 'inega taimwavo wese una givewaiwaiedi."

³³ 'Inega Fita vonaya, "Kaiwabu, ni'au ya'iva'ava'aigu, be 'eguma vanue yoqona 'inaya ina a'uluguyeu, ya'a wese o'a maega. Ta wese 'eguma ina luve'aligiu, e 'inega ya'a wese 'edewani ina luve'aligigu."

³⁴ Ta leisu voneaya, "Fita, yavona aqiaqi 'iuya, ba'itaga velovelovanina 'inaya o'a una maduvegeqegu ana yau toi, ta 'abiboda kamukamu nadou."

^{35 j} 'Inega leisu qabudi vetala'aiedi vonaya, "Lova yavetune 'ifoqeyemi ta yavonemi ge emi mane ana kodekode nage emi kode nage ami 'aqeyafayafa ona 'ewedi. Ta ma'oda tuta~nana 'inaya nage vita olobea?" 'Inega ivoneaya, "Ge taha wese tola'ai."

³⁶ 'Inega leisu wese vonedia, "Ta 'esi ba'itagana emi mane ana kodekode be wese emi kode ona 'ewedi. Ta 'eguma toga 'imiega ge ena kefatamo, e 'inega ana kaleko navegimwaneyei be ana ve'ia 'inega ena kefata nagimwaneana.

^d 22:24 Lk 9:46 ^e 22:25 Md 20:25-27; Mk 10:42-45 ^f 22:26 Md 23:11; Mk 9:35

^g 22:27 Ion 13:12-15 ^h 22:30 Md 19:28 ⁱ 22:32 Ion 17:15 ^j 22:35 Lk 9:3; 10:4

37^k “Mana tuta ni’au vekusakusa, be Buki Nugwenugweina ’inaya lova taha vona weaigigu i’wayavia ana aqiaqi na’ifoqe vonaya, ‘Tauna i’inanea kavonaya be tovanawala ’idewani. Be wese vona qabudi weaigigu ana aqiaqi na’ifoqe.’ ”

38’Inega taudi ena vona ive’iea ivonaya, “Kaiwabu, ema kefata magilafudi ba’e.”

Ta Ieisu vonedia, “Bena’e ana fata.”

Ieisu vevenoqi Yaubada ’inaya
(Madiu 26:36-46; Maki 14:32-42)

39’Inega Ieisu sifaufa~nana nogea ta Ielusalema ’inega tauya bwanaga Olibe ’inaya, mana tuta qabuna ena ilivu ’idewana, ta ana to’abibodayavo i’abibodea. 40Di’we~nana ’inaya i’ifoqe ’inega Ieisu ana to’abibodayavo vonedi vonaya, “Ona venoqi Yaubada ’inaya be yaqisa ge Seitani nasitonovimi!”

41Ta ’abiboda ’idiega vasi’i tauya tufwana luluvai kavona dabo kainoqei tauya ’idewani, ’abo tuqatuqanega sobadi ta venoqi Tamana ’inaya vonaya, 42“Tamagu ye, ’eguma nuanuau visiqa vedina ba’e ’iguyega uda ’ewa yavulei. Ta gebu ya’a egu nuanua ’inega, ta ’esi o’a tau’u eu nuanua ’inega uda viaqi.” 43’Inega tovale’ewa taha mahalega ’ifoqe ’abo Ieisu givewaiwaiea. 44Ta nuana vita ’ena’ina ’inega noqi waiwai ’abo ana muyamuya ana ’ita kavonaya sulala dakabukabu bwa’obwa’oya.

45’Inega ya’itoto ta ’evivi ana to’abibodayavo ’idia, ta edi nuavita qiduana ’inega lobedi ni’au i’eno nuafani. 46’Inega divanodi ta vetala’aiedi vonaya, “Tola’ai weaqina o’eno’eno? Ta ona ya’itoto be ona venoqi! Mana ’eguma ge ona venoqi e nawale Seitani ena sitonova ’inaya ona lugu.”

Ieisu ikafia
(Madiu 26:47-56; Maki 14:43-50; Ioni 18:3-11)

47Ieisu nawale vonavona ’inega qabu qiduadi Iudasa maega i’ifoqe imai, tauna taha tovaletuyana Tuwelo~dina ’idiega, ta qabu~dina vanugwetedi. Ta Iudasa mai Ieisu di’wenaya sabi talafafana. 48’Inega Ieisu Iudasa voneaya, “Iudasa, umaimai vonigo nuanuau ya’a Tomotau Natuna talafafega una suluvegu ta una ve’ineiegu tomotau nimadia, waisa?”

49Ta tutana Ieisu ana to’abibodayavo yani ba’e i’itea ’inega nuadi ’eqa’uya tola’ai tuta goyona ’inaya na’ifoqe ta ivonaya, “Kaiwabu, nage kefatega ana fofolidi?” 50’Inega taha ’idiega ena kefata lulagai ’abo toveguba edi tovanugweta ena tofewa teniqana ana ’ataqiega da’a yavulea.

^k 22:37 Ais 53:12

⁵¹Ta Ieisu voneaya, “Ta’iwa! Ge wese ’edewani una viaqa ’aiqa!” ’Inega Ieisu ’oloto~nana teniqana gitonovi ta giveaiaqiea.

⁵²’Inega Ieisu ana tokafi diavona taudi toveguba qiduqiduadi be Vanue Gwalagwalana ana to’itamaki adi toluvineavo, be wese ’abaga ana tovanugwetayavo vonedi vonaya, “Nage ya’a taha tovanawala, ’inega me emi kefata be me emi gita omai sabi kafigu? ⁵³Ta tola’ai weaqina ge oda kafigu ’aubena~dina qabudi nuanimia yatoatoa Vanue Gwalagwalana ’atamaninaya ta yaveve’ita tomotau ’idia? Ta ba’itagana emi tuta ni’a mai be ona kafigu, mana luvine velovelovanina ana tuta tawa ’ifoqe.”

Fita Ieisu vegeqea

(Madiu 26:57-58,69-75; Maki 14:53-54,66-72; Ioni 18:12-18,25-27)

⁵⁴¹’Inega Ieisu ikafia ’abo itauyea toveguba edi tovanugweta ena vanuea. Ta Fita tufwana luluvaiega tala’obedi. ⁵⁵Ta ’abaga~nana ana ’ebetoea va’auta gamonaya toluavia ’aiwe imu’ei ta qabudi ivevetaluvala, ta Fita ’itedi ta di’wediea toabui. ⁵⁶’Inega taha tofewa mevavinena Fita ’itea ta vonaya, “’Oloto ba’e lova Ieisu maega ya’itedi.”

⁵⁷Ta Fita vegeqa vonaya, “Vavine, ge eda alamani toga bena’e weaqina uvonavona.”

⁵⁸’Abiboda taha ’oloto wese Fita ’itea ’inega vonea vonaya, “O’a taha wese ana to’abiboda.”

’Inega Fita vonaya, “’Ia, ya’a gebu!”

⁵⁹Ta tufwana tuta kuena ’abibodanaya wese taha ’oloto bonana waiwaina ’inega enavo vonedi vonaya, “Vonahaqiaqi, ’oloto ba’e Ieisu ana to’abiboda taha, mana tauna wese Galili ’olotona.”

⁶⁰Ta Fita vonaya, “Aa gebu, ’oloto~nana weaqina uvonavona ya’a ge eda alamania.” Nawale vonavona ’inega kamukamu dou.

⁶¹Tuta ba’e ’inaya Ieisu tunugivila ta Fita ’itea, e omo’e ’inaya Fita nuave’avinia Kaiwabu ena vona lova tutana vonaya, “Ba’e ’itaga velovelovana ’inaya o’a una vegeqegu ana yau toi, ta ’abiboda kamukamu nadou.” ⁶²’Inega Fita nuana vita ’ena’ina ’abo ’ifoqe ’abagaya ta dou.

Ieisu igivenu’wea ta ivunuqia

(Madiu 26:67-68; Maki 14:65)

⁶³’Inega Ieisu ana to’itamakiavo ive’ale igivenu’wei ta ivunuqia, ⁶⁴ta wese matana kalekoyega iumei ’abo ivetala’aiea ivonaya, “Uvonema, toga vunuvunuqiu? Mana ni’a uvona vonigo o’a tovesimasimana.” ⁶⁵Ta wese yani qabuna weaqina Ieisu i’awaluveifea.

¹ 22:54 Mk 14:53-54

Ieisu me Diu edi toluvineavo matadia
(Madiu 26:59-66; Maki 14:55-64; Ioni 18:19-24)

⁶⁶ Mahala ahalia, 'inega 'abaga ana tovanugwetayavo be toveguba qiduquadi be wese luvine ana tove'itayavo iva'auta, 'abo Ieisu imiea matadia. ^{67m} Ta ivetala'aiea ivonaya, "Usimana 'imaya, ma'oda o'a tau'u To'etoyavua nage gebu?"

'Inega Ieisu vonedi vonaya, "Eguma ena simana 'imia 'inega ge ona vetumaqanegu, ⁶⁸ ta wese 'eguma ena vetala'aiemi egu vona ge ona ve'iei. ⁶⁹ⁿ Ta ona alamanian vonigo tuta ba'e 'inega ya'a Tomotau Natuna ena toabui Yaubada Tovewaiwai 'ataqinaya."

⁷⁰ 'Inega qabudi ivetala'aiea ivonaya, "Nage o'a Yaubada Natuna?"

Ta Ieisu edi vona ve'iea vonaya, "Ni'a ovona aqiaqi."

⁷¹ 'Inega taudi ivonaya, "Ni'au ena vona luveifana kanoqolia, 'inega ge wese ana tove'ewayavo weaqidi kana nuanua, mana taunega ni'a simanea vonigo tauna Yaubada Natuna."

Ieisu Failato 'iawanaya
(Madiu 27:1-2,11-14; Maki 15:1-5; Ioni 18:28-38)

23 ¹ 'Inega totoa va'auta qabudi iya'itoto 'abo Ieisu itauyea me Loma edi gavana ana wawa Failato 'iawanaya. ² 'Inega Ieisu ive'ale ive'ewei ta ivonaya, "Oloto ba'e a'itea ima'a me Diu qabuma ve'ita veifema ta awatayema vonigo toluvine qiduana Sisa weaqina takesi ge ana a'ui, ta wese vonaya vonigo tauna Kini be To'etoyavua."

³ 'Inega Failato Ieisu vetala'aiea vonaya, "O'a vonahaqiaqi me Diu edi Kini, waisa?"

'Inega Ieisu vona 'eviviea vonaya, "Bena'e ni'au uvona aqiaqi."

⁴ Ta 'abiboda Failato toveguba qiduquadi be tomotau qabudi vonedi vonaya, "Oloto ba'e ge taha ena luveifana eda lobei."

⁵ Ta taudi edi waiwaiega ivonaya, "Tauna ena ve'ita 'inega ita'a me Diu u'au'aveda be eda di'we nidonidoea 'inituna. Mana Galili 'inega ena u'ava ve'alea ta ni'a 'ifoqe mai 'abaga ba'e Ieluselema 'inaya."

⁶ Tutana edi vona ba'e Failato noqolia 'inega vetala'aiedi vonaya, "Oo, nage tauna Galili 'olotona?"

^{7o} Ta ivonaya, "Ao, 'edewana."

'Inega Failato vonedi vonaya, "Galili bena'ena Elodi Anitifasi ena 'ebeluvine. 'Inega Ieisu ona tauyei 'inaya be taunega naluvinea, mana ba'itagana Elodi wese Ieluselema 'inaya toatoa."

⁸ 'Inega itauyea Elodi 'inaya 'abo tuta~nana Ieisu 'itea qaiawa qiduana, mana tuta kuena nuanuana be Ieisu na'itea, mana valenamo noqonoqolia.

^m 22:67 Ion 3:12 ⁿ 22:69 Via 7:56 ^o 23:7 Lk 3:1

Ta ena nuanua 'iuna vonigo Ieisu taha 'ebe'ita naviaqi na'itea. ⁹'Inega Elodi Ieisu vetala'ai 'eala neia, ta ge taha wese dave'iea. ¹⁰Toveguba qiduquduadi be luvine ana tove'itayavo Elodi maega itoatoa Ieisu iala'i'ihia. ¹¹Ta Elodi me ena toluaviayavo Ieisu iawawebuiei ta igivenu'wea. Ta 'abiboda taha kaleko aqiaqi otaqina 'inega ivekalekoya, 'idewana kini adi kaleko, 'abo ivetune 'eviviei tauya Failato 'inaya. ¹²Lova tuta kuena 'inaya Elodi be Failato ivevoalana, ta omo'e 'aubena~nana 'inaya iveiana 'evivi.

Tomotau nuanuadi Failato Ieisu natutuve'ewea 'etoluai 'inaya
(*Madiu 27:15-26; Maki 15:6-15; Ioni 18:39-19:16*)

¹³'Inega Failato toveguba qiduquduadi be tafwalolo ana tovanugwetayavo ta wese tomotau qabudi gaba va'auqidi imai, ¹⁴ta vonedia, "Oloto ba'e 'iguya ni'a omiea ta osimana vonigo tauna tomotau ve'ita veifedi be givenidonidoedi. Ta matamia ya'a ni'a yavetala'aiea be ge taha ena luveifana eda lobei emi ve'ewa weaqina. ¹⁵Elodi wese ge taha luveifana 'inaya dalobei, 'inega 'idaya vetune 'eviviea. 'Inega ge wese luve'aliga daluaqiaqiei. ¹⁶⁻¹⁷E 'inega ena luvematasabuyamo ta 'abiboda ena yavui natauya."

¹⁸'Inega qabu~dina bonadi qiduanega ikolua ivonaya, "Ieisu na'aliga, ta 'esi Balabasi una 'etoyavua weaqima!" ¹⁹Ta Balabasi~nana vanue 'ebeyoqona 'inaya ni'a toatoa, mana lova 'abaga~nana 'inaya ma enavo me Loma maega ivedavi 'abo vaina tomotau iluve'aligidi.

²⁰Ta Failato nuanuana be Ieisu na'etoyavua 'inega yo'o wese vetala'aiedi. ²¹Ta taudi wese bonadi qiduanega ivonaya, "Etoluai 'inaya una tutuve'ewea, 'etoluai 'inaya una tutuve'ewea!"

²²'Inega Failato tuta vetoina vonedi vonaya, "Tola'ai isana ena luveifana 'inega luaqiaqiea be na'aliga? Ge taha wese luveifana 'inaya eda lobei. 'Inegana ena luvematasabuyamo be 'abiboda ena 'etoyavua."

²³Ta qabu~dina nawale ikolukolua qiduana ivonaya, "Etoluai 'inaya una tutuve'ewea!"

'Abo qabu~dina edi vona vewaiwai, ²⁴'inega edi nuanua weaqina Failato awafela 'idia, 'inega ena toluaviayavo luvinedi be Ieisu ina tutuve'ewei 'etoluai 'inaya. ²⁵Ta 'oloto~nana nuanuadi Failato na'etoyavui weaqidi e 'etoyavua, tauna toluve'aliga~nana vanue 'ebeyoqona 'inaya lova ia'uuya tutana me Loma edi gabemaniavo luavia 'idia.

'Inega Failato yo'o nimadia Ieisu a'uuya, ta ba'e 'inega tomotau edi nuanua viaqia.

Ieisu 'etoluai 'inaya itutuve'ewea
(*Madiu 27:32-44; Maki 15:21-32; Ioni 19:17-27*)

²⁶Tutana Ieisu i'ebe'ewea itauyea sabi tutuve'ewana, 'inega 'edaya taha 'oloto ana wawa Saimoni ilobe, tauna Sailini 'olotona muta'wega 'ifoqe

mai 'abo tautauya 'abagaya. Ta toluavia Saimoni ivedidigea 'inega Ieisu ana 'etoluai 'avalea ta 'abibodanega tauya.

²⁷Ta wese qabu qiduadi Ieisu i'abibodea, ta qabu~dina 'idiega wese vivine qabudi itautauya ta idoudou me edi nuavita Ieisu weaqina. ²⁸Ta Ieisu tunugivila 'abo vivine~dina vonedia, "Omi'a Ielusalema vivinemi ge weaqigu ona dou, ta omi'a taumi weaqimi be natumiavo weaqidi ona dou. ²⁹^p Mana tuta maimai 'inaya vita na'ifoqe, ta taudi gagalidi be ge ida venatuna ta wese taudi lova ge ida vesusu nawale aqiaqina ina lobe. ³⁰^q Ta tuta omo'e 'inaya nawale tomtau bwanaga 'idia ina vona,

'Bwanaga, o'avalata'i debamaya ta oyamunima!"

³¹Vonahaqiaqi, ya'a nawale ena veilage, ta omi'a nawale ona veilage veiveifa. Mana tola'ai nawale tomtau ina viaqi 'iguya kavona 'aiwe mama'ina ina gabui ta na'alata 'weu'weu. Ta 'esi omi'a emi veilage qiduana, mana omi'a kavona 'aiwe kwavugina na'alata ukamana be naveqidua."

³²Ta toluveifadi magilafudi wese itauyedi, be Ieisu maega ina luve'aligidi. ³³Inega taha di'we 'inaya i'ifoqe ana wawa igabea 'Unu'unu, ta di'we~nana 'inaya Ieisu itutu'e'wea ana 'etoluai 'inaya. Ta toluveifa diavona magilafudi wese adi 'etoluai 'idia itutu'e'wedi, taha Ieisu ana 'ataqiega ta taha ana keliega. ³⁴^r 'Inega Ieisu vonaya, "Tamagu ye, una nuataqodi, mana ge ida alamania tola'ai iviaviaqia."

Ta toluavia diavona Ieisu ana kaleko i'ewea, 'inega taha laha ilahayea 'abo togama nanugweta e 'inega kaleko~dina na'ewedi.

³⁵^s Omo'e 'inaya tomtau itovotovolo ta ivevekova, ta me Diu adi tovanugwetayavo Ieisu igivenu'wea ivonaya, "Mali tomtau 'etoyavuidi, ta ba'itagana taunega na'etoyavua 'eguma vonahaqiaqi tauna To'etoyavua Keliso Yaubada ena venua'ivina."

³⁶^t Toluaviayavo wese Ieisu igivenu'wea 'abo 'oine yuyuna imiea ive'etovaneyea, ³⁷ta ivoneaya, "Eguma o'a me Diu edi Kini tau'u una 'etoyavuii."

³⁸Ta wese ana 'etoluai debanaya i'wayavia vonaya, "OLOTO BA'ENA ME DIU EDI KINI".

³⁹Ta toluveifana magilafudi taha 'idiega Ieisu givenu'wea voneaya, "Nage o'a To'etoyavua, waisa? 'Inega una 'etoyavuida!"

⁴⁰Ta toluveifana iana lugwaeyea vonaya, "Ma'oda o'a, nage Yaubada ge uda mwaninivei? Mana toidana ada luvine 'aidegana ineida, ⁴¹ta luvine~nana o'a be ya'a luaqiaqieda mana ita'a luveluveifada, ta 'oloto ba'ena ge taha wese ena luveifamo."

⁴²'Inega 'oloto~nana Ieisu voneaya, "Ieisu, tuta~nana una 'evivi mai be una ve-Kini, e 'inega ge una nuafanigu."

^p 23:29 Lk 21:23 ^q 23:30 Ose 10:8; Ve 6:16 ^r 23:34 Same 22:18 ^s 23:35 Same 22:7-8

^t 23:36 Same 69:21

⁴³Ta Ieisu voneaya, “Yavona aqiaqieu, o’a be ya’a ba’itaga Faladaisi ’inaya kana toatoa.”

Ieisu ena ’aliga

(Madiu 27:45-56; Maki 15:33-41; Ioni 19:28-30)

⁴⁴Ta baba’au ni’a vane 12 koloki ’idewana, ’inega baba’au ena simatala ’weu, ta velovelovana qiduana bwa’obwa’oya ’ifoqe tauya ana laba lavilavi ’edewani 3 koloki ’inaya. ⁴⁵“ Ta Vanue Gwalagwalana gamonaya Sifaufa Gwalagwala Otaqina ana bagina kaleko eabu magilafuyea. ⁴⁶’Inega Ieisu bonana qiduanega gaba vonaya, “Tamagu ye, niboanigu nimauya yaha’ua’uya.” Ena vona ba’e ’inanea ’inega yawaina gumwala.

⁴⁷Ta toluaviayavo edi tovmatana yani qabuna ni’a ’itea, ’inega Yaubada awatuboya vonaya, “Vonahaqiaqi, ’oloto ba’e tunutunuqina.”

⁴⁸Ta tomotau qabudi di’we~nana ’inaya ni’a iva’auta sabi vekova, taudi wese Ieisu i’itea yawaina ni’a gumwala, ’inega me edi nuavita qiduana nimadiega lumalumadi itutudi ta i’evivi edi ’abagaya. ⁴⁹Ta Ieisu enavo be wese vivine~dina lova Galiliega i’abibodea, taudi luluvaia itovotovolo ta yani qabuna ’ifo’ifoqe i’itea.

Ieisu itavunia

(Madiu 27:57-61; Maki 15:42-47; Ioni 19:38-42)

⁵⁰⁻⁵¹Taha ’oloto ana wawa Iosefa toatoa, tauna Iudia ’olotona ta ena ’abaga goyona Alimatia. Tauna ’oloto aqiaqina ta Yaubada matanaya tunutunuqina. Ba’e Iosefa~nana me Diu edi kaniselayavo ’idiega, ta ba’eba’e Yaubada ena ’Ebeluvine weaqina. Lova tutana me Diu edi tovanugwetayavo nuanuadi vonigo Ieisu ida luve’aligia, ta Iosefa~nana edi nuanua ge da’awahaqiaqia.

⁵²Ta Iosefa tauya Failato ’inaya ’abo Ieisu ’wafina weaqina venoqi nuanuana na’ewea. ⁵³’Inega Failato awafela ’abo Iosefa Ieisu ’wafina ’etoluai ’inega ’ewa webuiea ’abo umea kaleko wadawadaeana ’inega, ta ’abiboda a’uya deba’unu vauvauna ’inaya. Ta deba’unu~nana ana ’ita kavona vatu’ubu ni’a ialea dabo qiduana gamonaya. ⁵⁴Ba’e yani diavona ’ifoqe ’aubena ’ebe’iva’ava’ata ’inaya, ta tuta goyona Sabate nave’ale.

⁵⁵Ta vivine~dina lova Galiliega Ieisu maega imai Ielusalema ’inaya, e taudi Iosefa itala’obea ’abo Ieisu ana deba’unu ta wese ’wafina ma’oda ia’u ’aiqea i’itea. ⁵⁶’Inega i’evivi ’abagaya, ’abo dede’wa meilana aqiaqina i’iva’ava’aia Ieisu ’wafina weaqina.

’Inega mahala vulihia Sabate ’ifoqe ta iveyawai mana ’aubena~nana ana luvine nuanuadi ina ’abibodea.

“ 23:45 Ibe 6:19-20; 10:19-20 “ 23:56 ’Ifo 20:10; Luve 5:14

Ieisu ena ya'itoto 'evivi

(Madiu 28:1-10; Maki 16:1-8; Ioni 20:1-10)

24 ¹ Mahala vulihia wiki ana 'aubena nugweta 'awa'awai otaqaya vivine~dina dede'wa 'i'iva'ava'aina i'ewei ta itauya deba'unuya. ² Tuta~nana i'ifoqe 'inega deba'unu ana 'auboda dabo ni'au 'u'uvekawawa naqona i'itea. ³ Inega gamonaya ilugu, ta Kaiwabu Ieisu 'wafina i'ita 'avea.

⁴ Ta nawale gamonaya me edi nuavoqana itoatoa, mana ge ida alamania tola'ai ni'a 'ifoqe. 'Inega lukwayavonega 'oloto magilafudi ma adi kaleko namanamalidi be simasimalalidi i'ifoqe di'weddia itovolo. ⁵ Ta vivine~dina imwaniniva qiduana ta tuqatuqadiega isobadi ta ihiwa'odu bwa'obwa'oya. 'Inega 'oloto~dina ivoneddia, "Tola'ai weaqina tomotauna osalisalia to'aliga edi 'ebetoaya? ⁶ ^w Tauna ba'idia ge datoatoa, ta 'esi mayawaina ni'a ya'itoto 'evivi. Ta lova ena vona 'imia ona nuave'avinia tutana Galili 'inaya maega otoatoa, mana vonaya, ⁷ Tomotau Natuna ina ve'ineiea tomtau luvluveifadi nimadia be 'etoluai 'inaya ina tutuve'ewea, ta 'aubena vetoina 'aligega naya'itoto 'evivi.' " ⁸ E 'inega vivine~dina Ieisu ena vona ba'e inuave'avinia.

⁹ Inega deba'unu inogea ta itauya Ieisu ana to'abibodayavo leveni~dina ma ediavo 'idia, 'abo isimana tola'ai 'idewana deba'unuya 'idia 'ifoqe. ¹⁰ Tovematamagilafu~dina taudi Meli Magidala be Ioana be taha wese Meli, tauna Iemesa inana, ta wese vaina vivine maega Ieisu ena ya'itoto 'evivi weaqina ana tovaletuyanayavo ivonedi. ¹¹ Ta to'abibodayavo vivine~dina edi vona ge ida vetumaqanei, ta ivonaya vonigo edi vona kavona vona kavokavovo 'idewani. ¹² Ta Fita tovolu vihila tauya deba'unuya 'inega 'ita lugu vekova dadana ta kaleko namo 'itedi ta ge taha wese tola'ai da'itei. 'Inega tola'ai ni'au 'ifoqe matanaya weaqina nuana voqana 'abo 'evivi tauya.

'Oloto magilafudi Ieisu maega iveloba 'eda Emausa 'inaya

(Maki 16:12-13)

¹³ 'Aubena omo'e 'inaya Ieisu ana to'abibodayavo magilafudi itautauya taha 'abaga ana wawa Emausa 'inaya. 'Abaga~nana ana luluvai Ielusalema 'inega kavona 'eguma 'awa'awaia kana tutuvila be 'awa'awai~nana nuaninaya kana 'ifoqe. ¹⁴ Magilafudina nawale itautauya ta iveveqaelia yani diavona ni'a 'ifoqe Ieisu 'inaya weaqina. ¹⁵ Inega Ieisu ana 'aidega 'idia 'ifoqe 'abo maega itautauya, ¹⁶ ta ge adi fata ina 'inane.

¹⁷ Ta Ieisu magilafudina vetala'aiedi vonedia, "Toyani weaqina oveveqaelia?"

^w 24:6 Lk 9:22

'Inega iveutovolo ta adi 'ita kavona todou 'idewana. ¹⁸'Inega taha 'idiega ana wawa Kaliofasa Ieisu ena vona ve'iea voneaya, "Wagawaga qabudi imai Ielusalema 'inaya yani qabuna ni'au ialamania, ta ana 'ita o'a au 'aidega ge uda alamania tola'ai ni'a 'ifoqe 'aubena toi gumwala 'idia?"

¹⁹'Inega Ieisu ve'iedi vonaya, "Isana tola'aia?"

'Abo taudi ivonaya, "Yani~dina Ieisu Nasaleta 'olotona 'inaya 'ifoqe. 'Oloto ba'ena tauna tovesimasimana taha, ta wese Yaubada be tomotau qabudi matadia ena vonayavo be ena viaqayavo waiwaidi viaqidi. ²⁰Ta ema toveguba qiduquduadi be ema tovanugwetayavo 'oloto~nana ikafia ta ive'ineia Failato 'inaya, ta tomotau iluvine nuanuadi na'aliga. Ta 'abiboda toluaviayavo itutu've'ewea 'etolui 'inaya. ²¹* Ta avetumaqanea vonigo tauna ima'a me Isileli da'etoyavuima, ta yani ba'ena 'aubena toi gumwala 'ifoqe.

²²"Ta vaina vivine 'imega nuama igivevoqania, mana tawadega 'awa'awai otaqaya itauya deba'unuya, ²³ta Ieisu 'wafina ge ida lobei. 'Inega i'evivi imai 'imaya ta ivonema deba'unuya Yaubada ena tovale'ewayavo i'itedi kavona ve'wayoqa. Ta tovale'ewa~dina isimana 'idia leisuna 'aligega ni'au ya'itoto 'evivi mayawaina toatoa. ²⁴† 'Inega wese vaina emavo itauya deba'unu~nana 'inaya 'abo i'itea 'idewana vivine~dina edi simana 'imaya, ta tomotauna ge ida 'itea."

²⁵'Inega Ieisu vonedi vonaya, "Omi'a kwavakwavami ta debami i'wanina, mana tovesimasimana edi vona lova ge oda vetumaqanei. ²⁶‡ Mana isimana aqiaqi edi 'wayavi 'inaya vonigo Keliso luaqiaqiea be nugweta visiqa nalobedi ta 'abiboda nalugu 'abaga simasimalatina 'inaya."

²⁷^a 'Inega Ieisu ve'ale givesimalatia 'idia taunega weaqina Mosese be tovesimasimanayavo edi bukiavo 'idiega, ta wese buki qabudi 'idiega givesimalatia tauna weaqina.

²⁸Ta tuta goyona ina 'ifoqe 'abaga Emausa 'inaya, 'abo Ieisu vonedi vonaya, "Omi'a otoatoa, ta ya'a yatautauya."

²⁹'Abo taudi inoqiea ivonaya, "Gebu, ge una tauya, ba'idia kana 'eno, mana tawa velovanea." 'Inega awafela ta lugu edi vanuea.

³⁰Edi tuta 'ai 'inaya Ieisu beledi 'ewei ta weaqina vona lukaiwa, e 'abiboda gitomwea 'abo neidi. ³¹Omo'e 'inaya nuadi 'eqa'uaya ta Ieisu i'inanea, tuata 'idiega 'waiva. ³²'Inega magilafudi taudimo ivonaya, "Vonahaqiaqi, tutana 'edaya kamaimai ta Buki Nugwenugweina giyavuyavua weaqida e 'inega ada lutonova vedumaduma wawasai kavonaya 'aiwe giwalidaya dasaesaela."

* **24:21** Lk 19:11; Via 1:6 † **24:24** Ion 20:3-10 ‡ **24:26** Lk 9:22 ^a **24:27** Same 22:1-21; Ais 53

³³ 'Inega itovolo kwayavona ta i'evivi itauya Ielusalema 'inaya ta ediavo adi yau leveni ilobedi ta wese to'abiboda vaina maega. ³⁴ ^b Ta leveni~dina ivonedi ivonaya, "Vonahaqiaqi, Kaiwabu Ieisu 'aligega ni'a ya'itoto 'evivi, ta wese taunega ve'ifoqeyea Saimoni matanaya."

³⁵ 'Inega wese magilafudi ive'ale isimanea tola'ai 'edaya 'idia 'ifoqe, ta wese ma'oda Ieisu beledi gitomwei be 'inega i'inanea weaqina ivelulu'uyayea.

Ieisu 'ifoqe ana to'abibodayavo 'idia

(Madiu 28:16-20; Maki 16:14-18; Ioni 20:19-23; Viaqa 1:6-8)

³⁶ Nawale ediavo 'idia ivevelulu'uya 'inega Ieisu 'ifoqe nuanidia tovolu ta vonedia, "Ge ona mwaniniva ta toadaumwala yaneineimi!"

³⁷ ^c Ta qabudi imwaniniva gegoyo ta ivonaya be otala taha da'ifoqe. ³⁸ Ta Ieisu vonedia, "Tola'ai weaqina ovenuana magilafu ta wese giwalimi a'ala? ³⁹ Nimagu be 'aqegu ona 'itedi, ya'a ba'e taugu. Ta wese ona gitonovigu mana otala vei'o gegana ta wese lulu gegana, ta ge 'edewani ona 'ita lobei ya'a 'iguya, mana ya'a ma 'wafigu yatoatoa."

⁴⁰ Ieisu ena vona ba'e lu'ovoia, 'inega nimana be 'aqena ve'itedi. ⁴¹ 'Inega iqaiawa qiduana ta wese nawale me edi venuana magilafu, 'inega Ieisu vetala'aiedi vonaya, "'Evisa 'abwaga 'eno'eno oda neigu eda 'ai?" ⁴² 'Abo taha 'iqana meomeona i'ewei ineia. ⁴³ 'Inega 'ewei ta matadia 'ainia.

⁴⁴ ^d 'Inega vonedi vonaya, "Lova omi'a maega katoatoa ta yavonemi yani qabuna i'wayavia weaqigu Mosese ena luvine 'inaya be tovesimasimana edi bukiavo 'idia ta wese buki Same 'inaya na'ifoqe. E 'inega ba'e 'itaga edi 'wayaviavo ana alamani aqiaqi ni'a 'ifoqe."

⁴⁵ 'Inega Ieisu nuadi giqu'uya 'abo Yaubada ena vona qabuna Buki Nugwenugweina gamonaya ialamani aqiaqiedi. ⁴⁶ 'Inega vonedia, "Ba'e 'edewani i'wayavia ivonaya, 'Keliso visiqi be 'aliga nalobedi, ta 'aubena vetoina 'inaya 'aligega naya'itoto 'evivi, ⁴⁷ 'inega ana wawega ina ve'ale Vale Aqiaqina ina lugaihiea Ielusalema 'inega be di'we qabudi bwa'obwa'oya 'idia, be tomeqabu ina nuagivila e Yaubada edi luveifana nanuataqodi." ⁴⁸ ^e Ta omi'a ba'e yani diavona ni'a o'itedi, 'inega ona simana 'ifoqeyedi tomotau qabudi 'idia. ⁴⁹ ^f Ta yavonemi, ya'a nawale mahalega Niboana Gwalagwalana ena vetunei 'imia, lova Tamagu ena vona fofofola 'idewani. Ta omi'a Ielusalema 'inaya ona ba'eba'e ana laba Yaubada 'inega waiwai ona 'ewa nugwetea."

Ieisu vaneqa mahalaya

(Maki 16:19-20; Viaqa 1:9-11)

⁵⁰ Ieisu ena vona ba'e lu'ovoia 'inega 'ebe'ewedi maega itauya Bedani 'inaya. 'Inega nimana silagaia ta vona veyolubedi. ⁵¹ Ta nawale vonavona

^b 24:34 1Kol 15:4-5 ^c 24:37 Md 14:26 ^d 24:44 Lk 9:22 ^e 24:48 Ion 15:27; Via 1:8

^f 24:49 Ion 14:16; 15:26; Via 1:4

veyolubedi 'inega ve'ale vaneqa ta Yaubada 'ebe'ewei vaneyea mahalaya.
⁵²'Inega Ieisu ana to'abibodayavo ihiwa'odu 'inaya ta iawahawatuboya, ta
'abiboda me edi qaiawa i'evivi itauya Ielusalema 'inaya. ⁵³Ta tuta qabuna
Vanue Gwalagwalana 'inaya itoatoa ta Yaubada iawahawatuboya.